

**NINTH MIZORAM LEGISLATIVE ASSEMBLY
(FOURTH SESSION CUM BUDGET SESSION)**

LIST OF BUSINESS

FOR TENTH SITTING ON THURSDAY, THE 13th MARCH, 2025
(Time 10:30 A.M to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

FINANCIAL BUSINESS

Discussion and Voting on Demands

2. **PU VANLALHLANA**, Minister to submit the following to the Vote of the House on 13.03.2025 (Thursday).

<i>Demand No.</i>	<i>Purpose</i>	<i>Amount</i>	<i>Demands for Grants page No.</i>
12	Parliamentary Affairs	1,04,20,000.00	98-101
42	Transport	43,45,52,000.00	489-496
45	Public Works	6,58,40,75,000.00	504-526
TOTAL		7,02,90,47,000.00	

3. **PI LALRINPUII**, Minister to submit the following to the Vote of the House on 13.03.2025 (Thursday).

<i>Demand No.</i>	<i>Purpose</i>	<i>Amount</i>	<i>Demands for Grants page No.</i>
24	Health & Family Welfare	8,26,06,89,000.00	277-307
29	Social Welfare	3,13,40,61,000.00	337-366
43	Tourism	11,66,44,000.00	497-502
TOTAL		11,51,13,94,000.00	

VANLALTHANTLINGI
Commissioner & Secretary

SPEAKER : “Chutichuan, puitling apiang chutiang rilru puin i awm ang u; tin, eng kawngah pawh rilru danglam pu in lo nih chuan, chu pawh chu Pathianin a la hriattir ang che u. Engpawh nisela, kan thlen chin atang khan hma i sawn zel ang u”.

- Philippi 3:15&16

Tukinah kan House Leader nen kan inbia a, kan Chief Minister sawmna angin kan Union Home Minister Pu Amit Shah hi tun thla Ni 15 (Inrinni) khian Aizawl a rawn tlawh dawn a. Chu chu Assam Rifles te Zokhawsanga an insawn pheina tur farewell function a ni dawn a. 23rd Assam Rifles, Khatla ah chawhnu dar 3:00 hman tur a ni a. Minister leh MLA te kan vaiin sawm kan ni a, kal theuh kan tum dawn nia.

QUESTIONS & ANSWERS:

Zawhna & Chhanna-ah kan kal nghal ang a.

Starred Question No. 141: NH 44A (108 New) chungchang.

Zawhna Neitu: Pu H. Lalzirliana, Mamit Bialtu.

PU H. LALZIRLIANA: Pu Speaker, Starred Question No. 141 - PWD Minister zahawm tak chhan atana ka zawhna chu -

- a) NH 44A (108 New) hi tuna a dinhmun chiah min hrilh thei em?
- b) Contractor hmasa M/S Gayatri Project Limited kha engtika terminate nge a nih? (A ni leh thla);
- c) Engtikin nge sorkarin contractor thar la leh tura retender a tihchhuah?
- d) A tih chhuah tawh chuan, tihfel a ni tawh em?
- e) Engtikah nge hna hmabak la awm hi khawih chhun zawm leh theih a nih ang?
- f) NH 44A (108 New) in a kalsan kawng hlui ho one-time improvement engtikah nge thawh tan a nih ang?
- g) Lengte kai - Tlawng Lei (Bridge) dawh mek hi engtik atanga dah tan nge?
- h) Engtikah nge zawh theih a nih ang?
- i) Lei dawh kai anih hma chhunga kawng zawh lai mek hi, hei aia tha zawka siam tumna a awm em?

SPEAKER : Chhang turin Pu Vanlalhlana, Minister, PWD ilo sawm ang.

PU VANLALHLANA, MINISTER: Pu Speaker, Member zahawm tak Pu H. Lalzirliana Zawhna ka chhanna chu -

- a) Ministry of Road Transport and Highway-ah balanced work estimate thehluk a ni a, sanction nghah mek a ni.
- b) Gayatri Project Limited contractor hmasa zawk kha Ni 24th August, 2023 khan tih tawp a ni.
- c) Ni 22.9.2023 ah item rate tender tihchhuah a ni.
- d) Tender tihchhuahah valid bidder an awm loh avangin, contractor thlan theih a ni lo.
- e) Hna hmabak thawh tur la awm khawih chhunzawm tur hi balance work estimates sanction nghah mek a ni a. MoRTR-in a sanction hunah tender chhuaha hnathawh tan thuai tum a ni.
- f) MoRTH atanga sanction kan hmuh ve leh heng hnate hi tender chhuaha thawh tan theih tura buatsaih a ni ang.
- g) Lengte kai - Tlawng Lei (Bridge) hi Ni 27.3.2021 atanga dawh tan a ni.

- h) Ruahman anga thil a kal tluan chuan, Ni 31.7.2025 ah zawh theih beisei a ni.
- i) Diversion kawng hi motor tlan nuam tura thawm that reng a ni a. Lei dawh kai a nih ve leh highway-kawngpui awmsa hi hman theihna chei that nghal tum a ni.

SPEAKER : Zawhbelhna kan la ang a; zawt turin –

1. Pu H. Lalzirliana (Zawhna neitu),
2. Pu Lalramliana Papuaia,
3. Pu RM Chakma.

PU H. LALZIRLIANA: Pu Speaker, ka zawhbelhna –

- i) ‘One-time improvement’ tiha kha, Ministry of Road Transport and Highway Secretary, Pu Giridhar Aramane a secretary anih laia ka lehkha a rawn chhannaah hian – ‘one-time improvement by-pass re-alignment portion NH 44A Mizoram state ami hi current annual plan 2022-23 ah hian telh a ni e’ a ti a, hei hi a lehkha a ni a, Ministry of Road Transport and Highway Secretary lehkha. Hei, kum khat-hnih dawn a ni tawh a, kan department lam pawhin min lo hriatpui ta se la. He lehkha pawh hi House-property atan ka pe ang a, an record duh takin. Kha kha bawhzui ran theih a ni ang em?
- ii) Rajiv Nagar - New Kawnpui Road, Tripura khu Economic Importance and Inter-State Connectivity scheme hmanga kawng siam a ni a. Phase 1 (0-9 kms) hi zawh thawkhat tawh a ni a. Hmannia kan Minister zahawm takin min chhanna kha min lo check sak sela, department pawhin min lo chian sak sela, nakinah demand sawi hunah ka rawn sawi leh dawn tho bawk a. 0-9 kms portion hi a balance zawh deuthaw tawh a ni a, zawh fel chiah chu a la ni lova. 9-18 kms (another half-portion) kha tih leh tura dah a ni. Chu chu department lam atang pawh hian proposal theh thlak daih tawh niin ka hria a, sorkar hmasa hun atang pawh khan. A sanction te hi hmuh tur a ni em?

A changtu minister khan a hma khan, ‘PMGSY-ah dah a ni e’, a ti a, kha kha ka ring chiah lova, ka hrethiam tho a. Kan minister hi a area lo lam a ni a, a la tlawh lovin ka ring a, nakinah min la rawn tlawh sak sela. Tripura nena in connect anih avangin a pawimawh a. Tunah hian department-in a bawhzuina te kha engnge a thlen chin?

PU LALRAMLIANA PAPUIA: Pu Speaker, ka zawhbelhna chu -

- i) National Highway 44 contractor Gayatri Limited Project kha engvanga contract terminate nge a nih?
- ii) He hna atan hian original estimate engzat nge? Balance work estimates engzat nge nia, engtikah nge hmuh a inbeisei?
- iii) Tin, he kawngin a kalsan kawng hlui one-time improvement tih tura ruahman kha, khawi khaw tana ruahman nge an nih?” Ka lawm e.

PU RASIK MOHAN CHAKMA: Pu Speaker, ka lawm e. Ka zawhbelhna chu –

- i) Chawngte ‘C’ - Ajasora kawng 2013-a take up tawh a ni a, tun thlengin lei hawna ruahmanna a awm kan lo hre lo a. Tunah he kawng hi maintain mek a nih si chuan, a kawnga leihlawn 4 awm kha engtinng e sak a nih theih ang?
- ii) Tin, tunah hian maintenance tih mek a ni a, a maintenance estimate ah khan rora hman tura tih a ni em?
- iii) Engvangin nge luikama lungte kha PCC tih nan an hman zel? Kha kha kan department site-engineer te khan an en uluk thei deuh em? Tha taka thawk tura tih theih dan a awm em?

iv) He kawng veka culvert pawh vawi-thum siam a ni tawh a, tunah pawh an siam mek a. Hmannia an rod hman chu 6 mm (ring coil 6 mm) ang hi a ni a. A hmun atang khan call in a contractor ka bia a, 'chutiang kan hmang lo' a ti tlat mai a, mahse keimah ngeiin ka hmu ve si a. Khang te kha siamthat tir dan a awm ang em? Estimate ang taka thawh tir theih dan kha a awm em?

SPEAKER : A lawmawm e. Chhang turin PWD Minister, Pu Vanlalhlana.

PU VANLALHLANA, MINISTER: Pu Speaker, Zawhbelhna chhanna chu -

Member zahawm tak khan a thiante nena an inbiak dan leh, helai kawng chungchanga hma a lo lak dan te, lekha an inthawn dan te a sawi a, a lawmawm khawp mai a. Hmanni Finance Commission ho lo kal an liam leh tawh hnu khan, Minister of State, Central Ministry atangin Harsh Malhotra a lo kal khan PWD E-in-C nen a thlenna inah lengin kan hmu a, chutah pawh chuan kan sawi a; 'tun thla chhung ngei hian rawn peih ka tum ang' a ti a ni.

Tin, Tripura nena kan inkalpawhna a sawi pawh kha, Ni e, kawng pawimawh tak tur a ni. 0-9 kms kha laih tawh a ni a, 9-18 kms la khawih loh kha engnge a chhan ka hre chiah lo a. Amaherawhchu, kan hotute nen kan lo sawi ang a, chhunzawm dan kan ngaihtuah dawn nia.

Tin, Pu Lalramliana zawhna - Gayatri Project Ltd. te hi National Highway 44A laitute an ni a. Amaherawhchu, an hna a muan lutuk avangin kan terminate tawp mai a ni. Tichuan, a balance work hi crore ₹19,97,50,000/- a ni a. Tender te koh a ni a, amaherawhchu, chhangtu an tlem avangin cancel leh a ni a. March thla chhung hian tender pawh koh leh kan tum dawn a ni.

Pu RM-a thil sawi kha ka vaiin, ka bangbo tlat mai a; a hmunah kal a ngaiin ka hria a. Assembly Session kan neih zawh hian Chawngte leh Tlabung vel saw va kal ila a chiang maiin ka ring a. A hmuna va kal loh chuan ka hre hleitheih tlat lo a ni. A tha lo laite pawh chu siamthat kan tum ang. 'Material tha lo an hmang' a tih te kha, a hmunah kan va en ang a. Tin, a hrim hrimah tunlaih chuan social network te pawh a tha tawh a, mobile phone camera te pawh a awm vek a. Thil diklo hi chu a thla te la ila, a mawhphurtute pawh hriattir ta zel ila; chutiang chuan, kan ram tan kan tangtlang dawn a ni.

Pu Speaker, ka chhang kim em aw?

SPEAKER : I chhang kim viau e.

Starred Question No. 142: Zawlsei-Mualcheng-Keitum Road chungchang.
Zawhna Neitu: Pu Ramthanmawia, East Tuipui Bialtu.

PU RAMTHANMAWIA: Pu Speaker, PWD changtu Minister zahawm tak Pu Vanlalhlana chhan atan Starred Question No. 142 chu -

NESIDS hnuai DoNER, Govt. of India kaltlanga thawh tur Sorkar hmasain ruahmanna a lo siam -

- a) Construction of Zawlsei-Mualcheng-Keitum Road priority no.1 dah tawh nia lang hi bawhzui zel a ni em?

- b) Bawhzui zel a nih chuan, eng chen nge a thlen tawh?
- c) Bawhzui zel a nih loh chuan, a aiah hmun danga thawh turin hmalak a ni em?
- d) Hmalak a nih chuan, khawi hmun atan te nge hmalak a nih?
- e) Engnge a thlen chin?

SPEAKER : A chhang turin kan Minister zahawm tak PWD changtu Pu Vanlalhlana ilo sawm ang.

PU VANLALHLANA, MINISTER: Pu Speaker, Member zahawm tak Pu Ramthanmawia zawhna ka chhanna chu hetiang hi a ni e -

- a) Construction of Zawlsei-Mualcheng-Keitum Road hi Sorkar hmasa-in priority-a a lo dah tawh hi bawhzui zel a ni ta lo.
- b) A chungah chhanna ang khian, bawhzui zel a ni ta lo.
- c) Hmun danga thawh turin hmalak mek a ni e.
- d) Proposal thar siam a ni a, heng atan te hian hma lak a ni: -
Pukpui - Silsury Road;
Thenzawl - Sialsuk Road via Lau River;
Khankawn - Rongurahmun Road;
Tualpui - Champhai Road;
- e) Heng project te zingah hian Pukzing - Silsury Road tih loh chu sanction tura peih fel thawkhat tawh a ni e.

SPEAKER : Zawhbelhna heng memberte atang hian kan la ang -

1. Pu Ramthanmawia (Zawhna neitu),
2. Lt. Col. Clement Lalhmingthanga,
3. Pu Robert Romawia Royte,
4. Pu TBC Lalvenchhunga,
5. Pu W. Chhuanawma.

PU RAMTHANMAWIA: Pu Speaker, sorkar thar a lo piang hi chu sorkar hmasaa kan CM kalchhuak ta te pawhin helai Zawlsei-Mualcheng-Keitum Road hi a pawimawh zia hriain an lo buaipui a, tender theih mai dawnah kan ngai tawh a, kum 2023 December vel khan. Tuna kawng pangngai aiin km 25 velin Aizawl kan hnaih dawn a ni. Hetianga sorkar inthlak avanga hmasawna ruhrel pawimawh takah a hnungtawlh zawnga kan ram min hruai dawn a nih chuan, Pu Speaker, a beidawnthlak ka ti. (**Pu H. Ginzalala:** A subject ah lut mai se; thildanga sawi kai vak vak kha. Zawhna hun ka chang hman lo ang e.) Pu Speaker, Engvangin nge hei hi cancel-a hmundangah min divert sak? Tih that leh theih dan a awm em?

LT. COL. CLEMENT LALHMINGTHANGA: Pu Speaker, ka lawm e. Supplementary Question: -

- i) Tun dinhmunah BRO (Border Road Organisation) hian eng kawng kawngte hi nge a enkawl mek?
- ii) Champhai Khankawn check point via Kanan Veng atanga New Champhai rawn chhukthlakna (Champhai khawchhung inkalpawhna kawngpui ber leh a khawchhung tantlangtu kawngpui ber) khi tun dinhmunah hian tu ber enkawl na hnuaiyah nge a awm?

SPEAKER : A lawmawm e. Khatiang kha Zawhna a nih kha. A chheh velah

hian kal kual lo hram ila. A chhan chu, zawt duh hi a awm deuh thup si a, memberte i hrethiam tlang ang u. Pu Robert Romawia Royte ilo sawm ang.

PU ROBERT ROMAWIA ROYTE: Pu Speaker, ka lawm e. Ka zawhbelhna chu –

i) ZPM sorkar thar a lo pian hnu hian contractor te an hnathawh theih zat tur bitukin, ‘hna 5 bak contractor pakhatin a thawk thei lo ang’ tih order a awm a. He order hi PWD hian a hriatpui em? PWD manual sawi dan a ni em?

ii) ‘Tender 5% aia hniama chhangte chu pawm an ni lo ang’ tih a ni tlat mai a, PMGSY ah hian. MLA te kan nih hma pawhin tender te kan chhang fo a, 20% aia hniama te, 18% aia hniama tein; tha tak takin hna te pawh thawh tho a ni a. Tun sorkar thara 5% aia hniama tender chhan phal loh tlat leh, Schedule of rate sang mangkhenga han revise-a, course index pawh Aizawl District ah 27% a ni a, district dangah phei chuan 27% aia sang te. A awmzia chu, Schedule of rate a belh leh tihna a ni. Chutianga a nih laiin, 5% aia hniama chhan tum bawk si loh chuan, a contractor hna an pekte hi hlawk tir kan va tum em em ve? Hetiang hi Pathian ram thlentir kan tum vang a ni em ni?

iii) Tin, 5% aia hniama, 10% aia sanga chhan awih loh’ tih kha a awm bawk a. Engatinge 5% aia hniama chhan kha an awih tlat loh? 6% a thawk ngam material lo neisa te a awm theih a, khangah kha chuan a percent hniama deuh te pawhin an chhang thei a, sorkar hlep zel turin. ‘Year of Consolidation - inrenchen’ kan tih nen hian he order phuahchawp hi a inhmeah lovin ka hria a. Pu Speaker, CPWD manual kan hman mek nen hian a inmil thei dawn em ni?

PU TBC LALVENCHHUNGA: Pu Speaker, ka lawm e. Tuna a zawhna (a) ah khan zawhbelhna ka neiha chu - Construction of Zawlsei-Mualcheng-Keitum Road, ‘no. 1 priority-a dah tawh nia lang’ tih lai hi; dah a lo ni tawh reng em?

NESIDS road kan chhawm Zawlsei-Mualcheng-Keitum Road hi crore 250 man a ni a, hei hi sorkar hmasain priority-a a dah nia hriat a ni lo a. Khalai kha depts. lamin priority ah an lo dah reng em? Tuna ka zawhna kha sorkar hmasa khan NESIDS roads hnuai normative location chhungah engtik laiin nge a lo dah?

PU W. CHHUANAWMA: Pu Speaker, ka zawhbelhna chu –

i) Riangtlei PMGSY kawng work order hi kum 2017 kum tir khan a chhuak a, October 2017 ah hna tanin, 2020 ah an thawk zo a ni, a kawng lai hrim hrima kha chu. A ram a rem tha a, mahse, furah chuan motor kal a har em em a, nikum furah phei kha chuan buhfai a phurh loh theih loh a ni. Chuvangin, a minister hi ka zu tah-awh a, a kawng chhe lai leh motor-te a tan thinna lai siamna tur te kan ngaihtuah a. He kawng hi engtikah nge all-weather road-a siam a nih theih ang?

ii) Tlangpui - Khawlailung Road panna kawng hi State-priority project-ah kum 2018-a hna tan a ni a, 2019-a zawh tura tih a ni. Tichuan an thawk hlei thei lo nge, State-Project Monitoring Board khan a han enfiah hnuin, hmanni lawkah terminate a nih thu te kan lo hria a. Hei hi a la tharlam em em mai a, engtia hmalak zel nge a nih?

SPEAKER : Chhang turin PWD changtu Minister Pu Vanlalhlana ilo sawm ang.

PU VANLALHLANA, MINISTER: Pu Speaker, zawhna neitu Pu Ramthanmawia zawhna kha han chhang hmasa ila.

Zawlsei-Mualcheng-Keitum Road hi keini pawhin kan ngaipawimawh a, hmachhawpah pawh kan dah a ni. Amaherawhchu, helai kawng hi motor lian te pawh thawl deuh hleka an inpelh theihna tur intermediate lane-a siam kan tum avanga la tih lo mai a ni. (**Pu Ramthanmawia:** Pu Speaker, tuna ka sawi pawh kha intermediate lane tho a ni.)

Harsatna pakhat awm chu, non-acquisition-a tan a ni a. Intermediate lane-a siam tur khan ram acquire a ngaih dawn avangin compensation tamtak pek ngai a ni a. Tichuan, compensation component kha NESIDS in a tum thei si lo a, State sorkar pek tura tih a ni a. Compensation pek kha State economy-in kan tlin si loh avangin kan pending hlek mai a ni.

Pu Robert Romawia zawhbelhna – ‘contractor hna 5 bak thawh phal loh’ tih kha, a practical-a experience kan hmuh tawhah, hna ngah lutuk, a neitute indaih loh avangin hnain a tuar ve a ni. Hna pakhat-pahnih-pathum lo thawk kawp lawp lawp te chu an awm a, pali-panga te pawh an awm; amaherawhchu, an hnathawhin belhchian a dawl lo deuh a ni. Hna a tam na na chuan supervision ah duhthu a sam thei lo a. Tin, chu lo ah, ‘sem-sem, dam-dam’ kan ti a, kristian kan ni a. Contractor pakhatinin a vai-vaia a lo thawh veka kha tha kan tih loh avangin, han insemzai te pawh a tha a lawm le!

Tin, ‘5% ai hniam chhan phal loh’ tih kha, a ni lem lo a; a aia hniam chuan a chhan theih teh meuh mai a. Amaherawhchu, sorkar dinna, below 5% a nih hian a tawk viau a; a aia hniam a nih chuan work-in a tuar thin a. ‘Hnain a tawrh dawn ai chuan, hetah hianin i rek bung mai ang’ tih ngaihkan kha a awm ta a ni.... (*interruptions*)

PU ROBERT ROMAWIA ROYTE: Pu Speaker, min hmin chuang lo vekin ka hria a.

Contractor-ten below 5%-a an chhan chuan, an chhanna rate kha a inang vek dawn tihna a ni a; khatah khan thum vawrin nge an tih dawn?

PU TBC LALVENCHHUNGA: Pu Speaker, ‘ta se’ hmanga zawhna in chhan zel chuan, tihngaihna a awm lo ang. Tuna mite chu absolute figure awm a ni a, ‘ta se’ dang nen a inang lo a. Tin, department tam takin harsatna an tawh meka kha a practical ram a ni.

PU LALMUANPUA PUNTE: Pu Speaker, 5% below aia hniamin chhang awm lo ta se?)

PU VANLALTHLANA, MINISTER: Pu Robert Romawia hian hna 2 aia tam hmu ta se...

PU ROBERT ROMAWIA ROYTE: He House hi fiamthu thawhna hmun a ni lova. Pu Speaker, mahni mualphona tur lam a nih dawn hian engtin emaw ni hian kan awm thin a. Hei hi kalphung-thar kal zel dan tur a nih chuan, a van tha lo em! Ka sawi awmzia zawk chu, 5%-a chhang kha a hmuh tum a ni lo thei lo a, kan tender kha a nung dawn; 5% below aia hniam khan a chhan theih loh a. 5% below-a chhang theuh theuh kha, thum an vawr dawn nge, duh an thlang tawh mai dawn?

PU LALRINTLUANGA SAILO: Pu Speaker, khawngghaihin. High Court ruling ah khan a lowest kha pek tur a ni a, kha kha he sorkar hian a kalpui em?

PU VANLALHLANA, MINISTER: Pu Speaker, kan chhanna an ngaihdan a nih loh pawhin lo ngaithla ve phawt mai se. ‘Ta se’ tih khan ngaihdan a kal thui lutuk em aw, ka ti a ni. Below 5% aia hniam a nih chuan, ‘a work kha a tha lo e; kan fimkhur’ kan ti a. Chutiang principle nei chuan tender pawh kan ko a, a chhan pawh an rawn chhang a ni, below 5% vek te a ni. Chutah chuan, ‘tunge in thlan ang’ tih kha, Dan zawmin kan ti; contractor khan a hmuhloh pawhin a complain miah lo. Western by-pass road te pawh contractor hrang hrangin an rawn chhang a, rate inang te pawh Dan angin kan rem a, pakhat hnenah kan pe mai; harsatna a awm lo.

Pu W. Chhuanawma zawhna kha - Tlangpui-Lungva Road contractor F. Lalliansanga, Aizawl Venglai chu February 24, 2024 khan terminate a ni a. Assessment of balance work tender tur leh tur loh chungchangah ngaihtuahna a kal mek a, hma kan la ang.

Lt. Col. Clement Lalhmingthanga zawhna, Khankawn-New Champhai Road via Kanan-Bethel-Zion Road hi tun dinhmunah PWD-National Highway Division-II enkawl mek a ni. Ni 28.6.2024 khan PWD Champhai Division hnen atangin hlanchhawn a ni e.

Riangtlei Road hi kan hmachhawp a ni a. Fur anih avangin kawng an nei tha lova, a mimal pawisa pawh an bialtu MLA hian a hmang hial tawh a. Hei hi sorkar pawhin ngai pawimawhin, a siam tha chho ang chu, Pu Speaker.

SPEAKER : A lawmawm e. Nichin chhannaah khan ‘Pukzing - Silsury Road’ tih kha a awm palh hlauh mai a. Assembly Secretariat hi kan fimkhur ve khawp mai a, hengah hian tihsual palh te a awm hlauvin kan han inen chhuak a. A department lam atanga a lo kal dana hi ‘Pukpui - Silsury Road’ tih a nih avangin, a ngai ngaiin kan dahchhuak a ni tih kha House hriatah ka han sawi a. Kha kha department lam atanga kan dawn dan a ni e.

Starred Question No.143: RGSA hnuaia VC House chungchang.
Zawhna Neitu: Dr. K. Beichhua, Siaha Bialtu.

DR. K. BEICHHUA: Pu Speaker, ka lawm e. Local Administration Department changtu kan Minister zahawm tak hnena ka zawhna chu –

- a) Sokar kum kal ta, 2023-2024 leh 2024-2025 chhungin Rastriya Gram Swaraj Abhiyan (RGSA) Scheme hnuaiah VC House sakna hmuh a ni em?
- b) Hmuh ni ta se, VC House eng zat sakna nge?

SPEAKER : Local Administration Department changtu, Minister Pu C. Lalsawivunga ilo sawm ang.

PU C. LALSAWIVUNGA, MINISTER: Pu Speaker, ka lawm e. Dr. K. Beichhua, Siaha bialtu zahawm tak zawhna chhanna chu –

- a) Aw, hmuh a ni e.
- b) 2023-2024 sanction 2024-a kan hmuh atangin VC House 19 sak a ni a, 2024-2025 ah 29 sak a ni bawk. Tun financial year 2024-2025-ah hian VC House a vaiin 48 sak a ni e.

SPEAKER : Zawhbelhna kan la ang a -

1. Dr. K. Beichhua (Zawhna neitu),
2. Pu T. Lalhlimpuia,
3. Pu V. Malsawmtluanga,
4. Pu H. Ginzalala.

DR. K. BEICHHUA: Pu Speaker, ka zawhbelhna chu –

- i) VC House sak belh tura thlan eng khuate nge?
- ii) RGSA Scheme hnuaiiah hian Mizoram ah VC House engzatnge sak a nih tawh?
- iii) VC House pakhat sak nan cheng engzat nge ruahman a nih?
- iv) VC House satu tur engtianga thlan nge a nih?
- v) He scheme atang hian computer dawn a ni em? Dawn ni ta se, engzat nge? Semchhuah a ni tawh em?
- vi) ADC area chhungah hian VC House leh computer te pek ve a ni em?

PU T. LALHLIMPUA: Pu Speaker, ka zawhbelhna chu –

- i) Kum 2024-2025 chhung hian RGSA Fund Mizoram sorkarin dawn a nei em?
- ii) A neih chuan, engzat nge?
- iii) Hman a nih dan min hrilh thei em?

PU V. MALSAWMTLUANGA: Pu Speaker, ka lawm e. Ka zawhbelhna chu –

- i) 15th Finance Commission Grant dawn tawh leh, la dawn tur min hrilh thei em?
- ii) 15th Finance Commission Grant hi Govt. of India hian a hman dan tur ruahmanna a siam em? A siam chuan, engtin nge?

PU H. GINZALALA: Pu Speaker, VC House hi kan bial lamah pawh neilo kan la tam khawp mai a, Vaikhawtlang, Murlen, North Diltlang, Vapar, Ngaizawl, henghote hi a remchan angin kan Minister hian min lo hriat sak se la. ‘Pawisa a awm chuan...’ tih chauh a ni. Chu chu min ngaihtuah sak thei ang em?

SPEAKER : A lawmawm e. Kan sawi fo thin angin, kan Minister-te hi ‘zawhbelhna engnge an zawh ang’ tih kha hriat lawk a ni thin si lo a. Zawh chu a thianga, amaherawhchu, an lo inring lova an chhang vek thei lo a nih pawhin, kan hrethiam ang a. A theih ang anga chhang turin LAD changtu, Minister Pu C. Lalsawivunga ilo sawm ang.

PU C. LALSAWIVUNGA, MINISTER: Pu Speaker, ka lawm e. A zawhna neitu zawhna - ADC area ah han tan ta ila.

RGSA Scheme hian Mizoram pumpui, ADC area te pawh a huam a ni. VC House sak vek tum a ni. Tin, a sa tur thlan thuah chuan District Local Administration (DLAO) ten anmahni bial chhungah leh an mamawh dan ang zelin an rawn thlang a, chutianga chuan VC House sakna hi pek thin a ni.

Tin, VC House sak tawh zat hi, engzah nge awm ka lo chiang lova. Nikum chhunga kan sak erawh kha chu a vaiin 48 a ni thung a. Engpawhnise, kan hotute’n an hre thei turah ngai ila, a remchan danin kan inhrilh hre leh dawn nia.

Tin, a dang hi ka lo chhinchhiah hman chiah lova.... (**Dr. K. Beichhua:** Pakhat sakna atan cheng engzah nge ruahman a nih?)

RGSA Scheme hnuaiiah hian hna component hrang hrang a awm a, chung zingah chuan Panchayat Bhavan, 'VC House' kan tih hi sak theihna component pakhat zinga awm a ni a. VC House pakhat sakna atan ₹20 lakhs zel central-in a rawn ruahman anga sak thin a ni. **(Dr. K. Beichhua:** Pu Speaker, computer chungchang kha?) Computer pawh hi RGSA scheme atanga lei a ni a, RGSA scheme component pakhat a ni. Tun financial year kal zo tur computer-ah hian computer sets 88 VC-te hnenah pek a ni a, DLAO ten a mamawhte an bial chhung atangin an rawn thlang a, chutiang chuan pek a ni. Hei hi pek tum zel pawh a la ni nghe nghe a ni.

Member zahawm tak Pu T. Lalhlimpuia zawhna kha - 2024-25 chhung hian RGSA fund ₹10 crore, 1st installment-ah September, 2024 khan kan dawng a ni a. Ahmanna hi, Central Executive Committee-in a approve hnu ah RGSA hnuaiia state leh district-a thawktute hlawh tur te, VC te training-na atan te, Panchayat learning center dinna tur te, Common Service Center dinna tur te, Panchayat Bhavan leh VC-te tana computer set leina tura hman a ni.

Tin, Pu V. Malsawmtluanga zawhna kha - 15th Finance Commission Grant hi hlawm-hniha dawn leh, pek kan ni a. 'Basic Grant' an ti a, chu chu Untied Grant a ni. A dang leh chu Tied Grant a ni a, chutiang chuan hlawm-hniha then a ni. Untied Grant hi Village Council te anmahni khawchhunga hmasawna hna an thawhna tur grant pek a ni a. Tin, Untied Grant erawh hi chu tui in tur leh sanitation lama hman tura ruahman sa a nih angin, PHE ah a lut a. A ratio hi, tied grant - 60%, untied - 40% a ni thung a. 15 FC Grants a lo thlen hian VC te account ah direct-a thun a ni thin a, sorkar emaw, department emawin cheng khat mah pawhpen a thianga lo. State Finance Commission-in allocation a siam angin VC-te account ah dah nghal thin a ni.

Tin, 'dawn leh dawn loh' tih kha, Pu Speaker, sorkar hmasa MNF Ministry ah khan, 2021 1st installment kha a lo lut a. Amaherawhchu, India ram pumpui ah pawisa enkawl dan - hmanchhuahna leh pekchhuahna Dan thar a lo awm a. Chuvang chuan sorkarin harsatna chi hrang hrang a nei ni te pawhin a lang a. Tichuan Tied hi ni 400 chuang sorkarin a kawh hnuah pek a ni a, Untied erawh chu ni 500 chuang Treasury-a a awm hnuah pekchhuah chauh a ni.

Tichuan, 2023 inthlan ah sorkar thar a lo piang ta a, sorkar thar chuan theihtawp chhuahin a umzui a. Heng harsatna chi hrang hrang lo awm hi zawi zawia sutkian chhoh niin, Delhi tlang ah te pawh kan official te an tlan thla dawr-dawr a. Chutiang chuan, tihfel ngai, term hmasa a an lo la tihfel loh kha thla 10 chhungin sorkar thar hian a chingfel a. Tichuan, kum 5 term chhunga 15th Finance Commission Grant 1st installment VC te account a dah bak kha dah a ni ta lova. A hnulam zawnga Finance Commission Grant hi sorkar thar a lo pian hnuah hian VC-te account ah dahluh nghal zel a ni a. Thla 10 chhungin tum 3 (installment 3) VC te account ah dahluh hman a ni.

Tichuan, 2022-2023 chin dawn tawh niin, VC te account ah kan dahlut nghal vek a ni a, kan dah lu hnuhnun ber hi nikum November Ni 26 (VC Inkhawmpui Ni tak) khan an account ah kan dahlut a. Tichuan, 2023-2024 hi tunah hian beisei mek a ni a, Grant Transfer Certificate pawh thehluh thlak tawh a ni. Chu chu tunah hian kan beisei mek a ni.

VC House hi nikum khan Mizoram pumpuiiah sak tum a nih avangin, khaw 390 chuanga sakna kan dilah 313 approve tawh a ni. Tichuan, hemi sanction atang hian VC House 48 nikumah kan sa a, sak belh zel kan tum avangin 394 dilna kuminah kan thehluh leh tawh

a. RGSA Sum sanction a lo kal hun apiangah VC House te hi sak tur a ni a, tun hnai vajah pawh hian sak mai tur kan nei a; Champhai North bialtu kha i vannei viau mai thei a ni.

SPEAKER : A lawmawm e.

Starred Question No. 144: Nurse lak belh chungchang.

Zawhna Neitu: Pu V. Malsawmtluanga, Lunglei North Bialtu.

PU V. MALSAWMTLUANGA: Pu Speaker, Starred Question No. 144, Health & Family Welfare Department changtu, Minister Pi Lalrinpuii min chhan atan –

- a) Sorkarin damlo enkawltu tur nurse lak belh tumna a nei em?
- b) A neih chuan, engzatnge lak belh a tum?

SPEAKER : Chhang turin Health & Family Welfare Department changtu, Minister Pi Lalrinpuii i lo sawm ang.

PI LALRINPUII, MINISTER: Pu Speaker, ka lawm e. He House zahawm-taka ka member-pui Pu V. Malsawmtluanga, MLA min zawhna ka chhanna chu: -

- a) Damlo enkawltu tur nurse hi lak belh tum mek a ni.
- b) A hnuai tarlan ang hian damlo enkawltu tur nurse te lak tum a ni: -
 - (i) Senior Nursing Officer - 10
 - (ii) Nursing Officer (general) - 40

SPEAKER : Zawhbelhna kan la ang –

1. Pu V. Malsawmtluanga (Zawhna neitu),
2. Pu Lalchhuanthanga,
3. Pu K. Hrahmo,
4. Pu Lalmuanpuia Punte.

PU V. MALSAWMTLUANGA: Pu Speaker, ka zawhbelhna chu - Universal Healthcare Scheme kalpui tumna kawng a kan Chief Minister Speech-a ‘sorkar damdawi-in kan tichangtlung ang’ tih hi, engtia tichangtlun tum nge?

PU LALCHHUANTHANGA: Pu Speaker, zawhbelhna chu -

- i) Kulikawn Damdawi-in sak tum kha engnge a dinhmun? Sum hmuh a ni tawh em?
- ii) CSR atanga lungthalo zaite kha engzatnge an nih?

PU K. HRAHMO : Pu Speaker, kan Health Minister hi Chhimlam MLA 12-te atanga minister kan neihchhun a nih avangin kan duat hle a. Amaherawhchu, kan lakah a kawlh viau mai a. Ka zawhbelhna chu -

- i) Kumin 2025-2026 chhung hian doctor emaw, Specialist emaw a nghet lak tumna Sorkarin a nei em?
- ii) Siaha Civil Hospital-a dah tura tih CT scan a thang rei ta hle mai a. Hei hi engtik nge a lo thlen ang?

PU LALMUANPUIA PUNTE: Pu Speaker, ka zawhbelhna chu - “Sub-Centre, PHC leh CHC building chhe tawh tak tak a tam hle mai a. Heng hi sakthat tumna a awm em?” tih a ni e.

SPEAKER : Lo chhinchhiah hman ang chu maw. Zawhbelhna pali (4) kan la ta a, ka han sawi duh chu, zawhna zawh khan a chawhmeh kha tel vak lo thei se, Member dangte pawhin an zawt ve zel duh a ni tih kha hre tlang ila.

Aw le, a theih ang ang a chhang turin, Health & Family Welfare Minister, Pi Lalrinpuii ilo sawm ang.

PI LALRINPUII, MINISTER: Pu Speaker, ka lawm e. Zawhna neitu Pu V. Malsawmtluanga zawhna hi, Mizoram Universal Health-Care Scheme tihchangtlunna atan hian sawrkar damdawiin te thumthat tum a ni a. Chumi atan chuan casual nurse 300 lak tum a ni a. Lab. technician te, X-Ray technician leh thil chi hrang hrangte lak tum a ni a. Tin, ICU te kan function tir dawn bawk a ni.

Tichuan, Pu Lalchhuanthanga zawhna kha, Kulikawn Damdawi-in atan ₹34.75 crores leh Psychiatry Ward atan hian ₹20.24 crores ruahmanna neih a ni a, concept note heng pahnih atan hian Empower Interministerial Committee (M-DoNER) ah Ni 21 kum 2025 khan submit tawh a. Hei hi approved tawh niin, DPR pawh PWD-in a prepare mek a ni.

A zawhna no. 2 hi, lung zaite kha 34 an ni a, tunah hian an zai chho mek zel a ni. Tin, Pu Hrahmo hi ka duat tehlul nen tikhan min ti mai mai a, chhun chawlh hun chu a chak lo viau ang.

SPEAKER : Khawngaihni, Zawhna leh Chhanna hun a zo a, kan Minister hi kan chhan zawh tir dawn mi niang? (House-in chhan zawh tir a remti a.) Aw le, chhunzawm rawh le.

PI LALRINPUII, MINISTER: Siaha tan CT scan khan kan nghakhlel tawh em em a, keini pawhin. A leina hi kan process-na pawh a rei tawh a, kan hmuhtheih tep tawh kan ring a. Keini chauhin nawr lovin, central lamah an sorkar tlat avangin anni pawhin an lo zu nawr a, min rawn nawr chhawng ve leh a. Chutiang vel chuan kan innawr tawn a, kan peih tep tawh a ni. (**Pu K. Hrahmo:** Pu Speaker, 'Doctor leh Specialists lak tumna a awm em' tih kha?)

A awm e. Tunah hian lak phalna neihsa te pawh kan nei tawh a. Chubakah, tuna Universal Healthcare Scheme kan hman tumna ah pawh hian consulting doctor te pawh a tul ang ang kan la dawn a ni.

Pu Lalmuanpuia zawhna kha, kan ti changtlung dawn a. Hetah hian heng - Ngopa CHC te, Kawlkulh PHC te, Chhuarlung PHC te, Buhban Sub-Centre te, Khuangleng Sub-Centre te, M-Kawnpui Sub-Centre te, Mautlang Sub-Centre te, Tawipui South Sub-centre te, Ralvawng Sub-centre te, Hmunpui Sub-Centre te, Hliappui Sub-Centre te, Maite Sub-Centre te, Siata Sub-Centre te, M-Kawnpui staff quarter te, Mautlang Sub-Centre leh staff quarters te, Tawipui leh Ralvawng staff Suarters te, khang zawng zawngah kha kan sa tha dawn a ni. Ka lawm e, Pu Speaker.

SPEAKER : A bengvarthlak e. Zawhna bakte pawh kan minister khan min hrilh thei a, a lawmawm takzet a ni. Tin kan minister-in, 'an inhawng har deuh' a tih kha, hei, kan hman tangkai chho a, a lawmawm khawp a. Tunah hian NeVA te nen hian safe-

browser ah migrate kan tum a. A chhan chu, single-touch a ni a; member thenkhatte'n page kan lo hawng chiam thin a, kha khan a tibuai ta thin a ni. Chuvangin, keimahni mamawh chin documents te chauh en thei siin, rang zawka a rawn chhuah zung zung theihna tur ngaihtuahna a. Chu chu reiloteah NeVA lam te pawhin an rawn ti puitling turah ngai ila. Chu chu House Information atan ni se.

FINANCIAL BUSINESS

Tunah chuan Financial Business-ah kan kal ang a. Kan Minister zahawm tak pahnih - Pu Vanlalhlana leh Pi Lalrinpuii te demand kan sawiho ang a, pass nghal kan tum dawn a ni. Hun kal ta a kan lo tih thin angin minister pahnihte demand hi a rualin kan dawn a ni.

Tunah Minister zahawm tak Pu Vanlalhlana'n a demand-te rawn submit a, rawn move nghal turin ilo sawm ang.

PU VANLALHLANA, MINISTER: Pu Speaker, ka lawm e. Mizoram Governor recommendation leh I phalnain heng –

<i>Demand No.</i>	<i>Department</i>	<i>Amount in ₹</i>
12	Parliamentary Affairs	1,04,20,000.000
42	Transport	43,45,52,000.000
45	Public Works	6,58,40,75,000.000
TOTAL		7,02,90,47,000.000

kum 2025-26 chhunga ka department chante inrelbawlina atan he House zahawm takah hian ka rawn pharh a. Sawiho turin ka rawn move nghal e. Ka lawm e.

SPEAKER : A lawmawm e. Tunah chuan Minister zahawm tak Pi Lalrinpuii, House-ah a demand te Health & Family Welfare, Social Welfare leh Tourism te submit in, sawiho turin rawn move nghal se. I lo sawm ang u.

PI LALRINPUII, MINISTER: Pu Speaker, Governor of Mizoram recommendation leh I phalna in kum 2025-26 chhunga hman tur atan ka department chan hrang hrang te

<i>Demand No.</i>	<i>Department</i>	<i>Amount in ₹</i>
24	Health & Family Welfare	8,26,06,89,000.000
29	Social Welfare	3,13,40,61,000.000
43	Tourism	11,66,44,000.000
TOTAL		11,51,13,94,000.00

he House zahawm tak dawhkanah hian ka rawn submit a. Sawiho turin ka rawn move nghal e. Ka lawm e.

SPEAKER : A lawmawm e. Kan Minister zahawm takten an demand-te an rawn submit ta a, sawihona kan nei tan ang. A hun atan minute sawm kha tha kan ti leh mai em? (House-in minute 10 a remti a.) Minute sawm kan ti ang a, minute 8-ah warning bell kan rawn a ri ang a. Minute 10-ah chuan khung hram kan tum dawn nia.

Tunge sawi hmasa ang le? Aw le, Member zahawm tak Pu Ramthanmawia ilo sawm ang.

PU RAMTHANMAWIA: Pu Speaker, vawiinah demand pahnih kan Minister zahawm tak - Pu Vanlalhlana leh Pi Lalrinpuii te chan kan han sawiho thei tur hi a lawmawm ka ti khawp mai a. A hmasa in, Lady's first an tih kha maw; Pi Rinpuii chan lamah hian han kal hmasa ila.

Demand No. 24 - Health & Family Welfare Department:

He Deptt. hi nikum aiin crore ₹13,46,71000/- in a tlem tlat mai a; hmalak na tur a tam teh reng nen. Hriselna lam hi a pawimawh a. Kan hrisel loh chuan engmah khawvel ah hian thlakhlelh tur a awm lo a ni. Hetah hian nikum aia a tlemna crore 13 zet a ni hi a pawi ka ti a.

Pu Speaker, Health Minister zahawm tak Pi Rinpuii hnenah hian kan mamawh kan thlente min ngaih pawimawh sak thin avangin kan lawm em em a. Nichin a sawi tak ang khan, Khuangleng Sub-Centre leh staff-quarters te NABARD-RIDF hnuaiyah sak tum a nih thu te kan han hria a, kan lawm tak meuh meuh a.

Tichuan Pu Speaker, kan bial hi bial-hnufual kan ni a, kan harsa a. Sesih ah doctor tha tak min pe a. Amaherawhchu, kan nei a, kan neilo leh a, kan nei leh a, chutiang chuan kan kal a ni. Tunah tak hian kan neilo leh a. Kan Minister zahawm tak hian kan doctor tha tak mai kha training-in kum thum lai a chhuak dawn tih an sawi a, a aiawhtu min pek theih chuan kan lawm khawp ang. Tin, nurse pakhat chauh kan nei a, leave a lakin nurse kan nei ta lo thin a, MLA fund tein kan han ruai nawk-nawk a, tunah hian pakhat chu kan nei a nih chu. Chuangin, tuna nurse kan lak thar turah hian min duhsak kan beisei bawk a ni.

Tin, Pu Speaker, kan bial chhungah hian health-clinic leh Sub-Centre eng emaw zat hi a awm a. Tichuan, sorkar hmasaa clinic centre min sak sak - New Hruaikawn, Thekpui, Chawngtui East, Saikumphai ah te health-workers SEDP sumin min rawih sak bawk a, kan lawm khawp mai a. Naupaite leh damloh harsatna kan tawh hian khami clinic kha kan hman tangkai em em a ni a. Amaherawhchu, New Hruaikawn, Thekpui, Chawngtui East, Saikumphai-A health-clinic kan neih thina kha a awm ta lo a. A building te chu nei mah ila health-worker kan nei ta si lova. Heng harsatna hi Pu Speaker, keini bialah chauh ni lo, Mizoram pum a nih avangin hei hi min ngaih pawimawh sak se tih kha kan ngen duh a.

Nichin khan nurse te, senior nurse te kan lak tur thu sawi a ni a. Champhai-a kan ICU kan khar ringawt mai hi, a chhan ni awma an sawi chu, SEDP suma nurse an rawihte kha ban vek an nih avangin khar a ngai ta a ni. Engpawhnise, tuna nurse lak thar turte hmangin kan ICU hi hawn leh hram nise.

Demand No. 43 - Tourism Department:

Kan minister hian hei mite a ko khawm thin a, bial tan leh ram pum tan thil tha te min sawipui thin a. Keini Champhai District chhungah pawh hmalakna tur tam tak awm-thei te min sawipui a, keini atang te pawhin eng emaw te kan han vawmlut ve a. Hei, sorkar hmasa atanga a thawm ri tawh, Swadesh Darshan 2.0 hnuaiyah tunah hian alo thleng tawh nge? Champhai District ah MLA bial pathum a awm a, bial hnih hian an capture deuh dawn tlat nia hriatna ka nei a. Hei hi a pawi hle mai a, sorkar hmasaa kan lo buaipui ve viau tawh a ni a. Amaherawhchu, Central atangin sanction te a lo kal mai lo a. MLA

pathum-ah pakhat kha min han thlauhthlak nghal ringawt kha chu, khawvel danah pawh hian a rem lo a, chunglam danah pawh a rem lo hrim hrim ka ti a, Pu Speaker. Khualzin hip - tourism attraction tamna ber chu East Tuipui hi a ni. Champhai North leh South ai chuan kan bialah khian khualzin an thahnem zawk em em a ni. Champhai District tiropuitu chu East Tuipui, hmanlai kan pi leh pute'n sulhnu tam tak an lo hnutchhiah mi tam tak hmuh chak, an rawn zir chakte awmna leh Champhai District tih-changtlunna tur ni lova, Champhai North leh South ina an hmang zo mai tur hi chu a dik lo deuhin ka hria. Hei chu ngaihtuah thata siam that a thain ka hria, Pu Speaker.

Demand No. 45 - Public Works Department:

PWD ah hian an budget nikum aia kumin a tlemna hi crore 74,347,000/- a ni daih mai a, a pawh hle mai a. PWD hna hmabak leh an thawh tur hi mipui pawhin kan thlir ber pakhat a ni a. Kawng tha leh thalo mi zawng zawngin kan in tawm a; thil dang erawh chu kan intawm thei vek lo a. Chuvangin, a buaipuitu, a thawktu PWD budget crore 74 zeta a kiam hi chu a pawh ka ti khawp mai.

Pu Speaker, ka bial chhungah hian Congress sorkar lai atanga laih tawh PMGSY-I hnuaiah kawng pahnih tuna laih zawh tawh si, black topping la tih loh a awm a, chungte chu - Khuangleng - Thekpui road leh Mualkawi - Hruaikawn road te a ni a; furah hian kan buai em em mai thin a ni. A bik takin Hruaikawn lam hi kal-ka dang a awm vak lo a, Pi Khuangi Lungdawh atanga peng kha a ni a. MLA fund-in kan han siamna leh ringawt thin a, a daih seng si lo a, chutiang chuan harsatna kan tawh a. Hei hi min ngaihtuahsak leh a ngai a ni. Pu Speaker, Khuangthing lam kawng siamna tur Central-ah min dilpui dawn niin ka hria a, khangah khan Hruaikawn lam pawh hi min theihngilh lo turin ka ngen a ni.

Nimahsela, i thu ka'n awih teh ang vawiin chu, thuawih hi a thain ka hria Pu Speaker. Demand kan sawi takte pahnih kha, Minister zahawm tak takte pahnih Demand kha ka thlawp a, pass pui ngei tha ka ti e. Ka lawm e.

SPEAKER : A lawmawm e. 'I thu ka'n awih te'ng' a ti a, tunhmain ka thu a awih lo tihna a ni chuang lo a nia aw; in lo hre sual palh ang e. Aw le, Member zahawm tak Pu T. Lalhlimpuia ilo sawm ang.

PU T. LALHLIMPUA: Pu Speaker, ka lawm e. Vawiinah hian kan Minister zahawm takte pahnih Pu Vanlalhlana leh Pi Lalrinpui te demand, Department 6 kan sawi dawn a, a lawmawm hle mai. Kei chu a-pa lam deuh atangin ka'n tan ve thung ang a.

Demand No. 45 - Public Works Department:

Mizoram hmasawna hmelhmang tilangtu chu PWD Department hi kan ti theiin ka ring a; Health te, Power te leh thil dang chu vawiinah hian dah tha ta ila. Ram changkang kan tehna leh nuam kan tihna pawh kalkawng-tha a ni lo thei lo a.

Kan Dy. Speaker hi a lo awm leh ta lova. Program neiin a khua ah kan han chho ve zawk a. Vawiina ka'n ngaihtuah let tak chu, Demand No. 45 kan sawi dawn si a, Dy. Speaker hian a ngaihtuah vut-vut ang a, Assembly Dan pawh zah zo lo hian Kolasib kawng sawi tur hian a rawn ding thut te kha ka hlau khawp mai a.

Nikum Session-a department hotute nena kan sawiho danin, a bikin Lunglei District

chhunga Kanhmun - Pukpui inkar work fuh tawk lo, Lung tha lo hman a nih thu te; tin, fur chhunga maintain a nih loh chuan 'chhimlam chaw lakluhna a ping dawn; nuai 360 vel kan mamawh dawn, maintenance atan hian' kan houtute'n an tih te pawh kan ngen a. Chutah chuan, kan PWD Minister te, kan Chief Minister te an bengah vawi tam tak kan tih rik hnuin, sum indaih lohna karah nuai 360 min pe a. Hei, tunah hian kan han hmang chho a, nuaih 360 chu km 80 vel, Pukpui - Kanghmun maintain nan chuan eng tham a ni lova. Tunah hian pavement concrete tlem leh bituminous work zimte kan ti ve mek a. Sekhum - Haulawng kawng bulah a ni a; a bak erawh chu a la ko hle mai a, vawiinah hian kan la sawt bur bur a. Aizawl-Lunglei zin ho pheih chuan, "Lunglei zin chu lir a nghing nasa lutuk a, 'duhsakna sang ber' tih hla kan sa pheih reng mai a ni, an ti" an ti a ni.

Tichuan, vawiinah hian he hnathawh kan sawi lai meka ka rilrua lo lang chu, mizote hi kan gene ah hian a thawk bik thin nge ka hre lova, zu kan in paw'n, ruih ngei ngei kan tum a. Vawiinah hian kawng kan siam chungchangah te pawh sorkar hmasate pawhin theih tawpin an siam a; amaherawhchu, an zawh hmian endik kan han duh tlat hlawn a, engineer aia thiam pawl te hi kan awm a. Hmanni ah pawh Sekhum kawngah PQC siam mek viral video kha a awm leh pek a. Kan han enchiang a, PQC siamna tura layer hmasa ber kha dryline-concrete a ni a; dryline concrete ah chuan tui put thei tura siam a ni a, a mixing pawh 1:15 vel niin ka hria a. Chung chu, ni 7 nghah chhuah tur kha, ni 7 hmian kan lo khawk leh a; chutiang chuan kan ti a.

Vawiina House hmaa ka sawi duh chu, heng kan siam dawn hian mipuite pawhin kan aware ve chu a ngai a. Kan sorkar hmalakna a zawh hma hi chuan ti zung-zung lo turin inbuatsaih ta ila a thain ka hria a. Aizawl khaw chung thenkhatah pawh a then laiah seal-coat an han ti a, chutih karah pawh chuan video te a lo awm leh hman a. Sorkar-hmasa ah khan Aizawl-Lunglei Road leh Kanghmun-Pukpui Road siam pawh an duh tlang vek a, MLA leh department lam pawhin theihtawp an chhuah ve a. Lunglei lam hi Zoram politics ah leh kawng tinrengah hian min piansual tir bik emaw ni, tih tur hi a ni a. Zirna chungchangah te, inkalpawh thu ah te, damdawi lam thu ah pawh a niang chu. A chang chuan ka ngaihtuah thin a, LMC thlengin; laboratory angah te ka inchan ve deuh a nih chu; test-chhinna khawl hi kan ni ringawt deuh hian ka hria a. Airport tur pawh vawi tam tak kan enchhin a, helicopter atangin kan thlir a; sorkar tinin advantage lak tum hian kan ti a, vawiin thleng hian engmah tak tak a ni chuang lova; by-pass road te pawh engmah tak tak a ni chuang lova.

Chuvang chuan, vawiinah hian sawti-lam aiawhin he House ah hian kan PWD leh a changtu kan minister chak takte hian hma min lakpui ka duh em em a. Pianto dik lo Lunglei - Thenzawl (court case awmsa) siam nan crore 23 khan vawiin ni hi kan tlang a ni a; Sorkar hmasaa a hriate sawi dan chuan, road maintenance fund 5054 ah kum 5 chung khan division ten allocation kan nei miah lo an ti a. Sorkar hmasaa a hriate sawi dan chuan, road-maintenance fund-ah 5054 kum 5 chung khan division ten allocation kan nei miah lo an ti a. "PWD-in 5054-a allocation chu, CM hmasain a kutzungpuia a kawh leh, a sawi kha a ni mai. A kawh leh a sawi apiang kha kan thawk mai a ni" an ti a, vawiinah hian ka hriat phak chu a ni lova, dik tak maw.

ZPM-sorkar ah chuan PWD chuan road maintenance dan tur ruahmanna fel tak awm-thei dawnin ka hria a. Priority list te pawh siam niin ka hria a. Chung lamin min hruai vang te pawh a ni mahna, nimin piah mai Question hours ah khan opposition te khak-hlek ngai

khawp khan ka rawn ding tawh a. Bagaratha leh join venture te an terminate-na pawisa, kum 19 chuang pung tlingkhawm kha, PWD hotute thahnemngaihna leh remhriatna a zarah pawisa kan nei thei ta a. Heta pawisa lo hmin hi PWD-a a buaipuitu, thahnemngaihpuite zawng zawngte vawiinah hian eng emaw zat an pension tawh a, a then chu vawiinah kan hmaah an rawn thu thei a. Anmahni avanga sawi thei kan ni a, an chungah lawmthu ka sawi a ni.

He kawng hi 2018 inthlan dawn khan congress sorkarin a bik takin Pukpui - Tlawng road kha concrete-in an rawn ti a, chutah chuan bus te pawh a let nasa a. Amaherawhchu, a kum 6 hnu, nikumah te kha chuan, a kawng keh dan Lunglei ho sawi dan phei chuan, six-pack a ang khawp mai a, concrete keh saw. Chutiang chuan Pukpui - Tlawng kawng chu, 'six-pack road' an ti a ni awm e. Kawng sek tak kha a ni a, a zawhtute pawh an bu laih-laih thin niawm tak a ni. Pu Speaker, hotute duhsaknain thla leh lamah chuan he kawng hi mumal takin kan siam ve dawn ta niin kan hria a, ka lawm hle a ni. Nimah sela, a kawng zawhtu Lunglei leh chhimlam tan kawng tha kan duha, he kawng hi siam a nih dawn chuan, kan tawrh tlan a ngai dawn tih, House hmaah sawi ka duh a. A chang chuan, Hnahthial lamah kal te pawh a ngai turah dah ta ila. Vawiinah ZPM-sorkar a nih avang hian vawileh-khat ah a dum tluk thei dawn lo tih min hriatpui ka duh a.

Tichuan, zawhna, 'Engvangin nge December, 2024 khan in siam loh?' te pawh in ti mai thei. Supreme Court-a thil tang a ni a, December thla khan tihfel chauh a ni a. Kuminah hma lak chauh a nih avangin hei hi thil theih a ni lo. Chutiang chuan, vawiinah Mizoram sorkar chuan crore ₹45/-in a thawhkhat nan Pukpui atangin kan siam thei dawn ta a ni.

Tichuan, NHIDCL lampangte nen pawh vawi tam tak kan sawi thin a; Lunglei lam bypass road kawng hi PWD lamin, 'hma kan la' a ti a; NHIDCL lamin, 'hma kan la' an ti bawk a; hengte pawh hi vawiinah hian min ngaihtuahpui ka duh bawk a. Tin, tunah hian Lunglei khawchhung inkalpawhna eng emaw zat tih-mam mek a ni a. Ka biala veng-tlafual - Sazaikawn, Venghlun, College Veng, Bazar kum rei tak siam tawh loh te pawh kan siam ve mek a; mimahsela, a daih dawn lo hle mai a. Heng kawngte hi chhuk-chho tak tak a nih hlawm avangin lirthei chetsual a hlauhawm hle.

Vawiina demand kan han sawi ruala Budget Bu - Demand for 2025-2026 kan han en hian, mitdelina sai-dap ang deuh kha ka inchan a. Sai pawh kha a thenin bang an ti a, a thenin hrui an ti a. Ka han en hian, Chief Minister's Speech No. 53-ah khan, road fund board-ah a hmain crore 40 anih lai khan, kuminah hian crore 55 dah a ni a, hei hi petrol leh diesel cess kan sawisel fo kha hetah hian a rawn lang ta ni turah ka ngai a. ZPM Sorkar hi kan vannei hlein ka hria; PMGSY-III road siam mek leh IV lokal leh tur nen. Vawiinah hian road maintenance tur, maintenance ngai lovin thil tam tak a awm thei turah kan ngai a; maintenance fund pangngai reng hian thil tam tak tithei turah kan inngai a ni.

Pu Speaker, khal leng-lawngin, chuk duah lovin vawiin chu tih ka rawn tum hrim hrim a, khami chin kha ni mai sela. Demand dang erawh chu kan member-puite sawi turah ka dah mai ang e. Ka lawm e.

SPEAKER : Tunah chuan member zahawm tak Pu Lalrinsanga Ralte ilo sawm ang.

PU LALRINSANGA RALTE: Pu Speaker, ka lawm e. Tlai lamah hian hun hmang dik leh hun hmang diklo top-3 i puang thin si a, hun hmang dik ber nih kan tum phawt mai dawn a ni. Kan Health Minister zahawm tak tak hi MLA- zawng zawngte han huikhawm thiam leh naua nei thiam a ni a; han sawi vak dawnin, a-inthlahrunawmna chin a awm a. Pakhat hi Parliamentary Affairs Minister a ni a, nui ver-ver chung hian a rawn meng rum thin bawk si a, kan sawi tam lutuk lo turah ngai ila a tha awm e.

Demand No. 24 - Health & Family Welfare Department:

Kan minister hi fakna deuh mai ka nei a. MSACS te nen hmannah meeting kan nei a, HIV chungchangah kan ramin harsatna namenlo kan tawh tawh leh, HIV kaite khawtin maiah a hnufual, a harsa zawkte an ni a, an tana damdawi la tura kal a harsat zia sawihona te kan han nei a. Kan Health-minister hian ruahmanna tha tak mai a rawn nei a; “MLA zawng zawngte tun financial year chhunga HIV kan dona turin ₹50,000/- theuh i thawh ang u”, a ti a, lawm takin kan han thawh a. A hmalakna hi kan fak hmasa ber duh a ni.

Tin, Pu Speaker, ZMC hi Mizoram sorkarin kan la ta niin ka hria a, cabinet te pawh khan kan pawm tawh a ni awm a; helai hi enchian deuh a thain kan hria a ni. Pu Speaker, ZMC Society leh Mizoram sorkar hnuaia awmkhawm thinah khan administration thil eng engah emaw harsatna tam tak pawh a thlengin ka ring a. Chuvang chuan, sorkarin a la ta hi lawmawm ka ti a. Chutih rual chuan, a thawktute sorkara kan lak ngheh chungchangah hian ngaihtuahna uluk zawk hmang thei ila ka duh a. Casual-workers, Mizoram-in Covid avanga harsatna nasa tak kan tawh laia lakte an dinhmun hriatpuiin, kan minister hian an tan ruahmanna siam zui sakin, ngaihtuahna min lo sen sak se.

Mahni bialah kan lut ve zawk ang a. Vairengte hi Mizoram CHC ah chuan a lian ber, a lun ber anih ka ring a, kan minister hian data a nei em ka hre lova. Vairengte chu inter-state border-a awm kan ni a, Assam nena kan inkalpawhna hmun pawimawh lai ber a ni. Ramri buai avangin police-ah pawh armed SDPO staff thahnemtak an awm a ni. Chu mai a ni lova, CIGW School te kan nei a. Tin, Vairengte hi Mizoram pumpui atang thil-tha/thalo lam paltlang tam ber a nih avangin, Vairengte CHC hi kan tihchangtlun a ngai hle mai a. MO sanctioned posts pahnih awmah tunah kan nei lova, Medical Officer kan neilo a ni.

Covid lai khan ZMC atangin Dr. Mavena mamawhna avangin kan pawthla a, tuna kan MO post-a awmte thiamna sang zawk zir tura an chhuah avangin, an post a ruak ve ve a. Tuna kan doctor ZMC atanga kan pawthlak hi PMSC-ah a inziak tling a, ani pawh posting siam a nih chuan a chhuak mai dawn a. Chuvang chuan, khawngaih takin CHC lun leh lian ber mai Vairengte-a doctor kan nei lo ngawt mai hi a dik lova, kan minister hian min han hriat sak se a thain ka hria a. Tin, staff nurse pawh 5 chauh kan nei a, an indaihlo khawp mai; sister kan nei lo bawk a. Kha kha min hriatsak thei se kan lawm ngawt ang.

Tin, x-ray khawl kha nikum session-ah pawh ka sawi tawh a, ‘a rawn thlen ve leh special i ni ang’ tih kha a ni a. X-ray khawl hi kan vanduai khawp a; term hmasaah pawh khan vawi duailo ka sawi a, phailam atanga kan dawn tumah te kan dawng hlei theilo nge; hei hi kan nei thei a nih chuan, Vairengte-ah khuan a pawimawh takzet a ni. Kan thenawm state-a inhliam, mizo accident emaw, damdawi-ti te emaw khawlaia lo tlu mai mai hruai chhoh te helai Vairengte-a enkawl kan tam si a, x-ray khawl hi kan mamawh takzet a ni.

Clinic Center ka bialah 9 a awm a, kan hmang tangkai khawp mai a. Ramri depa Assam

nen kan buai laih-laihna Saihapui-V, khang huna min pek te tunah hian a awm ta miah lo mai a. Heng Clinic-center kan neihnate hi a khaw thenawmte nena inkar inhlath ve tak tak; raipuar te leh eng-eng emaw harsatna tam tak nei tam tak awmna a nih avangin, kan sorkar hian min dah sak leh thei ang em?

Tin, Saipum ah NEEPCO-CSR kan han hmu a, term hmasa atang khan building PHC tur hi min han sak sak ve a, a tling chiahlo maithei a len zawng anihna turah pawh. Amaherawhchu, CSR atanga kan building neih ve a khu min thuam chak sak a tunah khuan health and wellness center a ni a Saipum khu. Khumi building hmang tangkai khuan doctor engemaw ber min dah sak theih chuan AYUSH Doctor pawh a bul tanna tur chuan a tha vek turah kan ngai tih kha kan minister khan min hriatsak se a tha awm e.

Demand No. 43 - Tourism Department:

Serlui-B tuikhuah chungchang nimin lama Zawhna leh Chhanna hunah te kan ngaithla tawh a, hei hi kan hman-tangkai thiam a tulin ka hria. Tourism Department minister hian a hmunhma te kal-chilhin min ensak se ka duh a. Chawngkhupa Island te a awm a, a nuam khawp mai a; riahna hmun nuam tak takte, a, tourist lodge te pawh a awm a; water-sports leh eng-eng emaw tih nana hman-tangkai theih hle turah ka ngai a. Hei hi kan minister hian min tlawh sakin ruahmanna min siamsak theih chuan a lawmawm ngawt ang.

Tin, Tourism Department-in MLA-te village adopt tura min tih kan han adopt thliat-thliat a, kei pawhin ka bialah Saiphai ka thlang a. Hei hi department hian engtia hmalak zui nge a tuma, MLA tena ropui taka adopt village-a kan thlante hi engtinng, fund atanga kan chei mai baka hi department lam hian ruahmanna siam a tum em?

Demand No. 45 - Public Works Department:

Hei, four-lane road, ka bialah Vairengte -Rengtekawn inkar compensation lak fel tawh niin ka hria a, eng-eng emaw avanga fel lo pawh a la awm nial maithei a. Helaiah hian four-lane laih vat tulin a lang a. Hetah hian sorkarin eng chen nge a thlenpui tawh; compensation-ah harsatna a la awm em; a la turte'n an la zo tawh em; engtikah nge four-lane road hi kan laih tan ang, tih te kha hriat ka han duh deuh a, kan minister-in min chhan theih chuan a lawmawm ngawt ang.

Tin, sorkar rawn inthlak hma deuh si, sorkar inthlak dawn velah khan SASCI hnuai ah hna kan han thawk laih-laih a, kan bialah pawh. Sorkarna a rawn piang a, kan thawk chhunzawm zel a; sorkar-thar a rawn pian pawhin kan minister ngei pawh January, 2024 khan kan va hmu a. Khulaia hna, 2024 May/June chho vela thawh zawh tawh, wawiiin thlenga bill la lak loh a awm a. A bik takin Saihapui-V phei chu ka bial chhunga SASCI hnaa thawk zo hmasa ber an ni a, kan engineer-te pawhin a hmunah rawn enin completion certificate leh report pawh department-in a pek tawh, CE pawhin a hmunah a rawn hmuh vek a ni a. Amaherawhchu, bill pek zingah a tel lova. PWD E-in-C ah lehkha ka ziaak a, Pu Lalsangliana Chhakchhuak a nih laiin. Hei, chhanna min rawn pe a - hna 11 cheng nuai 697 bawr vela thawh zawh vek tawh si, finance lamin a expenditure sanction an lo pek si loh department in hna an lo thawh zawh tir tawh si a awm a. Hei hi theihtawp chuan hma kan la a; hetiang ho hi rawn submit vek tura tihna Division-ah Ni 5.2.2025 khan E-in-C a thawna copy pawh Pu Speaker, kan PWD Minister pawh ka thawh tawh a, anni pawhin theihtawpin hma min lakpuiin ka hria a.

Kan sawi duh chu, PWD hi kan inenchian a ngaiin ka hria. Thla hmasa daih tawh, Ni 5 ami tawh, chumi hma daiha lo thawn tawh E-in-C office lamin Division ah 'in hnathawh te rawn thawn ula, heng lo thawh zawh tawh te hi lo thawn rawh u' tia thu an chhuah tawh vawiinni thleng mai a an la pelut kim lo hi, PWD hi an in enfiah hle a ngaiin ka hria. E-in-C office atangin instruction a pe a, kan EE ten vawiin thleng pawha finance lama an la thehlut kim thei lo hi chu department thiamloh a niin ka hria. Kan Minister pawh hian E-in-C chu vawi hnih-vawi thum chu min biak sak tawhin ka hria a, vawiinni thlengin a la tih theih loh a ni. Hei hi a theih chuan, a lutkhawm sa lo ngaihven leh lo ngaihtuah deuh tu officer fel leh efficient deuhin an rawn thehluh hi chu kalpui pawp tawh mai a thain ka hria.

Hei Pu Speaker, ka biala North Thinglian hi Assam ramri depa awm a ni a, kan Bru unaute khua a ni a. Thal lai chiahin motor a kal theih a, fur lai hian ke-in kan kal tauh-tauh zel a. Hei hi PMGSY atang hian a tih theih em ka hre lova, a khua a lian lutuk chuang lova; hei hi ruahmanna min neih sak theih chuan, min chhinchhiah sak se ka duh a. Tin, Session hmasa ah ka sawi tawh a, North Hlimen, Serkhan - Bagha Road atanga District Headquarters Kolasib pan turin Serkhan atangin emaw, Bilkhawthlir lam atang emaw kual deuha kal a ngai thin a. He kawng diversion ti tur chuan a vang-tan zawngin North Hlimen atanga Serlui Lui rawn pawh chhuak khan sorkar hmasa ramri kawnga buai velah khan advantage lain kan han lai chhuak a, kan DC ho khan. Kawng tawite a ni a, PWD pawhin min ensak tawhin ka hria a. Hei hi PWD-kawngah min laksaka, min cheibawlsak theih chuan, a tlangdungin Kolasib an dawrna tur hnaite darkar 3-4 an kalna thin kha, darkar 1-ah an thleng ve thei dawn a, hei hi a pawimawh hlein ka hria a, kan department hotute pawhin min chhinchhiah that sak se.

Pu Speaker, a tawp berah chuan, ramri-venhimna tura kawng kan lo laih nual tawh ho kha cheithat a tul hlein ka hria a, Saipum lamah pawh Bamkang tih te a awm a, heng kawng te hi PWD hian min laksak chhunzawma min cheibawlsak a tul hle a, kan ram venhimna atan pawh. Chutiang tur chuan hma min laksak theih chuan a lawmawm ang a.

Tichuan, Pu Speaker, kan Minister-te pahnih - Pu Hlana leh Pi Rinpuii te demand an rawn pharh hi tha ka ti a, ka pawmpui e. Ka lawm e.

SPEAKER : Tunah chuan, member zahawm tak Pu Jeje Lalpekhlua ilo sawm ang.

PU JEJE LALPEKHLUA: Pu Speaker, ka lawm e. Vawiinah kan Minister chhuanawm tak pahnihte - Pu Vanlalhlana leh Pi Lalrinpuii te demand kan sawiho tur hi lawmawm ka ti hle a. Hei kan hriat angin mipui-nawlpuiin kan chhawr ber pawl (ti ila kan sawi sual awm lo e) chanah hian sawi tur tam tak ka bial chhung lam leh a rampum huap ang te pawhin ka nei a.

Demand No. 20 - Health & Family Welfare Department:

A changtu Minister, Pi Lalrinpuii hi a tang bawk a, minister anih hnua a hmalakna hi sawi vek sen pawh a ni dawn lova a chhuanawm ka ti takzet a ni. Mizoram hmun hrang hrangah doctor indaihlohna a nasat em avangin kan Chief Minister leh Health Minister hmalaknain doctor lak thar a ni te hi lawmawm ka ti a. Tin, Health Sub-Centre leh Clinic-a thawktu health-worker awm miah lohna hmunah te dah thar a ni te hi lawmawm ka ti a. Amaherawhchu, ka bial atangin health-worker pahnih min lakchhuah sak kan hriatthiam

rualin, harsatna tam tak kan neih phah a. Mahse, health-worker lak thar tur a ni dawnin ka lo hria a, khangah khan kan bial bik lam te min lo ngaih pawimawh saka, khang Bualpui H leh Aithur lama mite pawh kha min lo dah let sak turin ka ngen nghal duh bawk a.

Tin, Pu Speaker, Mizo mipuite'n sum tam tak senga kidney transplant pawh phaia tih ngai tawh lo turin helai mahni kawt kai - Aizawl Civil Hospital ah ngei kan neih theihna tura kan minister hmalakna hi lawmawm ka ti a. Nimin piah lawkah khan Aizawl Civil Hospital-a hman tur MRI khawl, Civil Hospital kawta inhung rup kan han hmuh te kha, a lawmawm ka ti a, minister hmalakna hi ropui ka ti a ni.

Tin, Pu Speaker, mahni bial - Hnahthial ah hian District Hospital kan nei a, a bak - Thingsai, Cherhlun leh S. Vanlaiphai ah PHC te kan nei a, kan MO leh Staff-te an fel hlawm a, theihtawp an chhuah a. Mipuite pawh kan lawm tlangin, kan hmang-tangkai em em a. Chutihruah chuan, mamawh hrang hrangte sawi vek sen a ni lo a. Pu Speaker, Hnahthial Hospital bikah hian X-ray khawl thar kan nei a, kan lawm em em mai a. Mahse, a building-in a zirloh avangin MLA fund atangin cheithat a ni a. Amaherawhchu, he khawl thar hi tun thlengin kan la hmang thei lova; hemi kawngah hian a changtu minister khan he khawl thar hi mipuite tana hman anih vat theih nan hma min laksak tur in ka ngen a.

Hriselna hi kan ngai pawimawh a; tunhnai atangin Falkawn-ah South Tuipui Khualbuk kan luah a, hei hi kan hmang tangkai khawp mai a, awl lai a awm mang lo a ni. Vawiinniah ka member-puite pawh ti ve turin ka ngen duh che u a ni; in tisial lo ang. Thingtlang atangin harsa tak tak lo kalte sawlaiah awmna hmun pawh nei lova; chutiang hovin mahni-in an lo nei ve te hi a thlamuan thlak a, heng te hi ti ve ngei turin kan ngen duh bawk cheu a.

Nikum October thla khan Indian Medical Association te, Mizoram Government Doctors' Association te leh Indian Dental Association teho khan Hnahthial-ah Multi-Special Clinic min rawn buatsaihsak a, he hunah hian Doctor 48 leh anmahni pui tur mi 20 rual rawn kalin, damlo mi 2300 chuang an en a, an damdawi man pawh MLA fund atangin a thlawna dawn turin kan lo tih sak a. Tin, Eye-Care Hospital ten thla hmasa, February Ni 19 - 20 khan Hnahthial Hospital ah a thlawna inentirna hun Special Eye-care kan buatsaih a, inentir mi 250 awmin, mit zai ngai mi 41 te zaisak nghal an ni a, hei pawh hi MLA fund atanga a senso te tum a ni a. Pu Speaker, i remtihain, Indian Medical Association te, Mizoram Government Doctors' Association te, Indian Dental Association te leh Eye Care Hospital, Aizawl te chungah House kaltlang hian lawmthu ka sawi duh a. Tin, tun hnai ah kan bial chhungah pek tur bengdar te pawh kan buaipui mek a, pekchhuah theih a ni tep tawh tih te pawh House kaltlang hian kan sawi duh bawk a.

Demand No. 29 - Social Welfare Department:

Kan Minister chhuanawm tak hmalaknain June, 2024 khan Child-Protection Service hnuaiah Home pathum – Betrapha Boys Home, Gardenial Girls' Home leh Observation Home te Hnahthial-ah din thar a ni a. Tin, Child Care Institution tuna awm mek, naupang zawng zawngte Mizoram Healthcare hnuaiah ziah luh vek a ni bawk a. Heng kan Home pathumte hi bultanna chauh anih avangin, tunah hian mi inluaha awm ve nawk-nawk kan ni a. Nakinah chuan ram leh Home building sakna tur pawh hi la mamawh zel turte pawh a ni a; khawvel awm chhung chuan heng naupangte awm theihna tur Home hi kan la mamawh zel dawn avangin, heng tihchangtlun lamah te a changtu minister hian min lo hriat sak turin ka ngen duh bawk a.

Tin, Pu Speaker, tuna ka sawi tur hi ka ngaihpawimawh zinga tel, kan bial chhung mai pawh ni lo, bial pawn atanga phone call kan dawn tam berte zinga mi a ni a. Ka sawi duh chu - pianphunga mi pha chiah lo, 'rual-banlo' kan tih te hian kawng hrang hrangah sorkar atangin hamthatna an dawng ve thin a, chutiang an dawn theihna tur chuan certificate neih a lo ngai ve thin a. Hamthatna hrang hrang a tam ve thin avangin, certificate siam kawngah hian fimkhur hi a ngai em em a, specialist-doctor tena an endik vek hnu ah certificate pek chhuah tur a ni a. Hemi kawngah hian thingtlang hmun hrang hrang doctor awm ve lohna hmun te, a bikin pianphunga rual-banlote, motor chuanpui theih loh te, a then chu zinpui theih loh tam tak an awm a. Hetiang kawngah hian a changtu minister khan an tan bik liau-liau hian hetiang lama thiam bik kan neihte'n thingtlang kilkhawr zawka kan rual-banlo zin ve theih lote'n certificate an neih theihna tura hma min laksak turin kan ngen duh a. Tin, hetiang lama hma lo lakna te a awm tawh em, tih kha wind-up hunah min hrih theih chuan a lawmawm hle ang.

Demand 43 - Tourism Department:

Kum 2018 khan Tourism Department ah Ambassador ka lo ni ve tawh a, Tourism Department hi Mizoram hnamdang zinga min phochhuaktu tha tak niin ka hria a. Social media kan hman nasa em em a, department-te pawhin social media ah page hrang hrang kan nei a. He House zahawm tak kaltlang hian mipuite pawhin lo follow-a, kan ram mawina te, an neih-hlut rohlu, kan pi leh pu sulhnute pawh hnamdang hriata pholan hi kan mawhphurhna a ni tih kan hriat thar a tulin ka hria a ni.

Tin, kan hmun hlu, kan rohlu, kan pi leh pute sulhnu kan neih te hi a vawnhim kawngah Session hmasa pawh khan Pu Speaker, ka sawi tawh a, ka ngai pawimawh a. Hemi kawngah hian mipuite hian kan mawhphurhna a ni tih hria a, heng kan rohlu neihte pawh a pholan, a tihdarh, a puanzar leh a vawnhim kawngah te hian, 'theihtawp i chhuah tlang zel ang u' tiin, he House zahawm tak kaltlangin Pu Speaker ka thalaipui leh Mizoram mipuite ka chah duh a ni.

Tin, Tourism lamah hian, Hnahthial hi kan vannei khawp mai a, hmun nuam leh mawi tak tak tlawh tur kan nei a. South Chawngtui-a Khawhthla-sang te, Tuipui D Sa-humhalhna te, Lungpuitlang-ah Phunhnawma Lung te, Khawhri Park te, Darzotlang leh hmun hrang hrang kan nei a. Pu Speaker, he House zahawm tak kaltlang hian kan bial chhung khaw hrang hrang tlawh tur hian Mizo-mipuite ka sawmin, ka ngen nghal duh a.

Demand No. 45 - Public Works Department:

A changtu minister chhuanawm tak Pu Vanlalhlana leh kan Chief Minister te hmalakna hrang hrangah kawng siamthat hna thawh mek zel a ni a, Aizawl chhung kawng chhe takte pawh hmalak zel a ni a. An kawng siamte pawh kan minister hian a vil ngun bawk a; tunhmaa an lo siam tawh thin dan nen chuan (kan tlan thin a, nitinin) a inthlau viauin kan hria a, Aizawl mipuite pawh kan lawm tlang niin ka hria a.

Tin, Pu Speaker, kan Minister Pu Vanlalhlana hmalaknain PWD-Hnahthial Division-a thu ni lo, a taka min tihhlawhtlin sak avangin lawmthu ka sawi duh a. Amaherawhchu, tunah hian Sub-Division pakhat awm sa bakah Sub-Division hawn belh a nih avangin officer leh staff-quarters mamawh-belhna a sang khawp mai a. Tuna PWD Complex awm sa ah hian Circuit House sak mek a ni a. PWD hian ram an neih sa ah hian PWD Division Office leh staff-quarters te sakna tur hmun hma hi, a hmun hma hian a zawh tawh loh avangin sorkar

hian staff-quarters sakna tur hmun dang remchang zawk min ngaihtuhsak turin ka ngen nghal bawk a.

Tin, Pu Speaker, tunah hian Hnahthial District chhung khawthlang lampang inkalpawhna Mat Lui-ah lei dawh mek a ni a, he lei-dawh hi Lunglei North bialtu MLA Pu V. Malsawmtluanga bial leh ka bial inkalpawhna tur a ni a. Hun remchang hmasa berah kan pahnih hian tlawh te kan tum a. Amaherawhchu, he House zahawm tak kaltlang hian a changtu minister zahawm tak pawh ka ngen a, ama ho ngeia sawilai hmun te pawh min hmuhpui turin ka sawm nghal duh bawk a.

Demand No. 42 - Transport Department:

A tawp berah chuan, a changtu minister zahawm tak Pu Vanlalhlana hmalaknain Hnahthial, Saitual leh Khawzawl-ah te office a awm tur hi a lawmawm hlein ka hria a. Department lam hotute pawh khan kar hmasa lawk khan Hnahthial hmun te pawh min lo enpui a, a lawmawm hle a; mipuite pawh kan lawm tlang a, kan phur tlang bawk a. Tin, Transport Department hi ‘Sorkar sum ei-raltu department’ tih kha kan lo hriat thin dan a ni a. Tunah chuan kan minister leh a department hotute hmalakna azarah major earning-department an lo ni ve thei ta hi. ropui ka ti hle a ni.

Pu Speaker, a tawp berah chuan, kan minister-te pahnih - Pu Vanlalhlana leh Pi Lalrinpuii te demand hi ka pawmpui a, House ah hian pass ni se tha ka ti e. Ka lawm e.

SPEAKER : Khai le, tunge sawi leh ang le? Member zahawm tak Pi Prova ilo sawm ang.

PI PROVA CHAKMA: Pu Speaker, ka lawm e. Hei vawiinah Demand kan Minister zahawm tak pahnihte’n an rawn putlul hi a pawimawh hle hlawm a, sawihona tha tak kan han nei leh hi a lawmawm tak zet a ni.

Demand No. 45 - Public Works Department:

Public Works changtu kan CM zahawm takin min rawn chhanna ah khan, kan bial hian kawng chhia kan tawk reng a, kawng tha neih ve te a chakawm khawp mai a; ‘Kawng tha kan siamsak ang che u’ tih a ni a, a lawmawm khawp mai. Amaherawhchu, nikumah te pawh khatiang tho khan chhanna kan hmu a, tunthlengin hetiang dinhmunah hian kan la ding a. Amaherawhchu, kuminah chuan a tak taka ti turah ngai ila.

Public Works Deptt-a Road maintenance Unstarred Question chhannaah hian, Tlabung road maintenance fund atan ₹71.28 lakhs, Action Plan atan 52.82 lakhs tih te ka lo hmu a, mahse hman tawh a ni bawk si a. Ka bial chhung hi ka vil ngun bawk a, chutiang hmanna awm hi ka hmu lo a. Hei hi an hmang dawn chauh nge, tih kan minister zahawm takin, nangmah kaltlangin min han hrilhfiah se ka duh a.

Fur a lo thleng ang a, fur thlen hmian all-weather road hi neih ve a chakawm hle mai a. Tlabung - Borapansuri Road pawh hi furah damlo nau neite damdawi-in tura rawn kal te a hmun ah kawng that loh a vangin an thihphah hial a ni, khatiang dinhmun hi tunthleng hian kan la ni a. Tunah hian Tlabung - Borapansuri road maintenance hi CPWD kut a ni a, amarawhchu, a nodal Agency kan PWD a nih a vangin, hei hi min lo chhinchhiah sak se, kawng siam dawnah hei hi min ngaihpawimawh sak se ka duh khawp mai.

Kan bialah PMGSY Road sorkar hmasain an siam te kha tunah chuan under-maintenance a la ni tho a, 2029 thleng khan, mahse, maintenance a awm lo a; fur rawn thlen hmaa maintain anih loh chuan ruahtui leh tuihawkin a tichhe zual dawn a ni. Chuvangin, ruahtui tlak hma ngeia min siamsak, Pu Speaker, nangmah kaltlangin ka ngen duh a ni.

Tunah hian ka bial chhungah kawng tlang lo khaw tam tak kan la nei a ni. Entiran: ka bial Sadailui - Hmundo te kea kal ngai chi ang te hi hma min laksak theih chuan a lawmawm ngawt ang. Fur a rawn thlen chuan kawng that loh avangin keini chuan boat kan hman te ngai leh dawn a, lei kaina tur ‘maji’ kan tih te tunhma chuan PWD in an lo chhawr thin a, lawng te pawh an leisak thin a. Tunah hian khang kha an awm tawh si lova, khawngaihin min ngaihtuahsak leh thei se. A bik takin heng route Kawrpuichhuah - Nunsury, Tlabung Nunsury-I, Matisura leh Belpui inkar, Tlabung - Dinthar, Diblibagh - Sugorbasora, Samuksury - Ugdosury te hi lawng lo chuan kan kal thei lo a ni. Chunvangin, maji hi MR in emaw min dahsak theih chuan a lawmawm ngawt ang.

Tin, All Weather Road neih ve hi a chakawm khawp mai a, kan CM hian min han ngaihpaawimawh sak sela. Tichuan, PMGSY road-ah hian Tlabung - Nunsury-1 a parapet te a chhe tawh khawp mai a, naupang nawr pawh dawl zo tawh lo khawpin a chhe tawh a. Hengte hi a contractor siam nge, sub-contractor ka hre lo a, khang te kha uluk deuhin min han vilpui se ka duh khawp mai.

Tichuan, tuna burning issue ber, NH302 Lunglei - Tlabung Road ah hian hmanni lawkah khan road-accident a awm a, khang te kha monitoring committee lamin min han vilpui thei sela chuan a tha leh zual ang a.

Demand No. 20 - Health & Family Welfare Department:

Health & Family Welfare hi chu tupawhin kan mamawh a, mahse, staff kan indaihlona a nasa hle a. A hma pawhin ka rawn ziak tawh a - X-ray khawl kumtir atanga min tiam tawh kha hmuh hlan kan nghakhlel hle a ni.

Chutih laiin thil lawmawm tak sawi duh ka neih chu, hospital kan neihchhun tunah sak mek a ni a. Hetah hian hriatchian duh ka neih chu, kan neih mek hi 30-bedded hospital a ni a, hei hi 10-bedded tura sak a ni awmin an sawi a. Hetiang anih chuan Pu Speaker, kan indaihllo hle dawn a ni tih kha ka han sawilang ve duh hrim hrim a ni.

Tin, vanduaithlak takin hmanni lawkah ka biala doctor pawh sawnchhuah zingah a tel ve a. kan bial mipuite’n, ‘E! Madam, doctor kan neih ve chhun tianga min sawnchhuah sak leh hi a va paw em! Pakhat chiah kan nei si a, kan va buai dawn ve’, an ti a ni. A hnua kan minister zahawm tak nen kan inbiak khan, kan lo dahlet leh dawn nia’ tiin, a lo dahlet leh nghe nghe a, a chungah lawmthu te pawh ka sawi duh a.

Demand No. 43 - Tourism Department:

Pu RS-a sawi ang khan, hming te kha adopted village turin kan han pe ve a, depts. lam atangin engemaw, a cheimawina te kan hmu dawn emaw kan ti a; mahse engmah a la thleng lova. UD&PA lamah khan keini ni bialah chuan Tlabung hi adopted-village ah hian ka thlang a. Ka thlan chhan pawh – Tlabung hi khaw upa tak, a kum 150-na pawh hman tawh a ni a. Tin, Dak-in hmasa ber awmna a ni bawk a; Inspection Bungalow kum 1871-a din kha a la awm a; Police Station Thana 1889-a din pawh tun thlengin kan la nei a;

Tlabung Hospital kum 1872-a din kha tunah pawh hian kan la nei a. Tin, Tlabung hi sumdawna hmunpui a la ni dawn a. Heng avangte hian Tourism Deptt. hian Tlabung area tihchangtlunna lamah hian hma min laksak ve se; tourist-te hip nan tlema han chei that ve a ngai hlein ka hria a ni. Tlabung hian Mizoram-ah hmasa ber nihna 5 laia hauh ve a nih avangin, Pu Speaker, nangma kaltlangin Tourism Department leh a changtu minister zahawm tak pawh ka ngen bawka ni.

Demand No. 29 - Social Welfare Department:

Kan Minister hmalakna ruang-phurh hian keini MLA-te phurrit min chhawk nasa hle a. Amaherawhchu, water transport lama ruang-phurhna a tel ve lova. Keini biala khaw tam tak lawnga kal ngai chi an awm a, khang te kha min han chhinchhiahsak bawka se.

Tin, old-aged pension tihpun kha lawmawm ka ti hle mai a. Chutih laiin, keini bial atanga a thar thehluh tumahin an la hmu hi engnge a chhan ka hre duh bawka a. Tin, Anganwadi Centre te hi hmun dangah chuan an sa nual a, keini bial hi kan lang lo leh thin a. Hei hi engnge ni a chhan tih kha Pu Speaker, nangma kaltlangin ka zawt duh bawka ni.

Tichuan, kan Minister zahawm takte pahnih Demand No. 12, 42, 45 leh, Demand No. 24, 29 leh 43 te hi ka pawmpuiin, ka thlawp a. Keini bial hi min theihngihl lo turin ka ngen duh bawka ni. Ka lawm e.

SPEAKER : A lawmawm e. Member zahawmtak Pu Lalrintluanga Sailo ilo sawm ang.

PU LALRINTLUANGA SAILO: Pu Speaker, ka lawm e. Vawiin demand-ah hian thil anih dan taka han sawi ka duh a; nichina Pu Papuaia fiamthu ang deuh khan, hmeichhe lam atanga han tan ka duh a ni.

Demand No. 24, Health & Family Welfare Department:

A hmasain, (advise nge, sawmna ka hre lova) ka bialah sorkar hmasa khan PHC building tha tak pahnih Reiek leh Marpara-ah kan sa a, a building luah a ni tawh a. Hei hi, kan Minister hian a hun-awlah leh remchangah official taka min hawnsak ka beisei a; min lo chhinchhiah sak sela ka duh khawp mai. Chutihruah chuan, heng building thar sakah te hian x-ray khawl kan mamawh hle a, a khawl dahna tur room pawh buatsaih a ni a. Tin, West Phaileng PHC pawh hi a rei pawl tak a ni ang a, a cover-area pawh a zau a. Sorkar hmasa khan chawpchilh deuhin PHC atangin CHC-ah min han puansak a, kan lawm viau a; mahse hma la zui hman lovin kan tla ta a ni a. Tunah hian hei hi sorkar hian a la kalpui nge, tih kha nakin wind up hunah min chhang thei sela. He x-ray khawl kan neih hi Covid avangin technician kan la hlei thei lova, khawl tha tak khu kan dah ringawt mai a, a buaithlak khawp mai.

Tin, Marpara North PHC awmna hi mizo-veng a ni a. Chutah chuan, health sub-centre kha PHC building kawtah khan dah a; a hmang tangkai tur zawka kha chu chakma people lam an ni a. A khua kha km 5 vel daiha awm a ni a, hman-tangkai miah loh a ni. Chuvangin, chakma lam mihring cheng 3000 awmnaah hian PHC hi min dahsak se ka duh a, hei hi ka ngai pawimawh khawp mai a. Chutih rual chuan, Member zahawm tak takte sawi tak ang khan, sorkar hmasain chawpchilh deuh taka clinic min han hawnsak, keipawhin ka fund-a ka han sak te a awm nual a, hei min ensak se ka duh a. Tin, chakma area bik-ah male-

health worker kan nei nual mai a, ka hnunga thu pawhin a hriain ka ring a. Chakma hmeichhiate hian Health Sub-Centre-a mipa health-worker te hnenah hian an inentir tha duh lo khawp mai a, nau laka thi leh nau-thi pawh an tam a ni. Chuvang chuan, a theih hram chuan, male leh female min pe thei ula kan duh khawp mai. A chhan chu, ram pum literacy percentage-ah te leh health-ah te pawh uluk taka kan en chuan, keini bial hi kan Mizoram percentage pawt hniamtu a ni zel a ni tih lai hi, he House zahawm takah hian Pu Speaker ka ngaipawimawh khawp a ni.

Demand No. 45 - Public Works Department:

Nichina Member zahawm tak Pu Ramthanmawia zawhnaah khan tarlan a ni a. Khatah khan, a bik takin ka bial hming kha Pu Speaker, Minister zahawm tak PWD changtu khan NESIDS fund atanga kawng laih tur anih thu a rawn tarlang a; hei hi tlemin ka confuse deuh a ni. Hei hi, NESIDS atang hian Pukzing - Silsury, km 18 kha crore 109 khan kan cover turah ka lo inngai a; kha kha a detail deuhin min hrilh thei se ka duh khawp mai a. Chutihruah chuan, motor kawngin a la pawh mumal loh Lianbuang Khua village council hran nei, Marapara North atanga km 18 vela hla a ni a. Chu chu, border fencing road an laih hian approach road-ah an hmang a, a fencing hmun ava thlen hma deuh hlek khan. A grading pawh a tha viau mai a, ka fund atangin kumtin, kum 5-6 chhung chu ka siam ringawt mai a. Hei hi kan Minister zahawm takin min lo chhinchhiah sak turin ka ngen a, Pu Speaker.

Demand No. 42 - Transport Department:

Inland water-way project hnuaiah Silsury-Tlabung hi sorkar hmasa hun atanga hmalak tawh a ni a, vawiin thlengin a tak kan la hmu lova. Hei hi engnge a dinhmun, wine up hunah Pu Speaker kan minister hian min tarlan sak se. Tin, hei bakah hian, kan bial lam hi tlemin kan la backward deuh a; night bus service te hi hi siamsak theih a ni em? Sorkarin a tlin lo deuh anih pawhin private-in night bus permit te hi min pe thei em? Tunah kawng buatsaih that chhoh mek a ni a, khulamah khuan thlai thar tam tak entirnan: Aizawl nuho-in bean kg ah 120/-a an neih laiin, ka bial chhungah chuanin kg-ah 20/- a ni a; kg 2 lei chuan 30/-, khati vel kha a ni. Maite pawh pum 4-5 lek 100/-a in lei laiin, pum khat 10/- a ni mai a. Night Bus te kan nei thei anih chuan, fresh takin kan thlai tharte pawh a thleng thei ang dawn a ni.

Demand No. 29 - Social Welfare Department:

Kan minister hi a hmel a that ang hian a ze deuh nge ni, tumah la rawt ngai loh sorkarna an chelha, he department a lak atangin kumtluana kan harsatna mitthi ruang phurhna tur min han solved sak hi lawmawm ka ti hle a. Amaherawhchu, (member zahawm tak West Tuipui bialtu sawi ang khan) kan bial hi a bik takin transportation rate a hi siam mahsela, hemi water-way lamah hian kan mamawhna hi min hriatsak se ka duh a; hmanni ah pawh ka sawi lang tawh nghe nghe a.

Tin, Social Welfare hi ama chan deuh niin ka hria a; ruihhlo-ngai kan buaipui zia Pu Speaker, kan Sports minister pawhin an sawi a; an bial chhung atangin an um darh a, hetah member zahawm tak Pu Chhuana bial lamah kan um khawm a ni a. Helai ah hian, ruihhlo-ngaite enkawlina sorkar hmasain changtlung taka a lo siam Sethawn-a awm hi a hman tangkai theih lawm ni? Tunah hian sorkarin out-source a tum a, nimahsela chhang thei an awm lo niin ka hria a. Hei hi tih takzeta kan buatsaih thar a tha mang e.

Demand No. 12 - Parliamentary Affairs Department:

Hei hi member-te pawhin kan hre chiang lo mai thei a. He kan Assembly session zawng zawng min buatsaihsaktu Parliamentary Affairs Department hmalakna hi a ropui hle thin a. A enkawltute hi an tlem khawp mai a. Staff indaih-lohna hi Pu Speaker, a in-charge minister bakah nangmah ngei pawhin min en chhonzawm-pui hi thain ka hria a. Hetah hian mi pakhat chauh hlawh pek niin ka hria a; Govt. Deputy Chief Whip-ah hian inenkawlna tur tak ngial pawh kan nei lo a ni, term hmasaah khan. Kum 5 chhung ka thu a, a buaithlak zia chu; emergency-a damdawiin kalna bill tur tak ngial pawh a rei em em mai a, sum kha kan dah tlem deuhin ka hria. Vawiinah erawh chuan minister chak tak kan nei a, ani hian min enkawl chhonzawm that sak sela, a staff thleng hian. Mamawh sawi ve ngai lo department an ni a; a chhan chu, an inthlahrung thin a ni. An thawhrim zia te kan hriatin duhsak tlak an ni tih ka sawi duh a.

Demand No. 43- Tourism Department:

Hei, ka bialah hian kum tinin sorkar hmasa, hmasa leh, a hmasa leh atang tawhin Anthurium Festival hman a ni thin a; he Sorkar hian kan la buatsaih lovin ka hria a. Tourism lamah pawh hei hi kan potential neih that te a ni a; ramdang atanga lo kal pawhin helai hmun hi an ngaih pawimawh thin avangin buatsaih leh dan a awm em, kumin chhung hian?

Aw le, Pu Speaker chung chu he kan minster zahawm tak tak pahnihte demand-a ka sawi ni se; heng minister pahnihte demand hi ka thlawp thu ka'n tarlang a ni e. Ka lawm e.

SPEAKER : A lawmawm e. Member zahawm tak Pu Lalramliana Papua ilo sawm ang.

PU LALRAMLIANA PAPUIA: Pu Speaker, kan Minister hmeichhe lam atangin an tan deuh zel a, kei pawhim kan senior zawkte tih dan deuh anih avangin, a turah ngaiin kan tan ve leh ngawt mai ang e.

Demand No. 29 - Social Welfare Department :

Ruang phurh chungchangah a mawmawh ber bialte zing ami kan nih avangin, kan sorkar hmalakna hnuaiyah kan minister hian chak tak maia a han umzui a, ruang phurh tihhlawhtlin a ni ta hi ka lawm em em mai a, kan Minister pawh lawmthu kan hrilh duh a ni. Tin, ruang-phurh chungchanga kan ngaihthlak tak ang khan, bial inang lo tak takte kan ni a, kan thian thenkhat, kan MLA-pui bial thenkhatte phei chu motor luh theih lohna, lawnga phurh ngai te a nih avangin 'lawng-a inphurhna rate tur pawh kan mamawh a ni' tia sawite pawh an awm a. Keini bial phei chu motor pawh lut lo, lawng pawh luh lohna khua te kan la nei a, khangah te phei chuan a zawna zawn rate tur te pawh khan kan mamawh ve leh zel mai thei a; nimahsela, a tih chi kher loh mai thei a. Chutiang deuh chuan, tuna ruahmanna awmsa chin hi a felfai tawk viauin ka hria a ni. A zawna zawn rate han demand leh zel kha chu a ni em emin ka hre tawh lo deuh hlek a.

Tin, hei kan bial hi chekhnawk te te kan nih ve avangin leh, hnamtin-chitin awmna kan ni a. Kan unaute Chakma an awm a, Bru an awm a; Pang leh Bawm ang chi deuh te pawh kan awm a, Mizo kan awm bawk a; khatiang kan nih ve hlawm avangin enkawl hi kan ngai em em mai a. Social Welfare leh Tribal Affairs lam atang pawh hian Aspirational Block Lungsen Block hnuaiyah khaw eng emaw zat - Zehtet, Sailen, Ruallung, Lungrang, Chawngte te kan nei nghe nghe a. Chuvang chuan, department hotute leh kan minister

pawhin khulai focus deuhin, development awm thei ah pawh min ngaihsak a tul hlein ka hria a. Department lamah pawh tun kum kal mekah pawh heng hnamtin-chitin awmte hian ‘joint-cultural festival kan neih ve a ngai a ni, min ngaihtuahpui teh u’ ka ti a, mahse a hlawhtlinna ka hmu lem lova. Hengte pawh hi a pawimawhin ka hria a; khatiang hawi zawng te pawh khan kawng awm thei min dappui kan mamawh khawp mai.

Tin, Social Welfare-ah hian ka’n sawilan leh duh pakhat chu, UDI (Unique Disability Identification) card te kan pe a, pianphunga rual-banlote hamthatna kawng hrang hrangte pawh ruahman sak a ni ve thin a. Ka rilrua thil ka ngaih pawimawh ve deuh chu, (ka Chiang Chiah Lova) ‘phungzawl’ kan tih ang chi te hi disabled han tih dawna ni chiah si lo, mahse medically pawha mi pangngai pha lo ang chi hi hetiang card hnuai ah hian rinluh vea, hamthatna-ruahmanna siam sak ve thei a ni ang em le, tih hi ka ngaihtuahnaah a awm a. Kan bial chhungah hian kan nei ve nual a, heng mite hi engtingge ruahmanna han siamsak dan te a awm em; kan minister hian, ‘kawng te a awm thei em’ tih te min react theih chuan.

Demand No. 24 - Health & Family Welfare Department:

Hetah hian tlema zawng han sawi tur leh lawmthu sawina tur pawh tam tak ka nei a. Kan Minister hian kan bial min ngaihsak a. MLA ka nihna zawnah ka bial chhung thil ka thlen tawh hi chuan, a theih loh bur a nih loh chuan min ngaihtuah sak hram hram thin a. Chuvangin, he House kaltlang hian lawmthu ka sawi leh hmasa duh a. Chumi piah lamah, ngaihsak bik ngai kan nihna te pawh min hriatsak a, kan bial hi kan chekhawk ve em avangin. Sawi tak ang khan, keini ang thingtlang-bial khaw ngah tan chuan penhleleh tak taka awm khua eng emaw zat nei kan ni a. A then chu motor leh lawng pawha luh theih loh, kea kal ngaita a ni a; a then chu fur-ruahtui a tlak tawh chuan tlawh tum loh law-law, khua ro leh hunah JCB-a kan clear leh hun ngah phawt ngai ang khaw eng emaw zat nei kan ni.

Chuvang chuan, heng kan khaw thenkhata health facilities kan neih - health sub-centre-a thawktute khaw danga an awm tha lo deuh anih pawhin hetiang khua, remote village angha te chuan ngei ngeia thawktute hi an awm a ngai a ni. A hmanrua - basic equipment kan mamawh ang chite pawh hi kan provide ve a ngai a ni. Entiran: Mualthuam South, Sailen, Buknuam, Zehtet, Pangper te, Thangte leh Mualcheng - kawngpui dung zui chiah lo khua eng emaw zat kan nei a, hengte hi min lo hriatsak sela, khawngaih takin. Tunah pawh hian thawktu health-worker neih lohna khaw pahnih-pathum kan nei a, a tul leh nakinah ziaik te pawhin kan la inhrilh leh ang a. Heng khua penhleleh deuh angha te hi chuan thawktu an awm ngei ngei a ngai a. Tun kum kal ta niin ka hria, kei pawh MLA fund atangin ka vei ve em avangin health sub-center a an mamawh bulpui tur - BP check-na, thisen check-na, naute bukna leh stethoscope te ka lei a, khatiang khaw penhleleh deuh kalpawh har si, dam loh nikhuaah pawh lo tlan zung zung harsaah khan kan sem a, an lawmin an hmang tangkai khawp mai a. Mahse, tih reng theih a ni bik lova, khang kan tih pawh khan an mamawh zawng zawng ala puhru zo lova. An thisen test tur han dah thatna - refrigerator te pawh tihsak thei ila chuan, tul em em engemaw zat a awm a ni. Ka kal nikhuaa min hrilh ziah, ka la tihsak theih loh tam tak a la awm a, department atangin khatiang bik khaw penhleleh leh zual ngaihsak ngai bik deuh te kha min lo chhinchhiah sak thei se la, min ngaihtuah sak thei se la ka duh hle mai.

Tin, Lunglei Civil Hospital te kan minister-in min tihchangtlunsak chho zel a, kan lawm em em a; thawktute pawh min lakbelh sak zel a, kan lawm a. Chutih lain, tualchhunga mamawhtute’n MLA kan nih ve takah chuan kan hnenah an thlen fo thin pakhat chu -

zunthlum doctor hi kan nei lo emaw ni; Sawlaih kan thian leh kan thawhpui thenkhat zunthlum vei deuhthe pawh 'Aizawl ah check-up a ka kal leh tawh a ngai; doctor appointment tih a ngai' tia Aizawl lam rawn tlan pheih ngai deuh reng hi an ni mai a, hetiang lama rinrawl tur ang te kan lo neilo tak tak a nih chuan, min ngaihtuhsak ran deuh a tul awm mang e aw, tih te Lunglei khaw mipui tan pawh ka'n sawi duh a ni. Kawng tam takah min tihchangtlun chhoh sak zel te kan lawm em em a ni.

Tin, 'damdawi-in tihchangtlun' tih te kha kan minister leh kan CM te beiseinain kan lo thlir zel a. Chuti ruala ka rilrua lo lang pakhat chu, mirethei te-te hautak avanga private hospital-ah pawh lut thei lo, sorkar damdawi-in ah lo chuan tihngaihna awm lo tam tak an awm a ni. Chungte pawhin ka beng hriata an sawi fo thin chu, 'sorkar damdawi-in pawh ni se, engkim lei ngai vek a ni si a' tih hi a ni fo thin a ni. Tun hma kan naupanlai deuh laia thingtlang kan awm lai te pawh khan, eng eng emaw damdawi mamawh bulpui ang chi kha chu damdawi-ina sorkar-ruahmanna hnuaiia dawn theih, hman theih te kha a awm ve thin a ni. Khangte kha tunlaih hian a awm ta ngai lo nge, nachhawka, bandage leh plaster neuh neuhthe bakah drip han khai tur mamawh-tlanglawn deuh ang te kha; khang kan mamawh bulpui ang, mirethei, thingtlang lam atanga damdawi-in rawn lutte pawhin a thlawna an lo dawn ve theih tur ang chite hi chu, a hmanrua leh thawktu kan tihchangtlun rual hian a damdawi pawh engemaw zat hi chu kan intihchangtlun a ngai awm mang e, tih te ka rilruah, mipui tawngka ka hriat atanga ngaihtuahna ka nei ve fo thin a ni a.

Demand No. 45 – Public Works Department:

Session hma lama ka sawi tawh ang khan, lawmthu sawina tur tam tak min siamsak a. Vaisam Road kawng laih, Vaisam khaw thleng lo tur pawh ka ngenna min hriatsak a, tunah chuan deviation siamin Vaisam min laih thlen sak dawn ta te hi kan lawm em em a. Tin, Vaisam - Sailen via Zehtet chhuak turin theih ang anga dap chawpin kawng kan zawng mek a, heng te pawh hi kan lai tlang thei anih chuan, a theih ang anga PCC pavement tea min umzui sak kan mamawh dawn a ni. Tin, PMGSY-IV rawn chhuah hunah Leite - Mualthuam road te, NH 302-Tlabung - Rultung, Thangpui - Thangte road te pawh kan department hotute pawhin hei leh chen kawng a tlang ve tawh a, fur-thala tlan ve theih tura min ngaihtuaha min thunsak ka beisei khawp mai.

Demand No. 43 – Tourism Department:

Hetah hian sawi tur chu ka ngah a; mahse, kan minister a-ngaihna hria a ni a, chuvangin ka sawi loh pawhin ka sawi tur tul zawng zawng chu min hriatsak ka beisei e.

Khathi chin kha ka sawi theih ni sela. Vawina kan Minister pahnihte demand kan sawi - Demand No. 12, 42, 45 Pu Hlana chan leh, Pi Rinpuii chan Demand No. 24, 29, 43 te hi he House hian pawmpui ngei turin ka thlawp a ni e. Ka lawm e.

SPEAKER : A lawmawm e. Minute 2-3 vel a la awm a. Chhun-thingpui in chawlh hun a ni a, kan chawl phawt ang a; dar 2:00 PM ah kan lutkhawm dawn nia.

(Recess at 12:57 PM)

2:00 PM

SPEAKER : Kan Minister zahawm tak tak - Pi Lalrinpuii leh Pu Vanlalhlana te demand kan sawiho kha a ni a. Tunah sawi turin Dr. Lorrain Lalpeklana sawm ila.

DR. LORRAIN LALPEKLIANA CHINZAH: Pu Speaker, vawiina kan Minister zahawm tak tak Pu Vanlalhlana leh Pi Lalrinpuii te demand sawihona kan nei thei hi lawmawm ka ti a, hun tha tak min pek avangin a hmasain lawmthu ka sawi a ni.

Demand No. 45 - Public Works Department:

Pu Speaker, kan minister hmalaknain PWD in hmasawna nasa tak kan hmu a. Aizawl khawpui chhung kawng leh ram chhung inkalpawhna hrang hrangte thawm that mek zel a ni a. Tin, ATL Road siam that a ni mek zel te hi lawmawm ka ti a. Hetah hian Pu Vanlalhlana, Minister zahawm tak leh Lunglei West bialtu Pu T. Lalhlimpuia chungah lawmthu ka sawi duh a.

Tin, Siaha leh Lawngtlai tana pawimawh tak mai Tuipui Ferry bridge kan Minister hmalaknaa dawh a ni tur te hi lawmawm ka ti a. Hmanni lawkah Manipur - Mizoram inkalpawhna Tuivai bridge siam pawh kan minister hmalakna a ni a, vawiinniah hian fak a phu hlein ka hria a, a chungah lawmthu ka sawi a ni.

Kan internal roads te tun aia a that leh zual theih nan PWD kawng nilo ho hi PWD kawngah a theih chin china leha, chumi mil chuan maintainance fund pawh tihpun ve zel theih ni se.

Lawngtlai sabji-bazar atanga Council Veng panna kawng hi siam tlang theih ni se. Tin, CYLA playground panna hi alternate road a ni bawh a, a panna kawng hi km 1.2 vel a ni a. Kawng awmsa ve ve a inpawh lohna metre 250 vel hi SASCI hnuaiah proposal pawh submit a ni a. Hei hi kan Minister-in khawngaih takin min chhinchhiah sak se.

Tin, Thingfal - Tuipui maurawp kalkawng hi km 33 a ni a, tunah hian siamthat mek a ni a. He kawng hi ka bial tui chhak lam tan kawng pawimawh tak a ni a, kawng hian improvement strengthening a mamawh khawp mai. Tin, kan district-a khaw lian deuh Sangau, Bualpui (NG), Bungtlang, heng khuatea internal road re-surfacing, black-topping te hi min ngaih pawimawh sak turin ka ngen duh bawh a.

Nichina ka sawi tawh ang khan, Tuipui Ferry bridge dawh a nih dawn avangin, Phalhrang - South Lungpher khaw-kar kawng improvement, widening leh black-topping te a tih theih chuan, tuichhak mipuite tan hmasawna nasa tak a thlen dawn a. Tin, Thaltlang, Archhuang, Tialdawngi-Lung leh Vartek-Kai kawngte pawh hi maintenance leh black-topping min tihsak ngei turin vawiinniah hian Pu Speaker, he House zahawm tak kaltlangin ka ngen duh a.

Lawngtlai KMMTTP kawng hi kawng pawimawh tak a ni a. Amaherawhchu, Lawngtlai atanga km 14 velah khian kawng a chim a, vawiinni thlengin siam a la ni lova. Tin, a kawng a hnim em em a, landslide tam tak a awm a. Chungte chu clearance tih a la nih loh avangin double-lane pawh tunah chuan single-lane angin hmun tam takah a awm tawh a. Hei hi fur ruahtui tlak hma ngeia min ngaih pawimawh sak turin ka ngen duh bawh a ni.

Demand No. 42 - Transport Department:

Lawngtlai DTO staff indaihlohna a nasa em em a. Tax collection-ah kan district hi a thawh hlawk ber te zinga mi kan ni a, duhsak pawh kan phu ve hlein ka hria. Tun hnaiyah pension-in staff te an chhuak zeuh zeuh a, pension ai hnawhkhah a awm si lo hi a veiawm ka ti a. Tin, MVI kan nei lova, Siaha District-in min hmui a, hei hian kan mipuiteah harsatna nasa tak a thlen mek a. MVI hi a hma thei ang bera ka neih theihna turin kan minister hian hma

min lak sak turin ka ngen a. Tin, Lawngtlai District-ah MST service a awm lohna a rei tawh a. Lawngtlai - Sangau, Lawngtlai - Vaseikai MST bus service te hi awm thei ve ta se kan mipuiten an chhawr dawn em em a, hei pawh hi vawiinniah hian min hriatsak turin ka ngen duh a. Tin, Lawngtlai, Sangau, Bualpui NG leh Bungtlang S khuaah te mamawhna a san em avangin Auto-Rickshaw (two-wheeler) taxi permit pekchhuah ni thei se; chutiang bawkin, hei Chawngte khua pawh hian an mamawh hlein ka hria. Tin, vawiina public-career service rate hi a to deuhin ka hria a, revise theih ni se a lawmawm hle ang a.

Demand No. 24 - Health & Family Welfare Department:

Hetah hian kan minister hmalaknain kan health sector-in hma a sawn zel a. Nurse, doctor, lab-technician leh thawktu dang lak an ni a, lak belh zel an nih tur thute kan ngaihlha a, a lawmawm ka ti a. Kan minister hi ka chhuang a. Heng lak hunah pawh hian Lawngtlai District mipuite min duhsak lehzuat turin ka han request nghal duh a. Tin, Public health clinic tinah doctor dah ani te, sub-centre-ah healthcare mumal leh rualkhai zawka pek theihna tur health-worker sem rual te; tin, Civil Hospital-ah kidney transplant centre, Invicto-Fertilization centre te; tin, ZMC-ah cardiothorasic surgery leh neuro-surgery unit te dah tura hma lak mek a ni te hi a lawmawm ka ti a. Kan state hi cancer hluarna a ni a, Mizoram Cancer Hospital tihchangtlun nan project 731.91 crore man thawh mek a ni te hi lawmawm ka ti a. Tin, NHM hnuuia ASHA workers te hlawh tihpun te, Civil Hospital-ah MIR khawl dah thar a ni te hi lawmawm ka ti a. Kan minister hi Miretheite thleng phak-Minister a nih zia a lang chiang hlein ka hria a ni.

Tin, tun financial year-ah hian healthcare bill tam tak pek a ni a, la pek tlak loh pawh tun financial year tharah pektlak tura ruahman a nih thu te; tin, CSR kaltlangin Chennai-ah lung thalo mi 30 lai mai zai anni te, Zemabawk State Cancer Hospital-ah damlo zai theihna tur ruahman a ni te hi lawmawm ka ti a. Tin, Vahui-Grievance Online portal siam a ni te hi a lawmawm hlein ka hria.

Pu Speaker, Lawngtlai District hi health sector-ah kan hnufual hle a, health index-ah Mizoram tihnuafualtu leh tihniamtu kan ni. Staff indaihlohna hi hmun tina kan harsatna tawh a ni a, Lawngtlai District Hospital-ah pawh hian a nasa hle a. Tin, kan Minister duhsaknain NEC fund atangin nuai 63.55 hmangin Lawngtlai-ah dialysis unit bun a ni a, kan minister chungah lawmthu ka sawi duh a. Chutih rual chuan, technician kan neih loh avangin vawiinniah hian a la function thei lova. Hei hi min ngaihtuah sak turin vawiinniah hian a khawngaih ka dil a. Tin, kan Minister-in CT-scan Lawngtlai ah kan neih ve ngei theih nan hma min lak sak a. Hei hi a tak ram a thlen ngei theih nan vawiinniah hian theih tawp min chhuahsak turin Pu Speaker, he House kaltlang hian ka ngen duh bawk a ni. Tin Primary Health Centre hmun hrang hrangah staff indaihlohna hi kan harsatna a ni a. Thingtlang mipuiten an tangkaipui em em tur x-ray khawl te, tunlai routine investigation khawl tha zawk leh ambulance te an neih theih nan hma min lak sak turin ka ngen bawk a ni.

Tin, Sangau leh Bungtlang hi ministry hmasa khan PHC-ah hlankai an ni a, hei hi a tak ram a thlen theihna turin hma min lak sak turin leh, Bungtlang 'S' leh Longpuighat PHC pawh min tihchangtlun sak turin ka ngen duh a. Lawngtlai 'W' lam hi proporation a tamin kan hnufual lehzuat a, hei hi Lawngtlai District pawh health sector-a min tihniamtu a ni a. Chuvangin, helai hi min ngaihpaawimawh sak turin ka ngen bawk a. Tin, Bualpui 'NG' PHC hi sak zawh tawh hi hawn theih tura hma min laksak turin ka ngen bawk a ni.

Demand No. 43 - Tourism Department:

Lawngtlai District-ah hian Phawngpui Tlang te, Kaladan-a ‘Bawinu Lung-mak’ kan tih te, khualzinte attract thei hmun pawimawh tak tak mai kan nei a, hei hi approach road siamthat a pawimawh hlein ka hria a. Tin, Bawinu Lung-mak approach road Kakichhuah atanga ruahmanna awm mek hi Myanmar ramri dep a nih avangin, a him chiah lova, Kawrthindeng khua Balu-Kai atanga hnaitea pawh theih anih avangin ruahmanna siamsa kha siamrem theih ni se; hei hi khawngaihtakin kan minister-in min lo chhinchhiah sak se. Tin, Phawngpui khaw-bulthut Thaltlang khuaa Bawihnu tlawhtute tan tourist cottage eng emaw tal sak theih ni bawk se.

Vawiinah ka bial atangin news ka dawng a, Phawngpuitlang National Park lo hal avangin tunah hian a kang nasa mai a, a pawl ka ti hle mai a. Forest Deptt, NGO leh khawtlangte’n theihtawpa kang thelhin hma an la mek a. An thelh theih nan kan tawngtainaah leh, sorkar te pawhin theihtawp min chhuahpui turin ka han ngen bawk a ni.

Demand No. 29 - Social Welfare Department:

Lawngtlai District-ah hian Social Welfare officer leh office kan nei lova. Kan Minister nen kan ti-tinaah, ‘District Social Welfare Officer kan recruit hunah Lawngtlai-ah kan pe ang che u’ tiin min hrilh a, vawiinah hian lawmthu ka sawi a. Min tih hlawhtlin sak ngei tur leh District Social Welfare Office hawn anih ngei theihna tura hma min laksak turin ka ngen a ni. Tin Social Welfare Department-in ruihhlo-dona kawngah demand-reduction leh harm-reduction lam hawi zawngin ke an pen te hi lawmawm ka ti a. Lawngtlai District hi Myanmar leh Bangladesh internation border-a awm kan nih avangin, ruihhlo a hluar hle a. Kan thalaite ruihhlo bawiha ta chhanchhuah an nih theihna turin De-addiction and Rehabilitation Centre kan neih theihna turin kan minister-ina hma min lakpui turin ka han ngen duh a.

Tin, a tawp berah chuan, Mizoram-ah Tar-Lawmman tihpun anih angin, ‘district council area-ah hian tihpun ve ni se, kan lawm a kim ang’ tiin vawiina helaia ka thusawi hi ka titawp duh a. Vawiina Demand pahnih, kan Minister Pu Vanlalhlana Demand leh Pi Lalrinpuii, Minister zahawm takte chanpual kan sawiho hi tha ka ti a, he House-ah hian pass ngei anih theih nan ka thlawp e. Pu Speaker, ka lawm e.

SPEAKER : Tunah chuan, Member zahawm tak Pu Robert Romawia Royte ilo sawm ang.

PU ROBERT ROMAWIA ROYTE: Pu Speaker, ka lawm e. Vawiinah kan Minister zahawm tak tak Pu Vanlalhlana leh Pi Lalrinpuii te Demand kan sawiho tur hi a lawmawmin, sawiho pawh a phurawm hlein ka hria a.

Demand No. 43 - Tourism Department:

Kan hmaa miten ‘ladies-first’ an tih ang deuhin, Pi Lalrinpuii, Minister zahawm tak chanpual, Demand No. 43 hnuaiia Unity Mall chungchang hi a hmasa berah tawitein ka sawi duh a.

‘Unity Mall’ tih hi a hminga Tourism minister ka nih lai te khan kan buaipui ve nasa khawp mai a, SASCI project ah Mizoram tan nuai 127 allocation a awm a. Mizoram tana sanction a nih angin, theihtawp chhuahin Mizoram Tourism Department pawhin a umzui ni te

pawhin ka hria a, a lawmawm a. A hmun chungchangah eng emaw issue deuh te chu a awm a ni awm e, mahse chung te pawh chu an settle tawh ni te pawhin ka lo hria a. He pawisa hi a tam khawp mai a, building pakhat sak nana nuai 127 chu Mizoram-a building sakna man to ber a nih ka ring a; kei pawh a minister ka nih ve laia ka phur ve em emna chhan chu a ni a. Delhi-ah te pawh ka umzui a, theih ang angin kan ti ve a ni.

Hemi chungchangah hian kan hunlai khan consultant appointment te kan ti a, DPR te zovin sanction approval te awm chiah lo mahse, thil thui tak a kal hman a. Kan sorkarin chak takin a umzui a, a sanction te a awm chho a. Hengah hian appointment emaw, consultant emaw, PMU emaw, executive agency emawte an hming han vuah danglam deuha han intih-thuah deuh te hi a awm em aw, ka ti a. Heng sanction/project lian te thawk tur hian PWD that zia te chu mizo-mipuiin kan hre vek mai a; a fee chi hrang-hrang seng teuh-teuh lo zawng te hian; sanction ber a awm tawh chuan a thara consultant emaw, PMU emaw, khatiang vai rimnam lampang uar lo zawng deuh khan; mizote'n kan tih ve theih leh a ti tur department te an awm tho hi chuan tih a tha a mang e aw, tih te ka rilruah a awm a. Chanchinbu nge, TV-ah nge ni ka lo hmuh khan, consultant te kha DPR leh a sum dehchhuahna tur tifel thlap tawh si a thara a dang han lak leh te kha a awmin ka hria a, khang te pawh kha kan minister zahawmtak tih a nih ka ring lova, a sang lam atang hian, ,he mite hi lo chhawr rawh u' tih te a awm a ni mai em, tih te rilruah a lo awm a; tiang te a lo awm anih chuan, a tha lovin ka hria a. A sum ber kan neih tawh chuan, a implement leh a execute tu tur PWD an awm a, an kuta dah mai te kha, an la ti fel lo anih chuan a tha dawn lawm ni?

Sanction order kha kan en chuan, khatiang han rawihna, consultation fee kha 2% kha an rawn sanction theih chin kha niin ka hria a. Khang baka construction cost tur kha eng-eng emaw charge-ah khan a kal nasat lutuk chuan, a nih tur ang anih loh a hlauhawm viau a ni. Kan minister zahawm takin hetiang project lian tak, a hun laia an sual chho tur erawh hi chu ka lawmpui viau a. He Unity Mall hi 'Ekta Mall' te an ti thar deuhin ka hria a, a vai lutuka kha chu a chi lovin ka hria a. DPR hlui pawh kha han en ula 'Unity Mall' tih thlap a ni a; a-Zo hmingin, 'Zo-Mall iti zawk ang u' te ka ti nghe-nghe a. A idea pawh hi a tha khawp mai a, district hrang hranga miten khatah khan an handicraft lamte, an hnam thumte; chutiang kher lo pawh chu an rawn zawrha, an han hralhna tur hmun te pawh a ni a. Tin, State dang atanga rawn inpho duh emaw, rawn zuar ve duh an awm pawhin, khangte tana reserve neih ve ngai te pawh a ni a. Hetiang a taka tha kan han nei chho tur hi, a hmun thar tur leh eng emawte kha ka hre ve tawh lo naa, a lawmawm hle a ni. SASCI sum a ni a, SASCI part-I te anga sum lapse hlauhawm mai thil kha a ni lova, a hun chung te a rei a; hei hi a vanneihthlak zelna pawh a ni.

Pahnihna-ah chuan, 'Anthurium Festival chungchang hi ngaihtuah that leh atan a va tha em' tiin a bialtu khan a rawn sawi a. Anthurium Festival te 'Leitlangpui Music Festival' han tih thuta kha mi tam takin an hrethiam lova, sawisel pawh a tam khawp mai a. Kan hriat angin, ZPM-unaute an rawn sorkar hlim kha chuan an tarmit hlui kha an rawn chhawm lut a, sorkar system-a thil kha an hmu-phe deuh thinin ka hria; khatih laia thutlukna siam kha a ni a. Kan minister zahawm tak pawhin min lo hrethiam sela, tarmit thar, sorkarna-tarmit nen thil an thlir tawhin ka hria a. Sorkar kalphunga thil a kal a ngaih zia te, (a hmam an hre lo, ka tihna ni lovin) an chiang tulh tulhin ka hria a. He Anthurium Festival han tihtawp tawp kha; khawvelin tourism sector-a Mizoram min rawn hriatna awm chhun te pawh a tih ngam a ni a. Tourism ministry lam phei chuan an ngaisang khawp mai a; tum khat DoNER Ministry a

Joint Secretary lo kal phei chuan Anthurium Festival-a a awm lai-lai khan, an sum neihchhun pawh 'Reiek development atan kan rawn pe ang' a ti nghal tawp mai a, pui a ti lutuk kha; khatiang te kha a ni a.

A sawiselte pawh an han awm thin tak na a, mahse la tel ve ngai lote an ni tlangpui a. He tarmit-hlui bun laia thutlukna hi tarmit-thar nen sorkar system-a kan awm tawh hnu-ah chuan, en that leh a hun tawhin ka hria a. Kum khat kha chu, tikhan an chawl zawkah ngai mai ta ila; 'Anthurium Festival hi tih thar leh dan i ngaihtuah ang u' tiin, Pu Speaker, he rorelna sangah hian ka rawt duh a. A impact pawh hre ve-in ka inhria a, foreign pawh hi a thleng nasa khawp mai a. Tin, 'Anthurium' tih te pawh hi 'a-hnamdang hming; a-mizo deuhin' te pawh kan han ti a, ka awm lai pawh khan. Kei pawh zo-par lam ngaina chi ka ni a, Derhken te pawh kan han ti na a, BC hun laite khan vai hovin puja nan te an lo hmang tawh a; Tlaizawng te pawh ram danga an hnam pangpar te a lo ni nasa lutuk a. Chuvangin, kan ram pangpar tak bik han tih tur hi chu a lo awm chuang reng reng lova; a hmingah hian buai tur hi a lo ni lova. Mizoram-ah a tha duh a, thenawm state-ah te chuan anthurium a tha duh lova, kan product lian pawh a ni. Brand name nei tawh Cherry Blossom Festival te tun hnaiah Meghalaya in an rawn ti a. Chuvangin, a hma a kan lo larpui tawh hi 'i chhunzawm leh ang u' tih kha, kan minister zahawm tak hi kan ngen duh a.

Tin, Tourism budget tlem lutuk hi a manganthlak a, tunah pawh hian crore 11 vel a ni a. Department dang an pek belh zah pawh ni lo, an paihsak zah pawh ni lo hi Tourism hian budget an nei a. Hei, theihtawp an chhuahna azarah Tourism Department officers te kan Minister hovin an che tha a, an smart hlein ka hria a. Project lian zawk leh mawhphurhna lian zawk pawh keng zo tur Tourism Department hian In-house officers, departmental officers a nei a, heng ho hman tangkai hi kan hmasawmna tur a ni tih sorkar hian hria se.

Demand No 24 - Health & Family Welfare Department:

ZMC Hospital te thophang thlirin, he sorkar hian a tir kha chuan a thlir deuh niin ka hria a. Hralh-tum atangin bul an tan a, an hralh ta lo hi a lawmawmin ka hria a. Tichuan, tunah hian kalphung pangai takin a kal chho ta a, hmasawmna pawh hi kan hmu mek a, kan hmu zel dawn ni te pawhin ka hria a. Beiseina sang tak ZMC ah hian ka nei a ni. Hei hi, zirna college a ni ringawt lova, degree zirna a ni ringawt lova, a sang zawkte pawh an zir zel dawn a. Chu mai piah lamah a hospital lai hi a hlu khawp mai a. Civil Hospital kan indaih tawh lova; chu chu, kan sorkar hmalakna leh Pi Rinpuii (a hming pawh han lam ila) kan minister zahawm takin theih tawp chhuaha hma a lakna hi thlawp tlak ni te pawhin ka hria a. ZMC bik hi kan vai mawhphurna-ah te pawh ngaiin, a grow zel nan leh kan ram asset ropui a ni tih hriaa indem tawmna atan hmang lovin, 'kan tanhona tur zawk a ni' tih ka sawi duh bawk a ni.

Tin, CSR chungchangah Govt. CSR ang ni chiah lo, mahse private firm atang tein kan minister zahawm takin CSR hmalakna te a nei thin a. Lung-zai chungchangah te thil hlu tak tak a ti a, a lawmawm hlein ka hria a. Hei hi minister dangte pawhin a kan entawn tur chi a nih ka ring. CSR han sawi takah chuan, Mamitah sorkar hmasain CSR sum hmangin building tha zet mai a sak te khu functional ni tawh se ka duh khawp mai a. Mamit District lamah hian hospital tha a awm lova, khu building ropui tak khu tha taka a function theih nan tan an lak ka duh bawk a ni.

Hachhek bial chungchanga harsatna kan neih te hi chu ziakin Pu Speaker, ka hrihl tawh

mai ang a. Tribal Affairs hi Art & Culture lama a han kal daih tur hi a fuh ber ang em aw, tih ngaihtuahna a awm a. Art & Culture leh Tourism te hi han amalgamate zawk sela (kan thuneihna chu a ni lo na a) tih kha ka sawi duh bawk a.

Demand No. 45 - Public Works Department:

PWD minister hian hna a ngah dawn khawp mai a, ka lawmpui a; achievement pawh a lian ang tih ka ring a. PWD hian Supplementary Demand ringawtah hian nuai 73,521/- a nei a. Tourism Department budget pumpui nuai 1,100 vel kan tih lai khan, PWD-a sum dil belh (Supplementary Demand) ringawt pawh kum kal ta (liam-mek) ah khan nuai 73,521/- ni a. Hei hi hman zawh vek a ni lova, a tam zawk pawh la hman loh a ni deuhin ka hria a, a lawmawm lamah te pawh ngai ila. Hei hi tha taka an hman ka beisei a.

Chutih mek lai chuan, Ni 6.2.2025-a RTI Zawhna - ‘SASCI Pt. I, 2023-2024 - first installment kha Fin. Deptt. in PWD ah engtik nge a thun?’ tih Ni 17.2.2025-a RTI chhanna ah hian, (tunhnai thil te pawh a ni a) Ni 11.6.2024 ah a hma kuma first-installment kha Finance Department hian PWD ah a chhunglut chauh a ni. PWD te kan dem lek lek thin a, SASCI implement chungchangah contractor ten awmngaihna an hre lo; ‘lo thawk suh u; lo thawk leh rawh u’ tih ang chi kha a ni a. A nihna takah chuan, sorkarin PWD kuta a taka sum a pek hi a tlai em a ni. First installment hi a financial year lai khan dere pawh a implementing agency ah a lut miah lova, financial year liam hnu ah PWD-ah a lut chauh a; second installment lo chhuah ngaihna a awm lo reng reng a ni. SASCI pt. I second installment hi a kum chhunga chhuah ngei-ngei ngai a ni a. Chuvang chuan, kan PWD Minister hi a chang hi chuan a khawngaitlak deuh em; Finance Deptt. hian kan tiduhdah lutuk deuh em? Hetiang hi SASCI-ah a nih chuan, state plan leh scheme dangah pawh ‘kawngpui a siam tlai; a che tlai’ kan tih te pawh hi, chettirtu lam hi an che tlai zawk a ni lo maw; sum hi kan pe tlai lutuk a ni lo maw, tih te rilruah a awm a.

A tawpna tak takah chuan, Hachhek bial hi bial-pawimawh a ni a. Tunah hian mamawh tak tak kan nei a, chu chu ziakin kan hon. Minister hi ka pe leh dawn a ni. Langkaih-Kanhmun-Damchera inkar erawh hi chu a hmanhmawh thlak tawh khawp mai a, hei hi min hriatsak sela. Tichuan, kan Minister pahnihte demand hi lawm takin ka thlawp e. Ka lawm e.

SPEAKER : A lawmawm e. Member zahawm tak khan ‘thil par hi ka ngaina’ a a ti a, annu hmingah pawh hian ‘par’ a tel ka ring deuh a; a dik tak maw ka hre lo le. Tunah chuan Member zahawm tak Pu R. Rohmingliana ilo sawm ang.

PU R. ROHMINGLIANA: Pu Speaker, wawiin demand-ah hian sawi tura ka tih lem loh he House ah hian sawi ngai thut mai ka nei a, pawl ka ti khawp mai a. Wawiin chawhma lamah kan demand sawi te nen pawh a inkaih hnawih tho a.

Demand No. 45 - Public Works Department:

Ka bial chhunga PMGSY kawng lai mek ‘PB road’ kan tih maia, an hnathawhna ah Belthei khua ami Pu Vanmawia, kum 29 leh Zothanmawia, kum 18 te chu vanduaithlak takin leivungin a chhilh a, nichin lawk khan a ruang an la chhuak a, chu chu wawiin demand sawinaah hian han sawilan a thain ka hria a; PWD te kan sawi bawk a. PWD Department hnenah pawh Pu Speaker, nangmah kaltlangin khawngaihin, anni chhungkaw hnihte hi miharsa te-te inhlawh an ni a, hetiang a leivungin a han chhilh hlum hi an chhungte tan abhuphurh awm hle mai a; chhawmdawl na te PWD lamin min ngaihtuah sak theih chuan

a lawmawm hle ang a. Nimin lam Disaster demand sawi hun kha ni tawh lo mahse, kan Minister zahawm tak Pu K. Sapdanga te pawh an awm bawk a, disaster lam atanga chhawmdawlina te pawh kan beisei ve hle mai a, chu chu he House kaltlang hian kan sawi hmasa a ni e.

Aw le, Pu Speaker, vawiina budget kan passed tur, kan minister zahawm tak pahnihte - Pu Vanlalhlana leh Pi Lalrinpuii te demand hi pass ka remti tih kha ka sawi hmasa duh a.

Transport Deptt-ah hian nikuma an budget aiin cheng nuai 128/-in a hniam a, Chutiang bawkin PWD ah cheng nuai ₹7,430.47/-in a hniam bawk a ni. Chutiang bawkin, kan Minister zahawm tak Pi Lalrinpuii Department, Health & Family Welfare ah nikum aiin cheng nuai 1,346.71/-in a hniam zawk bawk a. Chu mai a ni lova, Tourism Department ah cheng nuai 220.36/-in a hniam bawk a ni. Hei hi engnge a chhan ni ang aw? Sorkar liam ta ah khan 'khawnpui' tih te, 'Minister-te'n Finance Minister-ah an indaihlohna a dil ang' tih ang chi te a awm a.

Khatih hunlai khan opposition lam khan an sawisel viau niin ka hria a. Amaherawhchu, tun tumah pawh a awm tho niin alang a. A aia nasa zawk Khawnpui-u kan ti zawk dawn nge ni minister-te tlawn ngai, Finance Minister ang zawngin kan insiam ta deuh em aw te ka ti a. Tin, kan Minister te demand ka han zir hian, mak han tih deuh laite pawh ka nei ve a ni.

Demand No. 12 - Parliamentary Affairs Department:

Hetah hian session kal liam taah khan Pu question 3 department chhan hman loh a awm tih i sawi rik kha, kha kha engtiangin nge hma lak a nih tih vawiinah hian min hrilhfiah thei se. Pu Speaker, Assembly-ah hian committee peng hrang kan ngah khawp mai a. Heng Ccommittee-te hi a pawimawhna kan hriat chhoh zel te pawh a tulin ka hria a. Chutih rual chuan, Pu Speaker, kan minister-in mi hrilhfiah atan ka duh bawk chu, Minister te hi Executive Head an nihna angin helai Legislature-a Committee pengte hian an duha, a tul an tih chuan an ko ve thei em? Department Head hi chu an ko thei ngei mai a; minister te pawh hi an koh theih niin ka lo hria a, ka hriat dan hi a sual nge tih ka hre chak deuh hlek a. India ramin pawisa a tih thih teuh tum khan Parliament-ah PAC khan Prime Minister kha koh a tum a nih kha; an ko ta em tih chu ka chiang lova. Hemi chungchangah pawh hian kan minister-ah te pawh hetiang hi thil thleng thei a ni em tih te. Khang kha min han hrilhfiah thei sela ka duh hle mai.

Demand No. 42 - Transport Department:

He deptt. chungchangah point 2 lek ka sawi ang a. Tunlaih 2-wheeler taxi kan hmang tangkai em em mai a, traffic jam te a pumpelh deuh a. Engatinge 2-wheeler taxi khalhtute sorkar hmasain a ruahman; miharsate an eizawna tura ruahmannaah a rawng thlak kan han tum thut a, cheng tam tak an sen a ngai dawn a. Hei hi engnge a chhan tih te pawh ka hre duh a.

Demand No. 45 - Public Works Department:

Pu Speaker, ka bial chhungah PB Road sorkar hmasa atanga kan lo ruahman tawh kha tunah hian laih mek a, tun term chhung hi chuan tha taka a chhuah te ka beisei a. Ka bial chhung hi Mamit District atangin kan lut a, Marpara hi ka bial chhung chiah a ni a, black-topping a tawp nghal a; ruah a sur chuan a nal em em ringawt mai a. Tichuan, Thenzawl atangin Buarpui-ah kan lut leh a, Buarpui atangin black-topping hmuh tur kan nei leh meuh lo; Lunglei lam atangin chuti bawk. Ka bial chhungah sorkar hmasain PMGSY kawng tam

tak min tihsak a, tun sorkarin nasa takin min chhunzawm sak bawk a, ka lawm hle mai a. Heng kawngte hi tha taka enkawl chhoh ni se ka duh a. Chutih rual chuan he PB Road, a bik takin ka sawi laia hi; keini kut-hnathawka eizawngte awmkhawmnaah hian motor chuan man te a hautak avangin, a chuan man tlawm te kan beisei ve a. Chuvangin, MST bus service hi min tirh sak ve sela kan duh takzet a, vawiinah hian ka ngen ni bawk sela. Kan thlai-tharte MST bus-ah tlawm te tea Lunglei-a phurh chhoh te kan chak ve a ni. Man to deuh deuhin kan thlen a, Lunglei-ah to deuhin hralh a ngaih phah thin a. chuavngin, MST bus service a awm chuan thlaithar man te a lo tlawm zawk dawn a ni.

Demand No. 43 - Tourism Department:

Pu Speaker, Tourism lamah hian, ka bial chhunga Adopted Village a tan Tuikawi khua ka thlang a. hetah hian engmah tih a la awm lova. He khua hi Mizoram-a krismas hman hmasak berna khua a ni. Hei, ka bula thu Pi Prova-i, kan MLA zahawm tak nen hian kan inri a, a ni bialah pawh thil tha, thil thar, tun hma thil hlu tak tak a awm a, lawng te in a inkalpawh theih reng a ni. Helaiia Adopted Village - Tuikawi khua hi khawngaiha min lo ngaihtuah sak deuh turin Pu Speaker, Demand No. 43 - Tourism Department ka sawi rual hian ka han sawi ni sela.

Demand No. 29 - Social Welfare Department:

Pu Speaker, ruang-phurh chungchangah hian, kan bial chhungah chuan lawng a ngai a, hei hi eng emaw zawng tal min siam sak turin kan han ngen ni sela. Tin, nikum lama ruang phurhna pawisa dah zat chiah kha kuminah dah leh a ni a, nikum khan kum tir atanga hman a ni lova; kumin kum thar turah hi chuan kum tir atanga hman a ni dawn si a, kan indaih ang em aw ka ti a. Chuti rual chuan, Social Welfare Minister zahawm tak khan min lo hriat sak sela, Aizawl-Lunglei-Serchhip te atanga thawn luh ringawt turah kha min ngaih sak lo sela, khutah PHC pahnih kan nei ve a; PHC atanga hmun danga sawn chhuah te kha a ngai ve a nia. Khang te pawh kha min phal sak zel sela. Kawng a that lutuk loh avangin kal man te pawh a to thin a. Khang provision te kha eng emaw zawng taka min siam sak turin ka rawn ngen bawk a. Tin, Pu Speaker, ka bial chhungah hian CDPO thuthmun 2 - Bungmun leh Lungsen-ah te a awm ve a ni. Bungmun-ah hian staff an awm ngai reng reng lova, Lunglei atangin an hmui thin a ni. A chhan pawh staff-indaihlohna a ni tih pawh ka hriatpui a. Chuvang chuan, staff indaih deuh turin Bungmun CDPO Office-ah min dah sak ve turin a thawktute ka'n ngen ni sela. Tin, Pu Speaker, Lungsen-ah pawh 1993-a building assam-type an lei kha office-ah an la hmang a, fur an huphurh thin khawp mai tih kha min hriat sak bawk sela.

Demand No. 24 - Health & Family Welfare Department:

ZMC kan nei a. Sorkar liam ta Congress leh MNF hunlai khan National Medical Council-ah hian pawisa chawi an neih ka hre lova. Engatinge tun tumah hian pawisa an chawi tak tlat mai hi a dik lo ka ti a ni. Chuvang chuan, thawktu indaihlohna, National Medical Council-ina thawktu mamawh an tih ang hi pek theih hram dan a awm lo em ni? Tin, tunah State hrang hrangah medical college an din thliah-thliah ta a, kan medical college - ZMC ami hi an phawi thin niin ka hria a, hlawh tam zawkin. Hmanni lawkah pawh ka hriatsual loh chuan mi pahnih an phawi a ni; thla khatah ₹3,40,000/- hlawh turin Shillong lamah an chhuk a ni. Medical college tha kan mamawh anih si chuan, hlawh tam zawk te hi an phu ve mai lo em ni? Saw, khum te pawh han tih belh teuh a ni a, thawktu an tam chuang si lova.

Tin, Pu Speaker, keini remote area te tana pawimawh em em chu, kan bial atangin damlo an rawn kal a, doctor te'n private hospital-a lo refer hi a awm zeuh zeuh mai a, a hahthlak

khawp mai, bialtu MLA nih chuan. Khawngaihni, hetiangah hian sorkar hospital-ah a theih ngang loh a nih loh chuan, ZMC-ah te pawh Lunglei leh Aizawl lam atang te pawhin minrawn refer phei sak sela a lawmawm ngawt ang.

Demand No. 45 - Public Works Department:

NH-302, Lunglei-Tlabung kawng Road hian min paltlang ve tho a, NHIDCL hian tunah hian an kut ken a. Mizoram State sorkar hian NHIDCL hi engtiang chin nge kan control theih tih hriat a chakawm khawp mai a. An kawng laih te hi kan monitor tak tak thei em? Kawng tha vak lovah min chhuah sak te a hlauthawnawm a. Hmanni lawkah pawh ka bial thlen hma lawka an kawng laih khuar duk avangin car tha deuh mai a let thut a nih kha. Mihring thi an awm lo hlauh a, a lawmawm a.

Tin, Pu Speaker, PWD hian tuna an thawh mekah theihtawpin tan an la a. Sorkar hmasa PMJSY-a kan thunte kha tunah an thawk mawlh mawlh a, tha taka an thawh theihna turin a staff-te pawh indaih zawkin min dah sak ula; Mizoram-a cheng theuh-theuh kan inthlau ta lutuk hi a dikin ka hre lo a ni. Sawlaiah ZPM te pawh an tam ve a nia. (**Speaker:** Minute 3-in a pel a. I zo thei dawn tawh em?). Pu Speaker, a tawp nan. Bolia leh Tuisen Lei hi a pawimawh a. Helai hi Congress sorkar laia lei an dawh kha a chim a, mi eng emaw zat an thi a nih kha. Chuti chung chuan vawiin thlengin dawh lohni a la awm reng a, heng te hi khawngaihni min chhinchhiah sak sela.

Tichuan, New Sachan Lui kaina tur marboat min dahsak thei hram bawh sela; chuti lo chuan kal ngaihna awm thin lo a ni. Pu Speaker ka lawm e.

SPEAKER : Tunah chuan, Member zahawm tak Er H. Lalzirliana ilo sawm ang.

PU H. LALZIRLIANA: Pu Speaker, vawiinah kan Minister zahawm tak takte pahni - Pu Vanalahlana leh Pi Lalrinpuii te demand sawi theia ka awm hi ka lawm hle a. Pi Lalrinpuii demand (Ladies first tih ang deuhin) han sawi hmasak ka duh a.

Demand No. 24 - Health & Family Welfare Department:

Ka sawi hmaw, kan Minister zahawm tak hi ka bial district khawpui Mamit - Aspirational District khawpui hi a rang thei ang bera min tlawh turin ka'n sawm teh ang; khulai a hmunhma ngeiah kan harsatnate minrawn enpui turin ka sawm duh a ni.

Kan hriat angin Mamit hi 'Aspirational District' tih kan ni a. Hachek bialtu MLArawn sawi tawh ang khan, Mamit District Hospital hi kan hospital neih chhun ve ngawih-ngawih a ni a. District dangah chuan an intodelh ang reng a, Lawngtlai District ah pawh civil hospital bakah private hospital pahni-pathum han sawi tur te an nei a ni. Keini chuan hei hi kan District Hospital ngawih-ngawih a ni a. Tuna kan luah mek hi 30-bedded hospital a ni a. Power Finance Co-operation khan an CSR hmangin tunah hian building tha deuh mai min sak sak a, zawh fel thawkhat a ni tawh a, A hawn te pawh formal chuan hawn tawh a ni. Amaherawhchu, tunah hian luah luh a la ni lova. Ka hriat dan chuan, final inspection nei turin department lam atangin an intir a. Amaherawhchu, an la kal thei chiah lo a, karleh Thawhtan-a kal tur ni te'n kan hria a, a lawmawm ka ti. Hei, dialysis unit te pawh dah tur niin kan hria a, kan sorkar chungah pawh lawmthu kan sawi a; ICU te pawh kan la mamawh viau a ni. Kei ngei pawhin Power Finance Corporation ah lehkhate thehlut lehin a building chu min pe teh meuh mai a, a facilities dang MRI leh CT-Scan tihtheihna

te; tin, ICU facilities te pawh ‘minrawn tihsak ve teh u’ tih te pawhin ka ngen a, lehkhatepawh kan thehltut tawh a. Chung te pawh chu min bawhzuipui chho zel kan duh a.

Tin, sub-centre sak tur tihah khan Hmunpui kha a lang telin kan hria a; ka biala Hmunpui ni turah kan ngai ringawt a. Kan biala Hmunpui a ni em/ni lo em tih kha min lo tihchian sak sela. Health infrastructure ah hian kan hniam khawp mai a, hei hi aspirational district kan nihna chhan te pawh parameters/criteria lian tak te zinga mi a ni a. Sorkar hmasaah pawh khan sub-centre neih mumal kan lo nei lo reng reng a, a bik takin ka bial chhungah hian. Health Clinic Centre, SEDP suma sak tur khaw 15 ah khan health facilities engmah awm reng reng lohna khua kan thlangchhuak a, tichuan kan han ti chho a. Tun sorkar tharah hian hmun eng emaw zatah chuan health-clinic centre sak hrim hrim chu zawh tawh a ni a. Hetah hian han sawi hram ka duh chu, Minister hnenah pawh khan ka sawi a; hei, hma kan lo la hmanhmawh a, khaw 4 ah pheichuan kan lo sa hman tawh a. He kan sak tawhna senso tal hi chu ‘min phuhruk sak ve thei ula’ tiin department ah pawh lehkhaka thawn a. Amaherawhchu, tih a ni ta lem lova, MLA fund-in engtin tin emaw kan han inhnawh khat leh ta a. Tuna sa thar turte khan kan sak tawh hnuah khan rawn sak leh an tum a. Kan building sak sa te kha rawn rin an tum deuh a, amaherawhchu, khaw thenkhat khan an lo phal lova. ‘Tihian awm phawt se la, a tul leh mirethei luah tur te pawhin kan dah mai dawn nia’ kan ti a; a la ding ve teng-teng hlawm a ni. Khaw eng emaw zah, khaw 15 zinga khaw 8 bawr velah sak a ni tawh a, khang kha health infrastructure engmah awm lohna a ni.

Amaherawhchu, a thawktu SEDP atanga health-worker han rawihte kha a awm ta lova, tunah hian function a ni ta reng reng lo a ni. Chuvang chuan, engtin emaw a function theihna tur min ruahman pui sela tul ka ti khawp mai a. A tul anih chuan MLA fund atang te pawhin han tanpui dan leh hma han lak dan te pawh kan zawng ve zel ang a. A khaw puma vaccine tak ngial pawh lak theihlohna khua, health clinic hniam ber chi pawh la awmlohna kha kan district-a keima bial bikah hian a la tam hle a ni. Tunah hian Mamit District Hospital tak chu doctor lamah chuan kan lawm khawp mai a, Specialist 5 kan nei a, MBBS doctor pangngai 4, Dental 1 leh Ayush Doctor 3, an vaiin 13 ngawt mai kan nei a ni. Tuilet hnu pawha kan doctor strength neih that ber lai a ni hial awm e; kan lawm khawp mai. Amaherawhchu, Group D lam hi DHMI establishment hnuai a tlemna ber kan ni a, tunah hian regular 5 kan nei a ni.

Chutah chuan, August thla hian mi pakhat a pension dawn a, mi pakhat resign tum deuh reuh kan nei bawka; tichuan, pathum kan nei dawn tihna a ni a. Amaherawhchu, RKS atang hian 6 a nghet lote kan nei a, engtin tin emaw chuan kan la in manage thei naw-naw tih kha min hriatsak sela. Tin pharmacist hi July, 2023 khan a retire tawh a, vawiin thleng hian a dang kan la nei lo a ni, kan district hospital ah hian. Heng te hi min tihfel sak thei se kan ti hle a ni.

Tin, kan Minister leh Higher Technical Minister zahawm takte nen pawh a thu phunga kan han sawi pawh khan, health infrastucture kan nei tha lova. Mamit ah hian. Tunah hian Higher Technical property kan nei a, building leh chi hrang hrang staff-quarters te Congress party sorkar hmasa hunlaia Women Polytechnic tura an lo sak kha a ni a. Amaherawhchu, Women Polytechnic hi engtik khaw tikah nge kan function theih ang tih a hriat lova. JNV ho building kha sak lai mek anih avangin kan han luahtir a. Anni an sa zova, an chhuak leh tawh bawksi a, tunah hian ruakin a la awm a ni. Heihi hman tangkai dan zawng tlang ta ila, ‘nursing school din dan te zawng ta ila’ tia kan sawi kha kan la

bawhzui turah te pawh ngai ila.

Health & Family ah hian hei budget pawh thahnem tak dah a ni a, a lawmawm hle a. Tourism budget hi -16.17 zetin a tlahniam a; hetah hian sorkar hi hmasawn zawngin kal a tum lo nge ni. Mamit ah mikhual thlenna tourist lodge kan nei ve a, tihlen te pawh ngai tih te min lo hriatsak sela. Tin, Lengpui Lui hi Tourism minister hmasa (MNF sorkar lai) pawh ka hruai a, hei hi cheitlak tak a ni a. Tunlai hunah phei chuan Aizawl nula-tlangval te pawh an kal fo a, family picnic nan te pawh an hmang thin a ni. Hei hi min lo hriatsak se kan duh bawk a.

Demand No. 9 - Social Welfare Department:

Hetah hian budget pawh 26.53 ngawta pung a ni a. Social Welfare-ah pawh hian hmalak tumna a awm niin kan hria a. Tunah hian social welfare officer kan nei lova. Tin, one-stop centre kan neih ve pawh kan hmang-tangkai viau a; amaherawhchu, facilities leh infrastucture hi kan nei tha lo hle a ni. Appoarch road atangin a tha lo tan a, a chhung a thawkte leh an facilities neih khu a beitham hle a ni tih min lo hriatsak ka duh a ni.

Demand No. 45 - Public Works Department:

Pu Hlana chan Deptt. ah hian, BE 25-26 leh 24-25 ah phei chuan -10.14 niin, a negative-growth tihna a nih chu.

Nichina ka question, zawhna kan dah tel thenkhat kha a chiang theih nan kan sawi leh lawk ang a. Khulai Tuipuibari-West Kawnpui (Tripura nena connect-na) hi ka sawi ang khan, Economic Importance & Inter-State Connectivity (EI & ISC) road a ni a. Hei hi national highway chu a ni miah lova, mahse a funding petu hi Ministry of Road Transport & Highway (MoRTH) a ni. 0-9kms kha Phase-I a ni a, a balance 9-18 kha tih loh a ni a. Ministry pawh ka dawr a, hei ka lehkha 2020 kuma ka thehtlak pawh a copy ka la nei a. Anniin tawngkaa min chhanna chu, 'Phase-I hi zo phawt ila, 2nd Phase chu la tih leh turah' tih kha a ni a.

Helai kawng hia a laklawh a, a pawimawh bawk si a. Hei hi chiang deuhin, engnge hma lak tawhna chin leh hma lak zel dan tur te min react theih chuan ka lawm khawp ang a. Tin, Ministry hmasaa thehluh, (Minute 1-2 chiah Pu Speaker, kan dil belh lawk teh ang che) Hmunpui-Rawpuichhip existing road, ministry hmasa khan tlang dawn dawnin a awm a, kan beiseina a san viau lai khan an flop ve leh thin a; hei hi minlo hriat sak sela. West Phaileng - Dampui via Arsialkawn road hi eng emaw hunlai khan RD atangin an lo lai tlang ve tawh a, hei hi chei tlak tak a ni a. Tin, Dapchhuah - Dilzawl te, Hmunpui - Phaizau te hi min lo hriatsak se kan duh hle a ni.

Demand No. 24 - Health & Family Welfare Department:

Health ah hian thil pakhat pawimawh em em - Tuipuibari PHC hi sak zawhna a rei tawh a, ministry hmasa khan function turin kan ti char-char a, mahse, MBBS doctor kan hmuh zawh ngang loh avangin kan function thei ta lova; helai ruam hian an mamawh ngawih-ngawih a ni ringawt mai a ni. Hei, tunah chuan doctor te pawh kan lo indaih deuh tawh a, ZMC atangin kumtin eng emaw zah pass chhuakte an lo awm ve tawh bawk nen, hei hi khawngaih takin min function sak sela kan lawm ngawt ang.

Vawiina kan Minister zahawm tak takte demand hi ka pawmpui a, ka rawn thlawp a ni e.

Pu Speaker, ka lawm e.

SPEAKER : Tunah chuan Member zahawm tak Pu RM Chakma ilo sawm ang.

PU RASIK MOHAN CHAKMA: Pu Speaker, vawiinah kan Minister zahawm tak tak pahnihte demand sawihonaah hian a hmasa bera ka sawi duh chu, sawlam atanga kan din reng reng hian kan House member-puite hian vui tur hmuhin min hmu thin a. Vui reng hi kan peih lova, lawmthu sawi hi kan chak thin a; lawmthu sawina tur kawng erawh min siamsak turin ka ngen che u a ni. Chuvangin sawlai area, a bikin Mizoram khawthlang leh chhim lam pawh hi ‘Mizoram bung khat a ni ve a ni’ tih hi, kan ngaihtuahnaah te, kan hnathawhnaah te hian awm ve hram se, tih hi ka ngen ngawih-ngawih a. Mi-khawngaihthlak kan tling a, saw lamah awmte saw in mihringpuite tho kan ni a, duhsak kan phu ve a ni. Saw lam min duhsak anih chuan, Pu Speaker, sum lama malsawmna pawh in dawn ka ring a ni. Nam nul deuha an kal erawh chuan malsawmna dawn chu a har khawp ang a. Chuvangin, vui leh vai reng hi thil nuam a ni lova, lawmthu sawi te kan rilru ah pawh a awm thin a. ‘Sorkar hmasa ah pawh an ti hleinem’ tia namnul mai lovin, kalphung-thar sorkar hi rilru fim taka ngaihtuahna hmang turin ka ngen duh a.

Demand No. 45 - Public Works Department:

Public Works Department hi inkalpawhna lama kan dinhmun chu Pu Speaker, tun atanga thla hnih-khat ral hnu ah chuan Kamalanagar khawpui, Chawngte bak hi motor-in kan pel thei leh dawn lo a ni; a bak chu ke emaw, lawng emaw tea kal a ni mai. 21st Century hnua hetiang dinhmuna kan la awm hi chu, ‘in khawngaihthlak em mai’ min tih loh chuan, in cruel hle tihna a ni. Hmasawmna kan duh a, kan PWD Minister Pu Hlana pawh kal thuai a tumin ka hria a. Chawngte-ah a vawikhatna atan a lo kal ang a, memory tha tak a siam kan beisei a. Kum lo kal leh zel tur, kum 100 thlenga kan sawi tur hn atha tak min thawh sak ngei kan ringin, kan sawm bawk a ni. Mipui pawhin an nghakhlel khawp mai a, kan PWD Minister hian kan bial min tlawh chuan kan lawm khawp ang.

Kuminah hian PMGSY atangin Kurbalavasora - Ugudagury South department-in an take-up tih thawm te kan lo hria a, a tak anih chuan a lawmawm viau ang a. Nichina Zawhna leh Chhanna-a ‘leilawn pali sak tur’ tih kha, a hma atang khan heng leilawn 4-te hi sak ni se chuan, kawng tha kan nei ang a, sum pawh khati zozai kha kan seng lo tur a ni a. Kan kawng a chhiatna lai pawh a tlangpuiin leilawn awmlahna lai vek a ni a. Engpawh ni sela, leilawn pali hi sak theih dan kawng he sorkar chak tak hian min zawnsak se. State-sorkar ve meuh leihlawn pali te tak te te sak pawh kan sa thei lo a ni a. Tum tak tak ula chuan kumin chhung pawh hian in tih theih ka ring; tum leh tumloh kar hi a hla lutuk a. Chuvang chuan in tum ngei pawh ka ring a ni.

Tin, kan area-ah hian road-planning fuhlo tak tak a awm nual a. Entirnan: Vaseitlang - Mainabapsora te pawh kawngtha tak min siamsak a, a contractor pawh ka fak khawp mai a. Mahsela, Longpuighat - Vaseitlang erawh furah chuan hman ngaihna a awm lo a ni. Chutiang bawkin Vaseitlang-II - Lokisuri hi pavement tih vek a ni nachungin, a road planning fuh lo lutuk avangin a hmantlak loh a ni.

Kan officer-te min hrilh dan chuan, kumin PMGSY kawng lai tur hi Delhi lamah data upload hnu-in automatically in a serial indawta tih tur ni awm tak a ni a. Fund remchang dang atang pawhin Lawngpuighat - Vaseitlang road hi chu a siam dan min ngaihtuahsak

ula ka ti khawp mai. A chhan chu cutting leh eng emaw lai kha company in an thawh tawh avangin, a black-topping chauh kan mamawh a; km 6 vel chauh a ni a. A bak chu kan PWD Minister Chawngte-ah arawn kal hunah detail deuh hlekin kan sawi ang a. Amahin mit ngeiin a hmu ang a, hmasawna nasa tak kan neih ka ring a ni. A chungah rinna ka nghat tlat a ni.

Demand No. 24 - Transport Department:

Nikumah pawh ka sawi tawh a. Chawngte, Borapansury leh Lawngpuighat te hi township deuh an ni a, auto-rickshaw permit te hi min pek ve dan a awm em? Kan mamawh si a, permit lova service kan tam a; hei hi sorkar tan sum hlohna a ni a. Lunglei te emaw leh khawilai traffic jam awmna emaw ah chuan khuahkhirh a tha ka ti a, saw lamah erawh chuan chuan traffic jam te a awm lova, a diltu apiang chu pek mai chi an ni a. Taxi permit te, auto-rickshaw permit te duh angin an hmu theilo hi a paw ka ti a. Kan Minister zahawm tak hian heng permit te hi min pek dan ngaihtuah hram se ka tih le a. Chawngte, Borapansury leh Lawngpuighat tea permit dil apiang te chu pek ni se, tax lak tur awm kha lak mai ni se a tha mai lo em ni ka ti a ni.

Demand No. 24 - Health & Family Welfare Department:

Healthcare facility ah hian kan hnufual khawp mai a; kan NGO-te pawhin protest siam te an rawt avangin, eng eng emaw chu min tihsak a. Mahse, a la tawh lo a ni. Doctor te min dahbellh sak sela. Lawngpuighat PHC ah doctor pakhat min dah sak a, a lawmawm a. Approach Road hi Tribal Affairs-ah khan a awmin ka hria a. Approach Road a awm loh chuan a function tak tak theihloh a ni.

(Hon. Dy. Speaker at the Chair.)

Tin, CADC area-ah chuan Borapansury hi Chawngte aimahin khawlian a ni a, Autonomous District Council awm tirh pawh khan Govenror khan headquarters atana hman te pawh a tum a ni a. PHC building hi vawi hnih an sakna a ni tawh a, a hmasa ber kha chu kum 20 hmalam daih ami a ni a, a function hmain a chhe vek a. Tichuan, PPP Mode-a sak that leh a ni a. Ka tawng huatthu ni lo sela, khati laia District Council khan kha kha engtin nge an accept theih aw ka ti thin a. Khatiang anih chuan engtin nge District Council hian hospital kan run ang? Dettol leina tur takngial pawh pawisa pek tur kan nei lova, run ngaihna a awm lo reng reng a ni. Chuvangin, a building a chhiat tak tak hmaa sak that kan mamawh a. Tin, hamnrua eng eng emaw te a awm a, a enkawltu mumal awmluh chuan a chhe mai dawn a, sorkar pawisa a uihawm dawn lutuk a. Borapansury-ah hian x-ray machine tha tak tunah hian a awm a ni. Khangte kha min tihsak sela. **(Dy. Speaker:** Kan zo thei dawn tawh em?) Ka zo tep tawh e; minute lek chauh.

Demand No. 9 - Social Welfare Department:

A department hming hi ka hriatdan chuan Social Welfare & Tribal Affairs niin ka hria a. Hetah zia lang lo mahsela, Tribal Affairs lam kha a la khawih tel thovin ka hria a. Pu Dy. Speaker, Tribal Affairs-a Constitutional Provision Article 275 (1) hi a landan chuan Autonomous District Council-te hi 'Schedule Area' tih a ni. Schedule Area-te administrative improvement tur 'central sorkar consolidated fund atanga special fund provide a ni ang' tih kha a awm a. Mahse hetah hian 'schedule-tribe area' tih a nih chuan State pumpui kha schedule tribe area a ni tihna a ni a. Mahse Constitution-ah chuan 'Schedule Area' tih a ni; hei hi schedule tribe area tihna angah pawh la ta ila. Mahse,

Constitution-in ‘Schedule Area’ a tih anih avangin State sawrkarin a duh chuan special provision a pe thei a ni. Central sawrkarah sawi mah ila, federal system kan nih vang khan State sorkar kha a zah lo thei lova. Mahse, Constitution kan en erawh chuan special sanction min pek hi kan phu ve a ni.

Demand No. 43 - Tourism Department:

Chawngte hi kan vanduai thin a, Pu ZH Ropuia Minister nih lai khan plan tha deuhin an siam a, a hlawhtlin hmain sorkarna a inthlak leh bawk si a. Khata pawisa dah pawh kha khar tel a ni a. A hnu ah amount tih niama ska a ni a, chu chu tuna building kan hman mek hi a ni a.

Tin, sorkar hmasa Pu Robert Romawia Royte khan hunlai khan SASCI atangin crore 1 a ni leh a, tun thlenga la chhuak lo kan sawi ah khan a tel ve a nih ka ring a. Chutiang te a nih si chuan, Tourism Minister hian khawngawih takin Chawngte hi mi tam tak, ram pawn atang te pawhin tlawhtu lo kal an tam thin a, facilities tha deuh min ngaihtuahsak turin kan kan Minister hin ka ngen duh a.

A tawp ber atan chuan, Pu Dy Speaker, kan thusawite kha min hriatpuia, hma min lak sak turin ka ngen tak meuh meuh a ni. Ka lawm e.

DEPUTY SPEAKER: Tunah chuan, Pu W. Chhuanawma, Khawzawl bialtu ilo sawm ang.

PU W. CHHUANAWMA: Pu Dy. Speaker, ka lawm e. Vawiin ah hian kan Minister zahawm takte Pu Vanlalhlana leh Pi Rinpuii te demand sawi ho tura kan awmkhawm hi lawmawm ka ti a, sawi ve theia ka awm pawh hi ka lawm hle a ni.

Demand No. 45 - Public Works Department:

Ka biala Sinzawl Road hi Khawzawl atanga a hmar lam Rabung leh a piahlam zawng zawng khua ho an chak-lakna leh an lifeline a ni a. Hei hi repair leh maintain loha a awmna a rei tawh hle a,. Tunah hian kawng a chhe lutuk a, a kal hleih theih loh a ni. Chuvangin, PWD lamin hma laksak a duhawm khawp mai a. Changkanna hi kawng tha tel lo chuan a awm thei lo a ni. Tin, East Tuipui Bialtu Pu Ramthanmawia khan, Zawlsei-Mualcheng-Keitum road a short-cut dan tur a sawi aia a short-cut zawk dan tur a awm a. Bungzung atanga lo chhuk thlain hnai te tak takah Tuite kan zeuha Tuipui lei dawh a ngai a; chumi kan zeuh chuan Chawngtlai pawh km 7 km vel leka hla a ni. Tichuan, Chawngtlai - Khawzawl hi km 10 vel bak a ni lo ang. Chutiang chuan, National Highway kawng thar tha tak maiah khan an rawn kal dawn a ni. Chutiang chuan Khawbung RD Block South lam zawng zawngin an chhawr tur a ni a, hei hi kan member-pui zahawm tak sawi ai khan a tha zawk a, ngaihpawimawh a tan a tha hle a ni.

Demand No. 9 - Transport Department:

Pu Dy. Speaker, changkang tur chuan, freedom of navigation hi a awm ve a ngai a ni. Two-wheeler pun chak em emna chhan hi intlan-chhawk vang a ni a, aman tea lo to lutuk lo bawk a, an tlan loh nia tlanna tur lei vek an niin ka ring a. Chung zawng zawng tih reh nan chuan two-wheeler tal hi chu intlan-chhawk ni lo sela. A chhan chu, intlan-chhawk hian hnathawh a ti khaihlak a, kan changkan tur angin mi a tichangkang lo thei a ni.

Demand No. 24 - Heath & Family Welfare Department:

Pu Dy. Speaker, changkanna tur leh mihring te tana ka ngaihpawimawh em em,

department zawnz zawnz zinga pawimawh nia ka hriat chu, Health Deptt. hi a ni a. Mihring kan inthlahna ber chu kan damloh hun hi niin ka hre thin a. Miretheite-damloh leh mihausate-damloh inkar hi a hla em em thin a ni. Hei, 'Khawzawl District Hospital' tih a lo ni ta a; amaherawhchu, a nihna tur ang takin a la function lo a. Han sawi ta ila - nerve problem han neih hian natna vang tak keimah chauha ka tawrh emaw ka ti a, an lo tam em em mai a, kei chauh hi ka lo ni lova. Chutiang deuh chuan, kan harsatna, 'khilaia kan mamawh leh kan tlakchhamte ka sawi ang a, mak an ti awm mang e', ka tih lain, kan lo ni deuh vek mai a, a sawi zawnz-zawnz te kha, Entirnan: Mamit bialtu zahawmtakin pharmacist an neih loh chung kum rei tawh zia kha sawi a ni. Keipawh Khawzawl Hospital atangin kum 8 liam ta ah khan pharmacist pakhat a pension a, a dang dah a la ni lo a ni. Chutiang chuan, thawktu indaihlohna midangte pawh khan an sawi nasa a ni. Ka rilru a ka inzawh tak ber chu - 'State kan nih hnu kum 40 dawn liam ta chung khan kan sorkar hian engge maw a lo tih le' tih te inzawt ta ila, awmlo pawh a ni awm lo e.

Tichuan, ka ngaih pawimawh em em chu - Healthcare Scheme tan hian kan budget ah khan crore 20 ni thin kha, crore 50 ah tihpun a lo ni ta a hi a lawmawm ka ti em em a. Tin, Mizoram Universal Health Care Scheme hman tumna a awm niin ka lo hria a. Hemi chunchanga ka sawi duh chu - Eng anga universal emaw, eng anga tha pawh ni sela, mirethei, mi-bawrhwawmte chauh he healthcare scheme ah hian an inziak lut a nih chuan, a hlawhtling ngaiin ka ring lo a ni. Insurance company te pawh hian mi-bawrhwawmte chu an duhin ka ring lo. Tin, kum-upa, hei, keini ang te phei chu insurance policy la turin mi an duh tawh lo reng reng a ni. Chutiang te chu a ni a. Chuvangin, mi-bawrhwawmte chauh an inziah luh chuan, eng anga scheme tha pawh nise a hlawhtlin a rinawm lo a ni. Chutiang a nih avang chuan Pu Dy. Speaker, inziak lut tur hian, Mizote chu mi khawngaih thei tak, intanpui thin hnam kan ni a; damloh ni-khua ah pawh sum ten kan inkar thin a. Tin, thih ni ah te pawh sum te'n kan inral thin a ni. Chuvangin, he healthcare scheme hmang hian Pathian zara mi-hriselte leh mi-hausate'n damlo kan ve sela, khatiang zawnz awareness campaign kan neih ngat chuan a hlawhtlingin ka ring a.

Tun 1st Oct, 2024 atanga kumin March thla chung healthcare scheme-a inziah luhna hun pawhsei hun chung khan Mizoram population nuai 10 chuangah mi 49,000 leh tih chauh an inziak lut a ni. He thil a tul dan leh missionary hnathawhna kawng pawimawh tak a nih dan hi kan hre tawh lo niin ka hre thin a ni.

Chuvangin Pu Speaker, hand-holding policy kan tiha online-a an tih zung zung ang deuh hian Aizawl khawpuih ngat phei hi chuan office-a va kala va inziak lut tur hian mi hriselin an peih thin lo. Chuvangin, an in atanga an tih zung zung theihna tur hi ngaihtuah a thain ka hria a. Thingtlangah pawh an tih, mi-hrisel leh mi-ngilnei tena damlo an kanna tur anih hriain VC zawnz zawnzge hian inelna atan hmang sela, khang sum tlingkhawm khan miretheite'n inenkawl nan hmang ve sela.

Ka bial chung hi tehkhin nan han hmang ta ila. Dik tak chuan mirethei te-te natna tuar fan-fante an va inentir a, 'chutah kal rawh; Aizawl ah emaw, Champhai ah emaw kal rawh' tih zel a ni thin a ni. An tuar an tuar a, a tawpkhawkah an va kal a; doctor-in an lo sawi ber chu 'I varawn tlai ve' tih te hi a ni fo a ni. Chuvangin, medical equipment zawnz zawnz ka bialah te pawh heng - X-Ray khawh te, Endoscopy leh Ultrasound khawh te phei hi chu natna zawnchhuah nan a hmantlak tawh loh thu doctor te pawhin min hrilh a ni. Chuvangin, va kal pawhin awmzia a nei vak lo. Heng zawnz zawnzge hian, ka sawi ang

khan mi-harsate leh mi-bawrhsawmte inenkawl theihna turin khatiang policy kha kan Health Minister thothang tha tak leh official ten ngaihtuahna hmang ta sela kan sawtin, kan changkang sawt pawhin ka ring a ni.

Tichuan, Pu Dy. Speaker, kan tlakchham zawng zawng hi midangte pawhin an tlakchham a lo ni ve tho si a. Vawihnih lai bell a ri tawh bawk si a, nakinah a bik taka la kawm te pawh a ngai tawh mai thei. Chuvangin, kan demand vawiina kan sawiho hi lawm takin ka pawm a, pass ila ka ti. Ka lawm e.

DEPUTY SPEAKER: Nichin khan ‘Khawzawl bial’ ka tia, ‘Tuichang bial’ tih zawk tur a ni a; ka lo tih sual a ni e.

Vawiin kan thusawite a pawimawh khawp mai a. Retheih hrehawmna ber pakhat chu - damloh hi a ni a. ‘Chumi damdawi chu ei ila; chu damdawi-in chu pan ila, ka dam ang maw le’, tih thin hi a ni a. Chuvangin, Healthcare Scheme vawiinah kan han sawi a, a lawmawm tak zet a ni.

Tunah chuan, Pu Zaithanzama, Aizawl West-III bialtu ilo sawm ang.

PU VL. ZAITHANZAMA: Pu Dy. Speaker, ka lawm e. Vawiinah kan Minister zahawm tak tak Pu Vanlalhlana leh Pi Rinpuui demand te kan sawi a, kan tui tlang viauin ka hria a. Mahni veng leh khaw lama kan mamawhte kan report khawm a ni ber a. Kei pawhin ka thiam ang angin ka’n sawi ve dawn ang e.

Demand No. 42 – Transport Department:

Pu Dy. Speaker, ka hre thuk vak lo na a, ka’n zawt kual a. Pu Dy. Speaker, taxi permit online booking system hman dan tur an buaipui mek niin ka hria a. Hei hi mipui tan thil tangkai tak tur anih avangin kan nghakhlel viau hlawmin ka ring a. Amaherawhchu, ‘engtikah nge kan peih dawn’ tih, kan Minister hian min hrilh nghal theih chuan ka lawm hle ang.

Pahnihna-ah chuan, City bus zingah lian pui-pui eng emaw zat hi a la tlan a, heng hi tihtawp tum niin ka lo hria a. Traffic jam eng emaw chen hei hian min chhawk turah ka ngai a ni. Kan hman tangkai tak Sumo hi khaw kar kawng vela kan vei-vahna ber a ni a; a company lam hian an siam tawh lo ni hian ka lo hria a. Tuna kan hman lai hian chhiat hun a la nei dawn a, chutih hunah chuan ‘engin nge kan thlak ang’ tih thutlukna siam te a la ngai dawn a. Thutlukna pawimawh tak tak siam tur hian finna an mamawh hle dawn a ni.

Demand No. 45 - Public Works Department:

Public Works Department ah hian, kan Minister zahawm tak leh department-a thawkte chungah lawmthu han sawi hmasak ka duh a. Ka bial chhungah Maubawk - Lawipu kawng chhe em em mai, kum 10 tam mumal taka repair tawh loh tha em emin min han siam sak a, kan lawm em em mai a. Ka bial mipuite aiawhin lawmthu ka sawi a. A thlang lawkah Reiek kawng a awm a. Tin, Maubawk veng chhungah km 1 vel tlem han tuai that ngai a la awm a. Hei hi min tihsak leh se chu kan lawm hle ang a; min tihsak leh ngei theih nan ka’n dil nghal ni bawk se.

Demand No. 29 - Social Welfare Department:

Pi Rinpuui Demand lamah hian lawmthu han sawina tur thil thar a tam riau a. Social

Welfare Deptt. hnuaiia ruang-phurhna kha kan kan party-manifesto a ni a. Budget session hmasa berah khan kan party-manifesto tihhlawhtlinna atan ruang-phurh senso tur budget ah khung nghal a ni a. Hei hi 1st Sept. 2024 atang khan hman tan nghal a ni a, mi a chhawk nasa hle mai a. A bik takin MLA te min chhawk a. Thihna avanga buaina tam tak kan tawhte min chhawk zangkhai nasa em em a ni.

Pathumna-ah chuan, gender-budget, kan la hriat ngai loh thil thar, hmeichhiate dawmkanna tur, anmahni pual budget hmasa ber a lo lang hlawl mai a, crore 74 lai ruahman a ni lehngal a. Kei tak phei chuan a awmzia ka hre lutuk lo na-in, thil thar tha tak ni turah ka ngai a. Tichuan, thil-thar hi a ti teuh mai a, kan minister zahawm tak hian. Pension chungchangah tar-pension ti ta bik ila; Central-in minrawn pek hi state government-in cheng 100/-in kan lo dolet thin kha a ni a; chu chu 1000/-a tihpun a ni a. Cheng 300-400/- dawng thin khan 1200/- an dawng pha ta a. Kum 80 chunglam cheng 600/- dawng thin khan tunah chuan 1500/- zet an dawng ta a. Tin, rual-banlo pension 400/- ni thin khan 1300/- a lo ni ta hi an lawm em em a ni. Budget-a a lan hlina an la dawn mai loh pawh khan an nghakhlel em em mai a. Tunah hian tar khawngaihthlak tak takte hei hian a tilawmin, a tanpui nasa em em a ni.

Palina-ah chuan, Eklavya Model Residential School (EMRS) 11 kan neih zinga 4 - Ngopa, Chawngte, Tuipang, Lawngtlai-ah te CSR fund hmangin smart-class room HDFC Bank kaltlanga pek an ni. Hei hi an lawmpuiawm hlein ka hria a. Khawpuiaschool tam takin an neih phak loh smart-class room Aizawl atanga hla tak tak thingtlangah te hian an nei a ni.

Demand No. 24 - Health & Family Welfare Department:

Hetah pawh hian thil thar kan hmu leh nual mai a, hmeichhia hian thil thar an ngaihtuah chhuak thiam viau dawn a nih hmel a. Public Health Clinic, doctor indaihlohna nasa tak puhrukna tur, ZMC doctor zirchhuakte PHC hrang hranga thawk tura lak an ni a, PHC tinah doctor dah an lo ni ta hi a lawmawm hle mai a. Hei hian Aizawl-a damlo thingtlang atanga rawn inphurluh ngai tawh lovin anmahni hmun PHC-ah an inenkawl thei dawn tihna a lo ni ta a, a lawmawm hle a. Thil-thar beisei phak loh thil thlang a ni.

Zemabawk Cancer Hospital-ah 4th December, 2024 atang khan cancer zai ngaite zai theih an lo ni ta a, he thil hi tunhmaa tih daih tawh, doctor, a zaina room leh hmanrua engkim awm si kha, a thawktu lam indaihlohna avangin kan lo ti lawk lova. Hei hi kan minister zahawm tak hian hriain, Anesthetist, nurse leh Group-D staff-te awm loh vanga tih loha awm kha an siam a, an pe a, tunah hian cancer zai ngaite chu zai theih a lo ni ta a ni.

Hetah hian thil-thar bawkan hmu leh a, Vahui-online grievance portal hi mipuite'n Health Department hnuaiia harsatna leh vui-vaina awlsam taka an thlen theihna tur hmanrua tha tak a ni dawn a. Vui-vaina leh harsatna han neih hian tu hnenah nge thlen tur tih pawh mi tam tak chuan kan hre lova, kan ngam mai lo thin bawkan a. Chuvangin, vui-vaite tan lungawi lohna leh harsatna thlenna tur awlsam tak he online portal siamchhuak a ni hi a lawmawm hlein ka hria.

Demand No. 43 - Tourism Department:

Hetah pawh hi lawmthu sawina tur hlir a ni a. Berawtlang-Tourist Resort Centre lakh 606 senga chei that mek, 90% zet zawh tawh hi a lawmawm hle a, a hmun va kal pawh a tichakawm hle a. Chu aimah pawha thil lawmawm chu - Lengpui Airport-a khualzinte

tlangnel leh nuam taka an khawsak theih nan anmahni buaipuitu tur dah an ni ta hi lawmawm ka ti a. Hei hian khualzinte tana thil lawmawm tak a thlen dawn tih a lang reng a ni.

Pu Dy. Speaker, vawiina kan minister pahnihte demand hi tha ka ti e. Ka lawm e.

DEPUTY SPEAKER: In line kha chu a speed kha a muang dawn a, kan duhsak deuh ang che u ka ti a; mahse hun in vawng dik ber zawkin ka hria. Vawiin chu official ten min tawiawm tha khawp a, a lawmawm takzet zet a ni.

Tunah chuan Tuirial bialtu Pu K. Laldawngliana ilo sawm ang.

PU K. LALDAWNGLIANA: Pu Dy. Speaker, ka lawm e. Vawiinah kan Minister zahawm tak tak Pu Vanlalhlana leh Pi Lalrinpuii te demande sawihona hun tha tak mai kan nei hi ka lawm tak zet a.

Demand No. 24 - Health & Family Welfare Department:

He department chanah hian nikum aia a tlemna hi kan sawi ang khan 1346.71/- a ni a. Lawmawm deuh mai chu, kan minister hi a chak a, a fel bawk a, MLA-te pawh min kil-kawi that avangin a chungah hian lawmthu ka sawi hmasa ber duh a. Mizoram mipuite mamawh MRI khaw kan kan nei thar te hi a lawmawm ka ti khawp mai a. Healthcare scheme te pawh hi kan mamawh avangin Asia Development Bank atanga sum han puk belh tur kha Ni 25 February khan proposal thehluh leh tawh a ni a, khang te kha bawhzui zel a niin ka hria a, a lawmawm hle a ni.

Tin, sawi ang khan, sorkar hmasaah khan hmalakna tam tak a awm a. Pu Dy. Speaker, Hospital ICU 106 lai siam thar a ni a, mahse function hi 82 a ni. Ka sawi duhna chhan chu, a function lo 24 te hi engnge a chhan; siam that theih a ni em tih kha. Chutih rual chuan, ZMC Falkawn-ah hian Critical Care Block - khum 50 awmna tur siam mek a ni a, November, 2026-a zawh hman tura tih kha a ni a. Hei hi ICU leh HDU-a hman tur a ni te hi a lawmawm hle a ni. Kan bial chung Lungdai CHC-a kan mamawh em em, x-ray khawl kan lo nghakhlel hle mai a, Bukpui CHC-ah khan kan beisei bawk a. Tin, Kawnpui CHC doctor hi kan thlak reng mai a; pahnih awm thin kha, pakhat chauh a awm ta a. Kan indaihlo hle mai a, Mualvum sipai awmna hmun nen an kawp avangin. Hei hi min lo chhinchhiah sak bawk se.

Tin, Hortoki-a kan mamawh em em Ayush Hospital tur kha bawhzui zel a ni em? Engnge a thlen chin ka hre duh bawk a. Tin, Thingdawl-Nursing College kha min upgrade sak avangin lawmthu kan sawi duh bawk a. Tin, sorkar damdawi-ina Dialysis Centre panga-te kha a la tha zel em; a dang dahbelh tumna te a awm em tih te ka'n hre bawk a ni.

Tin, thil lawmawm leh kan mamawh em em - nurse 50 chuang, casual nurse 300 chuang leh doctor-te lak belh tumna a awm hi a lawmawm hle a ni. 'Cancer super-specialist' kan tih JAICA project kal mek kha kalpui chhunzawm zel a ni em, tih te kha min lo chhinchhiah sak bawk se.

ZMC pawh hospital zinga tel a ni hi a lawmawm ka ti a, hmasawna sawi tur a tam tak zinga sawilan ka duh chu - ZMC hospital zinga telh a ni hi khum a tam belh khawp mai a, 470-bedded-a upgrade a ni a. Tin, ICU a awm belh teuh bawk a, thildang pawh tam tak a

awm a ni. Kan mamawh ber MBBS doctor, an zavaiin mi 550 bawr vel zirlai (internship ti mek nen) an kal mup mup mai a, hengte hi hmasawna ropui tak anih avangin ka'n sawilang tel duh bawk a ni.

Tichuan, healthcare bill mi 1925-te hnena la pek loh 6th March, 2025-a mi ₹69,12,590/- hi pek a nih thuai kan beisei a. Chutih rual chuan, 1st April atanga cashless-healthcare awm tur te hi a nghahhlelh awm hle a ni

Demand No 29 - Social Welfare Department:

A budget nikum aia a tamna hi lakh 6572.56/- lai a ni a, a lawmawm tak zet zet a ni. Social Welfare-ah hian Article 275 hnuaia fund hrang-hrang hmuh thin Art & Culture Department-a dah tak daih hi technical lam mi an pawh ka hre silova; hei hi engnge a chhan nakinah min hrilhfiah sak sela a thain ka hria. Chutihrual erawh chuan, Social Welfare Department hnuaiah hian Art & Culture Department awm tura ruahmanna a awm niin ka hre leh lawi bawk si a; kha vang pawh kha a lo ni thei a.

Hei ka bial chhung thil han sawilan loh theih loh chu - sorkarin ruihhlo ngaite enkawlna tur hmun tha tak mai Sethawn-Jordan Centre, Thingdawl-ah kan nei a; hei hi waviin ni thleng hian hmalak-chhunzawm a ni lova; tikhuan hnathawk tlemte an awm a, rauhsan ang deuhthaw maia a awm khu a lainatawm ka ti a. Hei hi Pu Speaker, kan minister pawh hian a ngaipawimawhin ka hria a, sorkarin kan la leh dawnin ka hria a; privatised tumna kha a fail-in ka hria a. Hei hi changtlung zawk leh tangkai zawka kan hman theihna turin sorkarin chak takin hma la se tih kha kan sawilang tel duh a. A theihna chinah chuan a bialtu MLA te hi chu ngaipawimawhin, a committee ah te min telh ve se tih kha House kaltlang hian ka request duh bawk a ni. A chhan chu, MLA fund te a tul anga hmana han back-up te kan duh thin avangin ka sawilang tel duh bawk a ni.

Tin, Women-Helpline leh Child-Helpline te hi mipuiin kan hmang tangkai em; 24 hrs call theiha awm hi kan call nasa em; kan call mang lo em, tih te ka rilruah a awm a, ka'n sawi kai tel duh bawk a. Tin, hmeichhe-hleihlenna tawh tanpui ngaite hi engtiang takin nge kan tanpui thin, tih laia hi min lo chhinchhiah sak bawk sela.

Pu Dy. Speaker, ruang-phurhna hi chu a lawmawm a ni. Mahse, Pu Dy. Speaker, ka'n belh duh chu, (bial dang kha inni ve em ka hre lova) kei chu ka bial hi a hnai deuh hlek avangin ruang phurhna man aia to hi kuang manah sen a ngai deuh tlat mai a; hei pawh hi tel theih ni sela aw, tih hi ka ngaihtuahnaah a awm bawk a ni.

Demand No. 43 - Tourism Department:

Tourism-ah hian nikum budget aia a tlemna kan sawi tawh a nuai 226.36 a ni a. Pu Speaker, heti chung chung hian Tourism-ah hian hmasawna leh hmalakna tam tak sawi tur a awm a, khalam kha chu sawi belh teuh lo ila. Pu Dy. Speaker, kan Minister khan min lo chhinchhiah sak sela - nikum khan ka bial Khamrang-ah (NESIDS) kaltlang project, Development of Village based Eco-Tourism Ministry atanga 19th April, 2022 daiha sanction tawh a hna kha a tawp ta rup mai a; hei hi min bawhzui sak em; chhunzawm theih zel tur a ni em, tih te kha min lo chhinchhiah sak bawk sela. Tin, Leitlangpui Music Festival kha hlim taka hman a ni a; sum sen pawh nuai 20 vel chauh niin ka hria a. Kha kha kalpui zel tumna a awm em, tih te ka'n zawt tel duh a. Tin, Chaltlang Tourist Lodge hi midang kuta hlan tura tih niin ka lo hria a, kan hlan fel tawh em ka hre lova. Eng star-hotel tur nge;

Mizoram sorkar tan hlawkna tur a awm dawn em; engnge kan hlan chhan, tih te Pu Dy. Speaker, min hrilh theih chuan a lawmawm hle ang a.

Demand No. 42 - Transport Department:

Transport Deptt. chungchang hi, nikum budget aia a tlemna hi nuai 128.41/- a ni a. Pu Dy. Speaker, i sawia sawi ang ka nihnaah, district tinah Transport office awm lohna a awm lovin kan hria a. Keini Kolasib District Transport office hi Aizawl dawta chhiah, revenue pe tam ber, pe tha ber kan ni tih hi ka sawi duh a. Chuvangin, Kolasib hmunah Pollution Testing Centre tha deuh min rawn dah sak ula. Tichuan, kal a harsat deuh avangin, ka bial chhung-Kawnpui-ah rawn dah bawk se; hei hi min lo chhinchhiah sak bawk se. Tin, two-wheeler taxi service theihna 10 zingah Kawnpui min telh avangin lawmthu ka sawi bawk a. Kan hriat angin kum 2023 sorkar atanga tun February, Ni 10, 2025 thlenga driving license la thar 19,243 an awm a, lirthei register 35,911 an awm bawk a. hei hi ka'n sawi duh chhan chu Pu Dy. Speaker, naupang deuh deuh license nei lo, nu leh pa khuahkhirh si lohin veng tinah hian an khalh nasa lutuk hi strict lehzuala kalpui theih nise a tha awm mang e, tih kha ka'n sawi duh bawk a.

Demand No. 45 - Public Works Department:

Hetah hian a budget a tlem phah khawp mai a, nuai 743.47/- a ni a. Heti chung chung hian 8th December, 2023 atanga tun thleng hian department work hnathawh hi 249 a ni a, hengte hi tender veka thawh a ni a. Supervisor hnuaiyah tha taka an thawh kan beisei a ni. Kawng siamna 2024-2025 atan cheng nuai 10,0769.17/- dah niin, hman zawh vek tawh a ni a. Hei hi km 1 zelah ₹49,300/- anga chhut anih thu kha kan hmu tawh a; heng hi mipui hriatah kan sawilang duh hrim hrim a ni.

Pu Dy. Speaker, a hma pawh khan PWD-a sum pek kha CM te, Speaker te, Dy. Speaker te, Minister te, Adviser to CM te, Dy. Chief Whip te zawng zawng enkawlnaa sum cheng nuai 227,18,150/- hi, hei hi kum khat atan nge, kum nga chhung tur tih ka hriat loh vang a ni a. Hei hi kumtin tur anih chuan, senso hi a tam lutuk ka'n ti ve deuh hlek a nih chu.

Tin, Thingdawl ah hian building senior tak Polytechnic building, EE, PWD enkawlna hnuai ah a awm mek a. He building sakna tur proposal kan session apiangin ka sawi thin a; kan Minister hian hei hi min lo ngaihven sak thei se ka'n ti deuhhlekk a ni. A kalkawng hi kan hria a, National Highway Kawnpui - Khamrang hi a tlangpuiin zawh a ni tawh a, Thingdawl thleng NHIDCL in a ti tawh a; a that leh that loh erawh chu zuk kal ula a Chiang mai ang a. Chutiang chuan, tunah hian Lungdai atangin BRTF in an ti mek a, sorkarin an enkawl a, kei pawh a hmunah ka zuk kal tawh a. Trip 6 vel phei chu a kir tir tawh a, a that loh avangin. Tunah hian YMA leh VC ten an venpui mek a ni, tih kha kan sawilang tel leh duh bawk a ni.

Pu Dy. Speaker, duhtawk mai ila. Kan Minister zahawm tak takte pahnih demand hi tha ka ti a, ka pawmpui e. Ka lawm e.

DEPUTY SPEAKER: Ni e; Kolasib District te i sawi ri nasa a, i pel tam lovin ka hria. Tunah sawi leh turin Lt. Col. Clement Lalhmingthanga ilo sawm ang.

LT. COL. CLEMENT LALHMINGTHANGA: Pu Dy. Speaker, ka hmaa mite sawi ang khan, Lady's first-norm kha kan zawm tlangpuiin ka hria a, kei pawhin kan Lady-minister

awm chhun, Minister zahawm tak Pi Lalrinpui demand atang hian ka tan ang a.

Demand No. 24 - Health & Family Welfare Department:

Mizoram-ah hian healthcare scheme pahnih kan hmanh mek a, MSHCS hnuaiah hian 2 lakhs thleng a bill theih a. Tin, pakhat leh - ABPMJAY hnuaiah hian maximum 5 lakh thleng a bill theih bawh a ni. Hengah hian tunhma lam, eng emaw chenah harsatna te a lo awm a. Chu aia huap zau zawk, term hmasa lamah te pawh crore 4 zet healthcare scheme bill claim theih loh a awm thu te kan hria a. Tunah hian scheme tha zawk - Mizoram Universal Health Care Scheme (MUHCS) chu rawn introduce a ni hi a lawmawm ka ti a. Hei hi universal a nih angin, a tute tan pawh he healthcare scheme-a inziahluh theih a nih hmel a.

Ka hmaa member zahawm tak Pu W. Chhuanawma appeal rawn siam kha a pawimawh ka ti a. He scheme tihlawhtling tur hian mi-harsa zawkte leh tute emaw chauh tih tura kan dah chuan a success dawn lova. Tin, mitin, a nei zawkte pawhin an mahni tan chauh ni lo, midangte kan puih theihna tur a nih hriaa, hr healthcare scheme-a kan inziahluh vek chuan kha kha a lo changlung zawk ang a, mi tam zawkte'n he scheme atanga facilities tha zawk an neih theihna tur a ni tih hriaa kan tan-tlan vek theih a pawimawh ka ti khawp mai.

Tuna kan sorkar hmalakna mek tipuitling tur hian hospital a tam thei ang ber empanel a tum a, chumi a tumnaah chuan district level thlengin sorkar hospital zawng zawng thuam that a tumna ah te, doctor indaihlohna te, doctor Specialist te, tin, pharmacist atanga nurse te thlenga new-recruitment neia thuam that tum mek niin, chak taka hmalak mek a ni a, Tin, MLA zawng zawngte hian tha kan ti a, kan thlawp em em a, chuvangin, hemi project tihlawhtlinna turin MLA zawng zawng hian ₹5/- lakhs theuh theuh kan contribute dawn bawh a ni.

Demand No. 29 - Social Welfare Department:

Social Welfare hnuaiah hian old-age pension-ah hian kum 69-70 inkar tana Central in a a rawn tum thin a hi ₹200/- a ni a, tunthleng in a la ngai reng a. Hetah hian ka hriat chinah chuan State-in a lo doletna (State-share) kha ₹50/- a ni thin a. Sorkar hmasa khan a letin a tipung a, a leta a tihpun hnua State-in a a tum chin kha ₹50/- atangin ₹100/-ah a tipung a, ₹250/- ni thin kha ₹300/- per month a ni ta a. Kum 80 chung lam tan per month ah ₹500/- Central-in a rawn tum a, State-in ₹100 a lo belh nen ₹600/- a ni. Tunah chuan State-share ₹100/- kha a let 10-a tihpun niin, ₹1000/- a lo ni ta a. Chuti a lo nih chuan, central-share kum 60-79 inkar tan ₹200+1000 = ₹1200. Tin, kum 80 chunglam tana ₹500/- central-in a a rawn tum leh State-in ₹1000/- a rawn tum khan ₹1500/- an dawng thei tawh dawn ta a ni. Hei hi chhinchhiahtlak a ni a, kum-upa leh rual-u zawkte heti taka he sorkar tharin a a rawn care hi chhinchhiahtlak a niin ka hria a ni. Chumi piahah chuan, hmeithar leh rual-banlo kan ti mai ang a, (tawngkam mawilo ni suh sela; a inziah dan a ni miau a) khangho pension ₹400/- per month ni thin kha, tunah chuan a let thum aia tam ₹1300/-a rawn tihpun a ni.

Chutih rualin, Ruang-phurhna a hranpaa budget allocate a ni te hi thingtlang, Aizawl pawn lampang bialtute tan hi chuan nasa taka min chhawk zangkhaina a ni a. A chhan kan hre theuh ang a; khang policy te kha a awm lem loh avangin khang phurrit tam tak kha min rawn chhawk zangkhai a, hetah hian lawmthu kan sawi duh bawh a.

Tin, Eklavya Model Residential School (EMRS) zirna tha lutuk tak mai, man tlawm si, CBSE leh central pattern zirna tha tribal tana specially-a tih anih avang hian, a senso pawh

a awm lova. Chuvangin, he zirna tha hi Mizoram-ah hian a tam thei ang ber hawng se tih hi ka lo vei em em thin a ni a. Tunah hian 11 kan nei tawh a, 6 dang hawn thar lehna tur chak taka hma lak mek a ni bawk a ni.

Demand No. 43 - Tourism Department:

Tourism ah hian hma kan sawn nasa em em mai a, Swaresh Dharsan 2.0 ah pawh tunah hian nasa taka project rawn kalpui a ni a, chuta pilot project atan Aizawl leh Champhai District te rawn thlan a ni a, chuta tan chuan tourism lama hmasawanna chi hrang hranga hmalakna tur project buaipui mek a ni. Kan sawilan duh chu, ka bial Champhai South ah hian zofate, kan pi leh pute atanga kan history, kan chanchin rawn intanna a awm a. Tin, helaiiah khian a tawp vek bawk leh nghal a ni. 'Chhinlung chhuak' kan inti a, kan pi leh pute sulhnu chi hrang hrang a awm a Chu bakah chuan, an thih hnua an pialral kalkawng pawh khilamah vek khian a lo ni a. Hringlangtlang tih te, Lunglohtui tih te, helai pialral kalkawnga an tlawh ngei ngei thin, Zokhawthar chhak lawkah Rihdil te pawh a lo awm bawk a. Chuvangin, Tourism Department leh kan Minister hian hei hi min hriatpui sela, khi lai khi kan Zoram history lanna tur a ni a, Thangtharte tan leh Zoram pawnah pawh kan rohlu, khi kan history khi kan ngaihthah thei lova, nakin zelah pawh min hriatpui zel se ka duh a ni.

Chung ho piah lamah khilaiiah khian hmasawanna tur tam tak, nikum lawk khan ka bial chhung Zotlang-ah Hnabsin Kut (Festival) hlawhtling taka hman a ni a, hlawhtling takin khalai ah khan SARASS Fair te, handloom festival te leh fair chi hrang hrang khami denchhen khan hman a ni a. Khati lai hunah khan hlawhtling takin Zoram chhung budget nilo, pawnlam atanga sum an rawn thlahu te kha a thahnem hle a. Tin, Self-Help Group ten a an thiam-thil an siam te leh handloom thil chi hrang hrang an hralhna ringawta sum an lakluh vaibelchhe-bi tak meuh kha an la lut a ni.

Kha khan a rawn hrin tel leh dang chu, khang thiam thil an hralh mai piahlahmah hotelling a rawn promote nasa em em mai a. Chutah chuan paying-guest leh guest-house khilai a awm chhun chhunte an luahkhat vek a, a then te chuan mahni-ina room an neih chhun chhun te pawh an lo hire tir a, chu chu anmahni duh vang ni lovin, a dila an dil chhuah te a ni hial a ni. Khatiang khawp khan a hlawhtling a, thil tam tak kan zir tel a. A kum lehah chuan nasa takin hma kan la ang a, a aia tha in tih kan tum dawn a ni.

Chutihruah chuan, ka bial chhungah tho khan, khamiin a rawn ken tel - cyling leh paragliding te; tin, para-gliding atana hmun remchang bera an rawn neih, training nan hmun tha bera an rawn thlan Tlangsam-ah khian a awm a, chu chu ka bial chhung bawk a ni a. Tlangsam han sawi takah chuan, Tlangsam-ah khianin pangang khawina, India rama variety tha - oak-tassar atanga pangang khawina hmun, India rama awmchhun khilai hmunah khian natural-a to a awm a, chung te pawh chu tihchangtlun tlak a awm a ni.

Chutih rual chuan, kan tourism lampangin hma a rawn laknaah hian golf course, kan tourism tana asset pawimawh em em mai, sorkar hmasa leh tute pawhin hma an lo lakna te pawh kha ka fak duh a, an lo tihfuh em em mai a ni a. Hei hi international level atan leh tourist attraction hmanrua (asset) kan neih a ni. Tin, tunah hian Thenzawl golf-course leh Chawngte tourist lodge te SASCI fund crore 154.03 hmanga chei that mek a ni bawk a. Henga hmalaknate hi a lawmawm ka ti a, lawmthu ka sawi duh bawk a.

Demand No. 45 - Public Works Department:

Pu Dy. Speaker, mite tihdan angin tlem hun ka'n dil belh ve lawk che ang a. Kan sorkar tantirh khan fur a rawn ni chho a. Khatih lai khan kan châk lâkna pui berkawngte hman hleih theih loh in a han awm a; khatih laia han chei that kha a ni bawk si lova. Fur laia kawng siam te chuan bitumen te a lo in set that theih loh vangin a tlo lo bawk a, khanga pawisa sen t̄euh kha a s̄awt lo bawk a. Mahse, khua a lo that ve leh tih tak takin hma lak a ni a. Tunah chuan kan eizawna, kan châk lâkna kawngpui ber te t̄ha takin a lo tlang chho ta leh a, Aizawl khawchhung pawh tunah chuan kawng a m̄am t̄ha tawh em em mai a. A ch̄ang phei chuan, kawng tha kan hmang thiam lo lek lek em maw ni, tih tur khawpin kawng a t̄ha tawh a. Tin, two-wheeler-te pawh duh ai mah mahin an tlan chak tawh a ni. Chutiang khawpin kawng kan nei t̄ha tawh a. Hengte hi kan PWD changtu minister zahawm takin hma chak taka a lâkna anih av̄angin, a chungah lawmthu ka sawi duh bawk a ni.

Tichuan, vawiinah kan minister pahnih zahawm tak - Pu Vanlalhlana leh Pi Lalrinpuii te demand hi ka thl̄awp a, t̄ha ka ti a; pass pui ngei ni se tiin ka rawt e. Ka lawm e.

DEPUTY SPEAKER: Vawiinah kan House Leader Delhi zin a lo haw a, Session ngai pawimawha rawn tel chhuzawmin, min rawn uap thei a, a lawmawm tak zet zet a. A chungah lâwmthu kan sawi a ni.

Tunah dar 4 a hnai a, b̄an kha kan tum deuh ruai em aw; kan chau deuh riauvin ka hria a. Kan t̄hu ngui deuh ruih a. A sawina hun hi ka nei lo t̄hin ve deuh bawk a, a s̄irah sawn chengkawl ang deuha t̄hu ngawi reng ang deuh mai khan ka awm a. Remch̄anna te ka'n la ve ang a.

Kan Minister hriat at̄an - Healthcare scheme hi a lawmawm a, t̄ha tak kan han nei tur hi. Memberte kan zavaia kan buai berna pakhat a ni a. Chuv̄ang chuan, healthcare scheme t̄ha tak kan nei chho d̄awn niin a hriat a, a lawmawm a. A b̄ikin minority bial nei ho tan phei chuan hei hi a lawmawm tak zet zet a.

Amaherawhchu, kan minister khan min hriatsak se. Awareness campaign ang, healthcare-a in register tur angah khan hma min lâk sak thei se. Ka bial ah te pawh a ni a; hmanni ah phei chuan minority nu-pakhat phei chuan “chhiatni-fund an khawn a, nikum pawh ka thi lo, kumin pawh ka thi dawn lo; ka pe d̄awn lo” a ti a. Healthcare scheme-a inziyah luh chu hla tak a ni a. Chuv̄angin, khatiang tur khan awareness campaign min neih sak se a lawmawm ngawt ang.

Tunah Lawngtlai West bialtu MLA zahawm tak, Pu C. Ngunlianbunga ilo s̄awm ang u.

PU C. NGUNLIANCHUNGA: Pu Dy. Speaker, ka lawm e. Kha, budget a tl̄ak hniam dân ang kha chu an sawi vek tawh a, sawi ka tum lo ang a.

Demand No. 45 - Public Works Department:

Hmanni ka zawhna kha kan inchoang mumal ta lova. ‘NCV Road’ an tia, official lam pawh khan min hriat sak se ka duh khawp mai a. ‘Nakawn via Chamd̄ur Road’ an tih mai, Lawngtlai piah lawk, Paithar at̄anga kal kha a ni a. Mahse PMGSY road a kal av̄angin Anchirikawn at̄angin hei hi tih a ni a; sorkara kan awm ve laia kan hmalâkna te kha a ni a. Term hmasa sorkar chhung zawng khan an thawk zo hleithei lova, sum lam harsatna te pawh a nih ka ring a. Tunah khian Tuithumhna khaw thleng lo tingtangan he project hi a

kal dâwn ni awmin an sawi a. Helai hi km tam a ni tawh lova, km 5 a nih loh pawhin km 3 a nih ka ring a. A project-ah khan hei hi Tuithumhna thleng tura siam kha a niin ka hria a. Kan minister hian hei hi min enzui sak se, Tuithumhna khua thleng hram sela kan hmang tângkai hle zêl dâwn a ni.

Tin, ‘KMMTP Road’ kan ti hi zau takin kawng an lai a. Amaherawhchu, a chung a NH-54 kawng zauhna leivungin a kawr a rawn hnawh thla a, tun thleng hian paih fai lovin a la awm t̄euh mai a ni.

Tin, nikuma cyclone Remal khan culvert eng emaw zâh a tichhia a, siam leh mêk te pawh a niin ka hria a. Chutih rual chuan, a chhaka leivung rawn tawlh ho kha paih fai a nih loh chuan; kawngpui zau t̄ha kan neih chu Lawngtlai a t̄anga km 10 chung vêl a ni mai a. A piah lamah harsatna hran a awm lo, kawng a t̄ha em em a. Khitiang taka kawngpui t̄ha, hman tlâk loha a awm mai tur hi a uihawm ka ti a. Tun thal chung hian theihtâwp chhuaha tan lak a va han pawimawh tak ka’n ti a nih chu.

Tin, PMGSY Road Tuithumhna - Lunghauka-ah KMMTP Road kaltlangin a rawn kal a, Hruitezâwl lam a t̄anga kal chuan kawng a thui em em mai a. He PMGSY Road hi PCC pavement te tih theih a nih chuan hnaite in KMTTP Road kha a rawn thleng pawh ang a, chuta t̄ang chuan kha KMTTP Road - Lunghauka khua kha km 1 emaw lek a ni a. Thalah chuan harsatna a awm lo. Mahse, fur ah ration lâk a harsatna em em mai a nia. He kawng hi PMGSY Road a ni nain leh, PCC-na tur pawisa a chhuak lo a nih pawhin SASCI a t̄angin tih sak dân awm thei sela chuan a va’n hlu dâwn em.

Tin, hei hi session hmasa leh sorkar hmasa ah pawh ka sawi tawh a. Kan House Leader pawhin, “ziakin min lo pe rawh” a tih avangin, ziakin ka pe zing khawp mai a. PMGSY Road hi Chawngte P - Tuichawng Dung - Lawngtlai lamah a rawn kal chho char char a; Chawngte P - Sumsilui - Sakeilui-I - Jognasury - Karlui - Pandawnglui ah. Tichuan, Vaseikai thleng tingtang lovin

DEPUTY SPEAKER: Ngawi rawh lawk aw, Dar 4:00 a ri tawh tlat. Kan chhunzawm zêl dâwn em ni ang?... (House-in chhunzawm a remti a.)

PU C. NGUNLIANCHUNGA: Tichuan, Damlui ah a tawp ta tlat mai a. Damlui a t̄anga Vaseikai hi km 6 lek a ni a, formation cutting phei chu laih zawh vek tawh a ni a. Nikum lam te pawh khan MLA fund a t̄angin kan han ti a. He kawng hi a pawimawh khawp mai a. A chhan chu, (Pu RM Chakma khan a sawi a) Chakma lam side a t̄anga kal chuan a kawng kha a hla ta daih a ni. Amaherawhchu, Lawngtlai lam side a t̄anga chuan hnaitein Chawngte kha a pawh theih a. Tin, khua kan han sawi hote kha ration pawh Vaseikai a t̄anga la anni hlawm a. Fur ah phei chuan kawr neuh neuh a tam a, culvert leh track an siam thei chiah lo deuh a nih pawhin, kha kha min hriat sak ka duh khawp mai.

Demand No. 42 – Transport Department:

Lawngtlai-ah hian MVI kan neih loh avangin Siaha nen kan inkawp a, a mangan thlâk khawp mai a. Lawngtlai District hi Chawngte nen, Sangau lam nen phei chuan a area a zau khawp mai a, tunlaiin lirthei pawh a pung nasa em em a. Chutih rual chuan, driving license, two-wheeler license te pawh nise, Siaha nena inkawp kan nih avangin harsatna tam tak Lawngtlai District mipuiin kan nei a. Hei hi minister hnenah pawh ka sawi khan, “Kan la

dâwn” a ti thin a, a la hleitheih rih lo chu a ni mai theih a. Hei hi Lawngtlai District hian kan mamawh hle a ni.

Tin, Pu RM Chakma sawi - auto-rickshaw leh taxi permit kha, kei, ka bial Vaseikai hi a ni a ve chiah a. Tuichawng dungin min min then mai a; leh Chawngte vêlah te pawh, auto-rickshaw permit kha pek ve law law ni se. Chuti a nih loh chuan, self-style in ti khan an lei theuh tho a; auto-rickshaw hmangin a khaw chhehvel ho kha an inphur khawm ve a. Helai ah hian permit pek anih chuan sorkar tan pawha chhiah la theihna a ni dawn a. Hetiaang anih rualin, permit neilo na na na chu Lawngtlai kal a ngamawm lova, an lo man thin bawk si a. Tiang khan, Chhotabuisuri, Damdep, Jugnosuri, helamah Azosora, Bedmonia leh khaw chhingchhan PCC kawng ah te an tlan a. Parva lam side hi BRTF a ni a, kawng a tha a. Kha lai kha kan minister kan min hriat sak se kan duh a ni.

Demand No. 24 - Health & Family Welfare Department:

Lawngtlai hospital ah hian hnimhlum doctor kan nei lova a buaithlak khawp mai a. Tunah phei chuan cashless kan ti dawn a April Ni 1 atangin; Lawngtlai Civil Hospital-a damlo zai theih loh te, kei leh Pu RM-a bial angte damlote hi harsa te te, rethei te te anni hlawm a. Private ah chuan kohhran damdawi-in 2 a awm a, an zai theih mai a. Amaherawhchu, wawi khat zai ah sing 4-5 te a lo ngai a, an tan a har em em a ni. Chuvang chuan, kan Minister zahawm tak hi, amah pawh Lawngtlai khua tho a ni a; hnimhlum doctor hi chu min pe hram turin kan ngen ngawih-ngawih a ni.

Tichuan, lawmthu han sawi pawh a tha ka ti a. Longpuighat leh Vaseikai hi intawm tlat, backward area tak-tak an ni a. PHC duhthu chu a sam lo nain, doctor 1, nurse 1 leh Lab technician 1 an awm a. Kha kawng te pawh an siam dawn ni awm tak a ni a, a lawmawm ka ti a. Chutih rual chuan, rethei harsate te awmkhawm kan nih avangin hei aia changtlunga min tihsak se turin ka ngen duh bawk a.

Tin, Bungtlang PHC hi CHC-a upgrade a ni a, a building a hlui tawh khawp mai a. Tuna hian a thua upgrade a ni a, a taka upgrade a la ni lova. Bungtlang PHC a cover area hi a zau em em mai a, hei hi a nihdan tur anga kalpui ni se tih kha ka sawi duh bawk a. Chutih ruala lawmthu sawina tur dang ka neih chu, M. Kawnpui leh Mautlang Health Sub-Centre building leh staff-quarters min sak sak turah khan lawmthu ka sawi a.

Kan bial lam hi health facilities ah hian kan hniam khawp mai a, a tlantu khaw 6-7 deuhthaw kan nih avangin, aia tam deuh hlek min dahsak kan mamawh khawp mai a; kan thih lohna turah hian kan thi tam khawp mai a. Chuvang chuan, Pu Dy. Speaker, wawiina he demand kan sawi rual hian kan Health Minister zahawm tak hian khang ka sawite kha min hriatsak se ka duh a.

Tin, mitthi ruang phurhna hian keini ang MLA bial hla tan chuan a hlu khawp mai a. Chutih ruala thil buaithlak deuh pakhat chu - damdawi-in ah death certificate te an lo pechhuak mai theih lova; Aadhar card nena han tih zung zung kha a lo la har deuh a. Tichuan, hma kan sawn zel a, ambulance neitute zingah, ‘keimahniin kan lo in bill ang e’ ti te pawh an awm a. Cash payment nghal ngai te awm a, keinin kan lo payment khan bill let a ngai ve bawk nen, tlem chuan hei aia awlsama tih dan awm se. MLA te hian certified mai theih ila, a form ah khan; thi lo pui chu bill thu a awm lova, tih te kha kha ka han sawi duh bawk a.

Tin, April Ni 1 atanga Universal Healthcare ‘cashless’ tiha kha, engtia tih tur nge? In register tur nge ni dawn, tihlai kha. Register tur hian keini bial hi a buaithlak khawp mai a, thingtlang khua network neihlohna te a ni a. Tuna smart card-golden card kan tih ang chi ah te pawh theihtawpin a thawktu lamte nen pawh kan han ti a. Keni lam atang pawhin a buaipui turin an va kal a; a thente chu khaw dang network awmnaa hruaikhawm te an ngai a. **(Dy. Speaker:** Zo thei dawn tawh em?) A mamawh ber si khan a nih tur ang leh a hlawk tur angin kan chhawr zo theilo hi a pawi ka ti a. Chuvang chuan, April Ni 1 hman tura tih kha engnge ni a kalphung tur? Awareness nei tur pawhin kan bial ang te chu han zirtira, han in register ve kha a mamawh ber berte kan ni a. Tunah min chhang theilo a nih pawhin, winde-up hunah min han sawifiah sak sela.

Tin, kan minister hian min chhan theih ka ring a - kum kaltaah khan mitthi ruang engzat nge kan phurh tawh reng renga, engzah nge senso, tih te pawh House hian hre ve hrim hrim ila a tha lawm ni, ka ti a ni.

Pu Dy. Speaker, vawiina kan Minister pahnihte demand hi tha ka ti a, ka thlawp a ni e. Ka lawm e.

DEPUTY SPEAKER: Tunah chuan, MLA zahawm tak, Aizawl South-II bialtu Pu Lalchhuanthanga ilo sawm ang.

PU LALCHHUANTHANGA: Pu Dy. Speaker, demand-ah ka’n lut nghal mai ang a.

Demand No. 42 - Transport Department:

Transport Department hian tunah hian in engzat nge bus service kan la neih, tih ka hre duh a. Heng bus te hi (term hmasa lamah pawh khan ka lo sawi tawh thin a) outsource emaw, privatise emaw hi a chi loh maw? Sorkar sum tam tak sen ralna a niin kan hria a. Chuvang chuan, kan thalaite’n eizawna an lo hmuh ve theih nan outsource emaw, privatize emawa kal a thain kan hria.

Nichinah khan imember zahawm tak Pu Zaithanzama khan arawn sawi tawh a, tunah hian Sumo hi zinna tura kan hman ber a ni a. Amaherawhchu, TATA Sumo hi an siamchhuah lohna a rei tawh viau mai a; tuna kan sumo service-te upa tawh tak takte an nih avangin khualzin tan hian a him vak tawh lo a ni. Chuvang chuan, kan Transport Minister khan lo hria sela; a thlakna tur ngaihtuah lawk lova tuna kan kal pangngai anga kan kalchhoh kha a him tawh vak lovin ka hria a. Chuvangin, a thlakna tur te pawh ngaihtuah lawk a tulin ka hria a ni.

Demand No. 45 - Public Works Department:

PWD hi a vanduaithlak khawp mai a. Kha leh chen kha kawng tha kan nei ngai reng reng lo mai a, kawng chhiat thu kan inhrilh reng ringawt mai a. Term kal taah te khan PWD hi CM portfolio a ni thin a, ‘Chief Minister-in a chan chuan kawng te pawh kan nei tha deuh ang chu maw le’ tiin kan lo inngat ve thin a. Amaherawhchu, kawng tha kan nei thei ngai lova. Tin, tun sorkar thar hian kawng-chhia kan chhawm hnem em em mai a, chumi karah Cyclone-Remal khan min han tibuai leh a. Chuvang chuan, kan PWD Minister pawh a khawngaihthlakawm ka ti a, a rilru pawh a hahin ka ring a, kawng chhia hi kan ngah em em mai si a. Kawng hi ngaih pawimawh hmasak a tul a. Kawng a that loh chuan, eng thil mah a tha tak tak thei lova; development ah chuan thil pawimawh no. 1 a ni chiang hlein ka hria a ni.

Tunah hian kan CM hovin kawng siam dan sawiho tan a ni a, RCC a han chhun mai ang chi te pawh kha a tha ka ti a. Hei hi kan hrelo mai thei a, Mission Veng Bazar hi 1975-1976 vela Contractor Pu J. Lianchungnunga chhun a ni a. Khampei - Mission Biak-in thlengin a chhung a, a tha em em mai a ni. A chungah seal coat an hmang mai a, kum 40 tling tawh pawh a chhe ngai lova, a chhe mai mai dawn lo niin a lang a ni. Chuvangin, kan kawng chhiate hi hetiang zawnga hmalak hi a tha ka ti a. Ka sawi thin a, kan kawngte hi a vaiin a chhe rual vek lova, khawi emaw lai a chhia a ni mai a, a chhe thang bik hi kum tinin a chhia a ni. Chuvangin, a chhe thang hi kan hriat a ngai a ni. Kan awi ang deuhin, kawng han chhun mai khan hmun hnawng deuh te, dam deuh te, kawrh kam te a chhe duh tlangpui a ni. Khanglai bika kha RCC cement-a chhun ni se tlo deuh turah ka ngai deuh a. Chutiang zawng te pawh chuan PWD Minister hian hma han la chho sela a tha awm e.

Demand No. 24 - Health & Family Welfare Department:

Kan health minister a tang baw k a, hnu-hma pawh a ngah khawp mai a. Kan ZMC te, Cancer Hospital leh thil dang dangah te hmasawna hmuh tur tam tak a awm a, a lawmawm ka ti a. Hei, Kulikawn Hospital hi term hmasa khan ka sawi tam khawp mai a, min ngaihsak ngai lova, tun sorkar tharah hian sak tur niin ka hria a, a lawmawm ka ti khawp mai a.

Kan hriat angin, khawpuia mi-retheite tan hian chet ngaihna a awm lo a ni. Private Hospital te chu a tam a; amaherawhchu, man tlawm zawka inenkawlna tur hi a awm lo a ni. Chuvang chuan, he Kulikawn Hospital hi kan Minister hian min hriatpui sela, chak leh zualin hma min laksak sela; kan nghakhlelh khawp mai a. Hei hi kan bial chhung atan chauh a ni lova, Aizawl khawpui chhunga miretheite chhawr tur kha a ni a, hmalak a tul khawpin ka hria.

Tunah hian Health Department pawh hi deptt. lian tak mai a lo ni a, ZMC kan neih te pawh saw a ropui a; doctor pawh kan indaih dawn tan niin ka hria a, a lawmawm tak meuh meuh a. Tin, kan Sub-Centre leh Damdawi-in te chhawmdawlina tur nurse recruitment tum niin ka hria a, a lawmawm takzet a ni.

Demand No. 43 - Tourism Department:

Tourism Deptt. hian tourist lodge leh highway restaurant te a outsource hlawm a. Hengho hi an dinhmun kan enzui em; a guideline fel tak kan nei em, tih te ngaihtuahnaah a awm a. Mizote hi khualzin mi kan ni a, che-pawlawh leh mi hiplo zawng deuh deuh te pawh hian thil kan ti thin a ni. Kan ei leh in turte kan duh-uluk loh bakah, kan mut-bute pawh a thianghlim lo thin a. Hengah te pawh hian kan Tourism Deptt. hian kan tourist lodge leh restaurant te han vil tha deuh sela a lawmawm hle ang.

Tin, tunlaih Home-stay te, Boys & Girls' hostel te hi a hman-hman hian an hawng chho ta mai niin a lang a. Hengte hi duh-duha hawn theih chi a ni em; a enkawlina dan leh dun te an nei tha em, tih te rilru ah a awm a. Kan Deptt. hotute hian heng te hi han enchiang se a thain ka ring a ni.

Tlangnuam-a awm ka ni a, Tlangnuam tlang khi '2F Gallery' kan ti a, a view a nuam baw k a, foreign tourist lo kalte hian an rawn tlawh duh zek mai a; heng te pawh hi kan Tourism Deptt. hian min hriatsak sela. Kan Minister pawhin a hmunah te tlawhin, han chei that leh chei hnum dan tura hmalakna te pawh a awm tawh niin ka hria a. Khang te kha engnge a thlenchin a

wind-up hunah min han hrilh thei se a lawmawm khawp ang.

Demand No. 29 - Social Welfare Department:

Pu Dawngtea biala Sethawn-Jordan Center hi eng angin nge tunah hian kan hman; kan hmang tangkai em, tih hi ka hre duh a. Hei, tunlaih ruihhlo avangin kan thalai tam takte kan buai a, heng thalai sim tumte tan hian eng emaw training te siama, an hnathawh tur awm ang tawk chi te pawh bun theih turah ka han ngai a. Heng kan thalai ruihhlo ngaia awmte hian, a diktak chuan nghei an duh ve a ni; amaherawhchu, hnathawh tur an nei lova, ruihhloah bawk an tlulut leh thin a. Chuvang chuan, Jordan Centre hi heng ho tana hman-tangkai theih turin a siam theih lawm ni, tih te ka'n sawi duh bawk a.

Tichuan, kan Minister pahnihte demand hi tha ka tiin, ka pawmpui a, pass pui turin ka ngen a ni e. Ka lawm e.

DEPUTY SPEAKER: Kan MLA zahawmtak Pu Lalmuanpuia Punte ilo sawm ang u.

PU LALMUANPUIA PUNTE: Pu Dy. Speaker, ka lawm e. Vawiinah hian minister pahnih - Pi Rinpuii leh Pu Vanlalhlana te demand chungchanga ka sawi thei tur hi ka lawm khawp mai a; han lut nghal mai ila.

(Pu C. Ngunlianchnunga, Chairman takes the Chair.)

Demand No. 12 - Parliamentary Affairs Department:

Pu Chairman, Parliamentary Affairs ah hian Budget Session neih apiang hian demand sawi zingah kan rei thin avangin tlai chaw ei a ngai thin a, helaia thawkte leh helaia awm ngai chi ho zawng zawng hi, hei hi kan sawi deptt. te hnen atangin kan pawt ringawt mai thin a. Hei hi a fel lo in ka hria a, kalphung thar sorkar ah hi chuan ti tawh lo ila Parliamentary Affairs atang hian hemi senso hi dah mai thin ila a tha in ka hre tlat a, chu chu ka han rawt anih chu.

Demand No. 42 - Transport Department:

Transport hi tun hma khan 'loss deptt.' kan tih thin kha a ni a. An han tang a, tunhnaiah hian 'profit-making deptt.' an lo ni reng tawh mai a; an thawhrimna te pawh a lawmawm ka ti a ni. Kei hi minority lam leh a ramri hruta kal tam ka nih avangin, a ram pum huap ang reng ka rawn sawi dawn a. Lawngtlai-in MVI an neihlo hi Pu Chairman, a buaithlak khawp mai a. Siaha atanga intawm chuan a buaithlak lutuk a, ngaihpaawimawh theih ni hram se ka ti a. Tin, Pu Chairman, nichina Longpuighat-Vaseikai vela auto-rickshaw i rawn sawi tak kha a tul hlein ka hre bawk a, kei pawhin.

Tin, pollution testing privatize theih mai ni sela, sawlai MINECO-a thui deuh deuh intlar ngai lo hian khawilai petrol pump emaw ah te hian tih theih ni sela a tha ngawt ang.

Tun hmaa MST bus loss ringawta service thin kha, tunah chuan a ni tawh lova. Chuti ruala ka sawi duh chu, city-bus service entirnan: Falkawn - ZMC te, Tuirial te, Sairang te emaw Lengpui Airport te pawh city bus tlanna tur indaih lovin an ding thep-thup a, hengte hi sem rual theih nise a tha viauin ka ring a ni.

Demand No. 45 - Public Works Department:

Ka bial chhung bikah Khawbung - Biate te, Khawbung - Tuipui te hi chu a tha viau a, Biate - Tuipui erawh a chhe hle a ni. Culvert pawp te a awm a, hei hi thuam that thuai ni se; kan minister khan min lo chhinchhiah sak thei sela. Tin, Leng - East Lungdar khi repair a ngai tawh khawp mai a. Lungchhuan - Khankawn te, Chekkawn - Sialsir PMGSY te, a lai tak velah Lungchhuan atanga chhukin kawng ruh tha deuh mai, black-topping emaw, PCC emaw pawh a la ni lo chungin fur bakah englai pawhin tlan ngam rengna kawng a awm a. Hei hi PCC emaw, black-topping pangngai emawia siam theih nise a lawmawm khawpin ka ring a.

Tin, lawmthu, chhim lam kawngpui ATL Road ngai pawimawha repair a ni mek hi lawmawm ka ti khawp mai a. Saw lam kawng saw a that tak tak chuan, chhim lamte tana hnai ber a ni. Hei hi four-lane road emawa siam theih ni nghe nghe se emaw, hmalakna hi chhawp chhuah theih nise chhim lam tan hi chuan a lawmawm khawpin ka ring a ni. Tin, kan sorkar kan la tir a, nikumah budget session hmasa berah Tuivawl bialtu MLA, Opp. Leader nena kan sawite ngai pawimawhin Tuivai Lei kan dawh a ni hi a lawmawm khawp mai a, Manipur lama kan unaute pawh an lawm takzet a ni. Tichuan, a hawnaah kan CM zahawm takin Sakawrdai - Mauchar - Tuirial kawng siamthatna tur sum pawh sorkarin a ngaihtuhsak tur thu a sawi bawk a, khang te pawh kha a lawmawm takzet a ni.

Tichuan, Lawngtlai - Siaha via Tuipui Ferry lei dawh tur a ni pawh a lawmawm takzet bawk a. Sawlai saw a indawh kai chuan, darkar 1 tling lovah Siaha kan thleng a. Helam, Kawlchaw lamah chuan km 80 lai a ni a, a inhnaih hleih lutuk a. A lawmawm khawp mai, he lei dawh a ni tur hi. Tichuan, Mizoram pumah hian (recess room-ah pawh kan han inzawt mai mai a) motor a fur, a thala la luh miah lohna hi Pi Prova-i bialah hian khaw 3 thum vel a awm a, Pu Zira bialah khaw 5 vel leh Pu Rintluanga bialah hian (ka hriat chian bal) khaw 1 a la awm bawk a. Pu RM Chakma bialah phei chuan tam tak a ni. Heng hi PWD hian tan han la leh sela. Khang kan sawi tak zawng zawng khuaah te khan petrol hmang chi ah chuan lighter chiaah a lalut a ni. Chuvang chuan, kan PWD hian tan han la sela, heng ho connectivity hi han siam thuai thuai se a tha khawpin ka ring.

Pu Chairman, nichina i sawi KMMTTP Road chhaka NHIDCL leivungin a tihchhiat kaawng saw ka kal ngun a, ka hmu ve reng thin a. Hei hi a monitor tute kan nih avangin PWD hian han ngai-pawimawh sela. Tin, NHIDCL lam pawh nawr ve deuh an ngai; an leivung a ni tlat a ni. Lawngtlai thlanga East Saizawh bul, Rulkual thlen hma bawr velah sawn a nasa zual a, ngaihpawimawh a tha khawp mai. Tin, MINECO chhung kawngpui hi, Mizo hi kan vision hi a la tawi a; ram ruaka kawng kan va laih lai kha chuan thingphun te'n kan va hnatlang a ni a, New Capital luah hma kha chuan a kawngpui kha zau kan ti fu vek a ni. Hei, keini pawh quarters-ah kan han awm a, tunah chuan a bik takin Baptist Biak-in bul te pawh inkhawm dawn chuan inpelh a har tawh a ni; motor kenga inkhawm hi a lo ni deuh vek tawh si a. Chuvangin, New Capital chhung kawngpui hi zauh a tul khawpin ka hria.

Tin, Maubawk veng mawnglam pakhatin kan New Capital chhung kawng a rawn tawm a; hei, a bialtu MLA Pu Zaithanzama hovin hma kan han la a. YMA te pawhin 'a kawr dung zar zarah New Capital ramah sawn chhuak chho mai se' tih tein, hmannah SDO te nen kan han en hova. Sawnglai vel saw a chhang chhe khawp a, thil bo leh eng eng emaw te pawh a awm fo mai a. Chuvang chuan, tihhlawhtlin a nih theih chuan a lawmawm khawp ang. Tin, Sialsuk-Sailam-Serchhip Road hi Serchhip hnaihna ber niin ka hria a, hei pawh

hi PWD hian lai tlang ngei se a tha khawpin ka hre bawk a ni.

Demand No. 24 - Health & Family Welfare Department:

N. Vanlaiphai-ah AYUSH Doctor min pe a, kan Minister chungah ka lawm khawp mai a. Amaherawhchu, chumi rualin nikum May thlaah East Lungdar, Vanlaiphai, Biate ah MLA fund-in x-ray khawl ka pe a, tun thlenga la fit loh a ni a. Hei hi lakleta company-a return leh mai tur emaw ni; heti em em te hi chu a ni lo a ni. Hmanni ah Khawlailung PHC-ah ambulance ka pe leh a, chuta doctor-in a sawi a chu, “Vanlaiphai, Lungdar leh Biate lam kawng hi Chekkawn-ah a rawn infin a, ambulance-a an rawn inphurhin oxygen daih lote an rawn insuihkhawmna khua a lo ni tawh a. Oxygen indaih lovin kan cylinder an rawn la fo mai a, a phal loh chi si lova. Heng avang hian PHC dang aiin Oxygen cylinder kan mamawh tam bik a, chu chu min ngaihtuhsak rawh,” a ti a ni. Chu chu kan minister hian min hriatsak se ka duh hle mai.

Tin, khu ‘Tripura-Phuldungsei’ kan tih thin kha tunah chuan a khaw zatve Mizoram chhung a lo ni ta a, khutah khuan Health Sub-Centre dah ve a tha khawp mai. Ram inchuh, khaw inchuh kan ni tawh a. Saihapui-V pawh tun hmam Assam-in school leh thildang an rawh dah a; tichuan, Mizoramin kan dah chilh ve a. Tunah chuan Mizoram ta a ni tawh. Chuvangin, khulalah khuan sub-centre dah ve ngei ni se tih kha ka rawt tel a. Pu Chairman, hospital thuamchak ni tur hi a lawmawm khawp mai. Hemi rual hian, damdawi mawl mai mai ang te a thlawna lak tur pawh a awm mumal tawh lova. Tunah chuan ‘Damdawi-in’ ni tawh lovin, ‘Damlo-in’ a ni ringawt tawh a ni. Damdawi dawn a awm tawh lo. Chuvang chuan damdawi engemaw hi chu tunhma a mi ang khan sem tur te hi awm leh se la a tha khawpin ka hria.

Demand No. 29 - Social Welfare Department:

Tripura-Phuldungsei bawkah; ‘Zampui-Phuldungsei’ ti tawh ang; Tripura kan ti tawh lo. Zampui-Phuldungsei-ah hian Anganwadi dah ve a tul ka ti a. Ka sawi tak ang bawkh kan, inchuhna hmun a nih avangin sorkarin facility kan pek that a ngai hle a ni. Tin, Anganwadi-workers te hlawh tihpun tumna a awm mekin ka hria a, a lawmawm ka ti tak zet a. An thawhrim nen an hlawh hi a la tlem em em a ni.

Tin, ruang phurhna sorkarin min tihsak hlim khan Serchhip-ah nikum khan bill leh thil tul tifel turin Social Welfare office a la function mumal lova. Serchhip District-a mitthi ruang phurhna bill kha Lunglei lama va tih daih a ngai a. Hei hi a letling deuh tlat mai a, kan minister hian min rawn ngaihtuah fel sak se ka duh hle mai.

Tin, Pu Chairman, nichina i rawn sawi bawkh kha rawn support leh ka duh a. Tuichawng lui ruam phei black-topping kawnga tlan pur purin a kawrah leh lei a awm lova, lui chhungah kan zuk lut a, kan chhuak leh a. Fur lai chuan tihngaihna a awm lova, thalah chuan kan kai mai. Chuvangin, a lei hi ngaihpawimawh ni sela, fur tluana kal mai theihna tur a ni a. Hei hi ka ngai pawimawh khawp mai.

Pu Chairman, hun ka pel rei ta a. Vawiin a kan Demand sawi pahnih - Pu Vanlalhlana leh Pi Lalrinpuii te demand hi ‘pass ni ngei se’ tiin ka rawn thlawp a ni e. Ka lawm e.

CHAIRMAN : Pu V. Malsawmtluanga, Lunglei North bialtu ilo sawm ang.

PU V. MALSAWMTLUANGA: Pu Chairman, Pu Vanlalhlana leh Pi Lalrinpuii, kan Minister zahawm tak takte demand sawi tura hun min pek avangin ka lawm e. Chawhnu hun Session kan tan tirh atang khan ban ka phar ngar ngar a ni a, Pu Chairman. Nimin lamah han inchal tauh bap-bap mah ila, min lo duhsak hle a ni. Kan Chairman, Pu Ngunlianchunga hi disaster minister a nih lai zawng kha chuan ‘Silpauline Minister’ tih thin kha a ni a. Ani hi mi fel leh chak a ni a, ‘Disaster minister pawh contract hna pe thei department-a siamtu a ni’ tih kha, min han koh takah chuan ka’n han sawi ve duh hrim hrim a ni.

Lady’s first ang khan ka member-puite kha an kal chho deuh vek mai a, khatiang hawi zawngin ka’n kal ve ang a. Amaherawhchu, kei a demand-a ka kal hmasakna chhan chu, chhim lama kan minister neih chhun leh khawvel piantirh ata Mizo-hmeichhe Cabinet Minister hmasa ber a nihna avangin, a demand ah hian ka’n han lut nghal ang a. Demand Nos. 24, 29 leh 49 te hi ka’n khaikhawm vek mai ang e.

Demand No. 29 - Social Welfare Department:

Aw le, a hmasa berah chuan, MLA nilaite leh nih tumte kan inelna ber pakhat thin, inelna thianghlim nichiah si lova ka ngai deuh Ruang-phurh Policy nuai bo an ni ta hi a lawmawmin ka hria a, September Ni 1, 2024 ah district headquarters tinah hmalak an ni hi lawmawm hlein ka hria a ni. Tin, hmeichhiate chawisanna tur, tui let hnuuaa vawikhatna atan Gender Budget crore 74 lai mai dah a ni hi a lawmawm a, a changtu minister ber hmeichhia a nihna zawnah hmeichhe chawisan a ngai pawimawh hle mai a. Tin, kan sorkar pawhin a ngai pawimawh hle a ni tih hei hian a tichiang a, Minister chungah lawmthu ka sawi duh bawk a ni. Tin, Lunglei ah Working-Women Hostel te nuai tam tak senga sak tum a ni a, hei kan Minister hmalakna avangin lawmthu ka sawi duh bawk a ni. Tin, Social Welfare hnuaiah Vocational Training Center (VTC) Lunglei ah a awm thin a, kan chhawrtangkai em em a. Hei hi a funding kan hmuh tawh lo a. Kan Minister chak tak hian min tharthawh sak leh theih se.

Kan sawi fo tawh - tar pension te, widow pension te, disabled pension te tihpun a nih hi a hlu hle mai a. He sorkar hian mi ngaihsak hlawh lo te a ngaihsak a, chutiang chuan an tana ding tlat dawn a ni tih hi a tichiang hlein ka hria. Tin, hei hi a pathian-thu hle bawk a ni. A dawt leha ka sawi duh chu, ka bial chhungah Eklavya Residential School kan Minister hian min dahsak dawn niin ka hria a, a chungah lawmthu ka sawi a. Chumi piah lamah CSR fund kaltlangin EMRS School 11-te ah smart-class room kalpui a ni te hi ama thahnemngaihna leh a ngaihna a hriat vang a ni tih a chiang hle. Tin, ka bial chhungah Baptist Kohhranin College tha tak mai a nei a, kan House Leader ho hian LMC inthlan lai khan kan tlawh tawh a. Mamawh tam tak an neih zingah hostel hi Social Welfare Deptt. kaltlangin kan Minister hian min tihsak dawn niin ka hria a, an aiawh te pawhin lawmthu ka sawi bawk a.

Demand No. 24: Health & family Welfare Department:

PHC hrang hrangah doctor indaih lohna a nasa em em a, a bik takin thingtlang mite’n harsatna tam tak an tawk a; chutiang chuan kawng hrang hrangin a hun lova nunna hlauh ta te pawh an awm nual a ni. Kan sorkar hnu hian kan Minister hian theih tawp an han chhuah a, tunah chuan PHC zawng zawngah doctor dah kim a ni ta te hi a lawmawm hlein ka hria a ni. Chu chang a ni lova, ka bial chhung Haulawng ah ngei pawh MO fel tak mai min dahsak avangin he House zahawm takah hian lawmthu ka sawi a ni.

Tin, Health Sub-Centre te, Health Clinic te, kan sorkar tirh phat atangin kan Minister hian theihtawp a chhuah chho a, hmun hrang hrangah a sa mek niin, sak belh zel a ni a, zawh tawh te pawh a awm bawk a. Ka lawmna em em chu, health-workers indaih lohna karah semrual hna huaisen taka a thawk hi a lawmawm hlein ka hria a. Chutih rual chuan, ka bial chhung Sekhum Health Clinic sak that a ngai tawh em em a, hei hi min lo hriatsak bawk se.

Tin, chutiang Zelin Kangmun South leh Lungmawi lamah te health-workers leh Goup 'D' thlengin kan mamawh em em a. Chutih laiin health-workers 100 chuang leh Group 'D' hna a thara lak tur niin ka lo hria a, hengah hian kan Minister-in min lo chhinchhiah sak se, ka bial chhunga heng kan mamawhnate min hriatsaka min hnawhkhah sak turin ka ngen bawk a ni.

Tin, Zemabawk-Cancer Hospital tha tak mai kan nei a. Zoram mipuite a bik takin cancer patient-te an lawmna em em chu, hun rei tak atangin khawl te chu kan lo nei ve tawh a, amaherawhchu thawktu-indaihlohna avangin cancer patient zai theih an ni a ni. Kan sorkar hnu December Ni 4, 2024 atang khan cancer patient-te zai theiha hmalak chhoh niin, hemi ni atang hian zai tan a ni a. Kan Minister chungah lawmthu ka sawi bawk a ni.

Pu Chariman, CSR pawimawh zia kan hria a. A-ngaihna hriate chuan CSR kaltlangin development te leh khawtlang mipuite mamawh tam tak an hailut a, chutiang chuan hma an la thin kha a ni a. Hei, kan Minister ngei pawhin CSR hnuaiah Oil Corporation kaltlangin dialysis tih reng ngaite tan dialysis khawl dil-chhuah a ni hi a lawmawm hlein ka hria a ni.

Tin, Pu Chairman Vahui-Online Grievances Portal hi a hlu hlein ka hria a. Department lama harsatna tawkte, vuivaina leh kawng hrang hranga advice lak theihna tur hetiang huaisen taka hma a la hi a lawmawm hlein ka hria a ni.

Tin, CMO, Lunglei District hnuaiah tuna hmalakna kal mekte hi Lunglei mipuite kan hlimin kan lawm em em a ni. Urban Health & Wellness Centre, Lunglei-Sethlun-ah tunah sak zawh tawh a ni a, Sertlangpui-ah Type-I staff-quarters complete a ni a, chutiang chuan Ramlaitui leh Belthel-ah pawh on-going project a awm mek a, a lawmawm hle a ni. Tin, Mizoram-Universal Health Care Scheme cashless kalpui tur a nih hi Zoram-mipuite tan a thlamuanthlak a, rahbi thar a ni tih ka han sawi nawn leh duh bawk a ni.

Demand No. 43 - Tourism Department:

Kan hriat angin Lunglei lamah Music Festival, tuilet hnua a vawikhatna atan kan han nei kha a ni a, a lawmawm hle a. Ka bial chhung Pukpui-ah a ni lehngal a, a dawltu Pukpui mipuite leh kan Minister chungah pawh lawmthu ka sawi a. Hei hi a zawnghhang tlak hle dawn niin a lang a ni.

Demand No. 45 - Public Works Department:

Kan hriat angin, kan Minister hian minister-a lawmluh anih hnua office-a inhlanna neihah khan ka tel ve ngei a. Khatah khan, 'ka eiru ve dawnlo a ni' tiin chiang takin a sawi a. Chu chuan kawng tha, a chanveah hian a thawk nghalah ka ngai a ni. Ani ang kan nei hi a thlamuanthlak a, he House-ah hian amah ka chhuan thu ka han sawi duh a.

Pu Chairman, i veilam, (opp. party lam te pawh a ni ang a) amah leh Pu Lalduhoma-

sorkarah bakah ZPM sorkarah hian rinna kan ngat hlein ka hria a. A kum-khatnaah khang kum eng emaw zat chhung kawng chhia siamthat loh, a then phe chu chakai chhitna tur emaw tih mai tur ang chi te kha a ni a. Chung chu kumkhat chhunga siam zawh tir vek a tum hian, he sorkarah hian mipuite bakah kan opposition member-te pawhin rinna kan nghah zia a tichiengin ka hria a ni.

Tin, lawmawm leh ropui ka tih e mem chu, kum 2014-2024 chhunga Road Transport & Highway-in State-sorkara pawisa a bat crore ₹26 lai mai hmuhchhuah a ni a. Hei hian kan Minister te leh he sorkar hi mu mai mai lo; awm mai mai lova hna a thawh zia a tichiang hlein ka hria a, Pu Chairman, lawmawm ka ti hle a ni.

Tin, kan hriat angin NH54 Bawngkawn - Zemabawk kawng bitumen concrete-a tha taka zawh tawh a ni a. Tin, NH44A Sihmui - Lengteng kawng resurfacing pawh tunah hian hmachhawp leh hma lak mek te a ni a, a thlamuanthlak hlein ka hria a ni.

Tin, Pu Muanpuia kan member-pui khan Tuivai lei kan dawh leh kan Chief minister-in a hawn chungchang a sawi kha a ropui hlein ka hria. Hei hian a entir chu - he sorkar hian zohnathlak state pawn leh ram pawna awmte harsatna an tawhin, 'an tawrhnaah kan tawrhpuie ve a ni' tih a lantir chiang hle a. Tin, kawng hrang hrangah harsatna pawh tawk se tlanche mai lovin, kan theih tawk kan chhuah dawn a ni' tih a chiang hlein ka hre bawk a ni.

Tin, ATL road hi ka sawi lo thei lova, Pu Chairman. Tuna kawng chhe chin zawng hi ka bial chhung - Lunglei North bial a ni tlat mai a. He sorkar hian zir chiengin, kawng sample te a la a, a basement atanga tihthat vek a ngaih zia department-in a hmuchhuak a. Tichuan, tunah hian nuai ₹4,58,94,700 chuang sanction tun huna ruahmanna a awm te hi Lunglei mipuite tan a va thlamuanthlak em! Kan CM leh a changtu minister chungah lawmthu ka sawi a ni. Lunglei lam hian in-charge te kan han insiam a, Pu Mahlima hi 'PWD Minister' tiin ka ko mai a, sawlamah chuan; ani pawhin theih tawp a chhuah a. Bialtu ka nihna leh Lunglei mipuite aiawhin ama chungah pawh lawmthu ka sawi leh bawk a ni. Chutih rual chuan, ka bial chhunga Mualthuam North kawtchhuah hi ₹45 lakh bawr vel chuan siam theih a nih a rinawm a; hei hi khawtlangin an chhawr ber, motor lian luh ve theihna awm chhun a ni a. Hei hi kan Minister-in min lo hriat sak se.

Session hmasaah pawh ka lo sawi tawh a; hun-hmasa lamah khan Hmuntlang-Haulawng kawng tunah hian SASCI-ah a-fur a-thala kal theih turin tunah hian submit mek a ni a. Hengah hian theihtawp min chhuahsak turin ka ngen nghal bawk a. Tin, Lunglei tlak lam by-pass road te pawh min lo hriatsak bawk ta se.

Tin, ka bial chhunga Haulawng PWD Sub-Division, Ni 27.2.2025-a min hawn sak te hi a lawmawm hle a, mipui pawh an lawm hle a ni. Tin, Pangzawl - Lungmawi Lei hi hman atanga bialtu MLA te pawhin an lo tlangaupui thin tawh te pawh hi min lo hriatsak se ka duh bawk a.

A tawpna atan chuan, Pu Chairman, Lunglei khawpui chhung kawng hi enkawltu hrang hrang an awm nuai mai a. LMC huamchung theuh-theuhah pawh Kikawn - Pukpui kawng chu ATL Road enkawl tura company/firm thlanin a enkawl a; Kikawn - AOC - Ramthar veng hi PWD-Road Division-in direct-a a enkawl awmchhun a ni a; AOC - 3 Gates - Lunglawn kawng chu NH02-Tlabung kawng nen inkawp leh daihin, chutiang chuan

enkawl a ni a; NIDCL hnuaiia contractor-te mawhphurhna a ni. Tin, 3 Gates - Zobawk kawng chu NH54 in a huam leh daih baw k a. Pu Chairman, kan Minister ka han request duh chu chu, Lunglei Municipal area, a bikin PWD-Road Division hnuaiiah hian a awm theih dan min ngaihtuhsak se, budget-ah te pawh (min duhsak viau reng a) min pe tam deuh turin ka ngen duh a ni.

Aw le; kan Minister zahawm tak tak - Pu Vanlalhlana leh Lalrinpuiite chan, Demand Nos. 12, 42, 45, 24, 29, 43 te hi a tha ka tiin ka pawmpui a, he House-ah hian pass pui ngei turin ka han ngen baw k a ni. Ka lawm e.

CHAIRMAN : Aw le, Pu TBC Lalvenchhunga, Aizawl West-I bialtu i sawm ang aw.

PU TBC LALVENCHHUNGA: Pu Chairman, ka lawm e. Vawiina kan Minister pahnih -Pu Vanlalhlana leh Pi Lalrinpuii te demand sawina hun tha tak kan han nei thei hi lawmawm ka ti hle mai a. Han en pawh hian kan ram leh ZPM-sorkar hmelhmang lanna tur heti zat mai budget-a dah a ni hi a lawmawm ka ti a. Thenkhatte'n han sawi hnawm mah sela, he kalphung tharaha kan minister-te hmalakna a ngaihnaawmin hmuh a nuam hlein ka hria a. Chutih lai chuan, phuai-luai lutuka kan kal lohna tur tawite-te han sawi hmasak ka duh a. Chungte chu, mahni bial sawi hun kan ti baw k a.

Demand No. 42 - Transport Department:

Nikum khan kan bial chhunga Auto-rickshaw tlan min phalsak tura ka dilna kha House-ah Minister-in assurance min pekna lehkhain ka bawhzui a, department lamah min phalsak lo leh a. Ka bawhzui leh a, tum hnihna pawh min rawn turn-down sak leh a. Ka sawi laia chu, Auto-rickshaw Luangmual thleng kal phalnaah pawh a kal chuang lem lova. Chutih lai erawh chuan, mipui-nawlpuiin kan mamawh em em, MINECO leh Ebenezer Hospital lamah kal phal a ni ve tlat lo mai a, traffic awm lohna lai zawkah kal min phalsak thei tlat lo mai a. Helai mi-harsa zawkte leh public transport normal kal lohna ni si lai hi minister hnenah khan ka thlen nawn leh ni sela. Tin, Sairang - Company Peng ah drop min phalsak tura ka ngenna, he lai House-ah tho assurance ka hmuh tawh kha; SPA lam atang chuan, 'highway a ni a, a hlauhawm lutuk' tia chhanna kan hmu a, eastern side lamah te pawh highway-ah vek auto-rickshaw an tlan ve tho si a, khu lai anih tak avanga a hlauhawm bik riauna kha eng nge ni a chhan ka hrethiam chiah lova. House ngeia ka rawn sawi tawh a ni a.

Demand No. 45 - Public Works Department:

Kumina PWD budget tam loh thu a rawn ri deuh a. Ka han en a, budget-ah nikum supplementary aia tam kuminah an hmu let a. Hetiang zat hmu tur hian a department lam hotute leh a minister te an thawkrim hle niin kan ring ringawt a; crore 732 atangin crore 735 dang an han hmuh belh leh a. Hei hian a department te hmalakna leh inpekna a tilang Chiang viauin ka hria a.

Hei hi ka han sawi chhan pakhat chu, kan bial hi social media-ah te thu han zia k ve mah ila, comment hmasa berah hian, 'i bial kawng chhiat-chhiat nen' an lo ti hman ziah a. Kawng chungchangte social media-a han sawi ve te hi a huphurhawm em em thin a. Chu chu, kum khat chhungin kan kawng te pawh min han thuam-thatsak thei a, tunah hian main road min khawih sak mek a. Hetiang kawngah hian a thawktute an fakawm em em a; Chawlhni ah te, zana h te kan han kal a. Hman zana h pawh zan dar kua leh tihah ka zu tlan

thla a, kawng siamnaah; Chief Engineer hovin an lo la awm thap mai a, EE nen. Chutiang chuan han thawkrim hlein ka hre bawk a, a lawmawm ka ti a, an zarah Mizoram hmun hrang hrangah kawng tha kan neih ngei pawh ka han ring a. Amaherawhchu, an sum neih hi a tam tham hle mai a, an taimak lehzual pawh a ngai dawn tih a lang reng mai a.

Hetah ah hian kan bial aiawha lawmthu sawi ka han duh pakhat chu, Aizawl West-III bialtu Pu VL Zaithanzama leh kan Minister-te hmalaknain Tuikual Lei dawhkaina, Lawipu - Ainawn Veng hnuai hi tunah hian dawh theih turin hma min laksak a. Chu mai ni lovin, Aizawl western lama hmasawna ruhrel a lan theihna turin Ainawn Veng – Tuivamit, Luangmual vetin intermediate lane siam tura hmalakna a awm tih te kan lo hre leh zel a, bial-mipuete aiawhin lawmthu ka sawi bawk a. ka sawi ve fo tawh angin, Aizawl khawpui thanna kawng awmchhun a nih avangin urban-planning mumal tak kan neih theihna tura department te hmalaknaah lawmthu ka sawi a.

Demand No. 24 - Health & Family Welfare Department:

A dawt lehah chuan, kan Minister zahawmtak Pi Lalrinpuii chan Health & Family Welfare-ah hian lawmthu sawina tur pawh ka nei a, kan bial Aizawl West-I hi Mizoram-ah chuan voters-based ah bial lian leh voters tam ber dawttu kan ni a. Chuti chung chuan hospital kan nei ve lova. Urban PHC pakhat kan neih hi a kawtah motor pawh a in-turn thei lova, drop pawh a theih lova. A kalkawng a chhia in a kilkhawr em em mai a; mimal ram min peka sak a ni a. Vertical extension hi a theih si a. Chung tea hma min lakpuina a zarah NESIDS atangin a thuam thatna, a thar sakna tur kan hmu thei dawn niin ka hria a, lawmthu ka sawi a.

Keini kan bial hi a zau a, thingtlang leh khawpui inpawlh kan ni a. Sairang-ah rei tak doctor kan neih tawh loh hnu ah kan han sorkar a, doctor tha tak min dah sak avangin lawmthu ka sawi a. Chutih rual erawh chuan, Sairang hi highway, motor accident tamna em em, zanlaia tui tla zawn ngai leh medical emergency awm ve reng thinna a ni a. Chutiang karah chuan, PHC ah hian x-ray khawl leh a technician kan nei a, mahse a building kan neih loh avangin a dahna tur a awm lova. Hei hi a rang lama min ngaihtuah sak theih chuan, kan nghakhlel em em a ni. Tin, Sairang-ah hian ambulance chu kan nei ve a mahse, a chho zawng chauhvin a ding thei a, zawlah a ding thei lova; emergency thilah a manganthlak em em mai thin a. Heng te pawh hi kan Minister-in min lo hriat sak se. Tin, hna lak thar turte pawh a awm nualin ka hria a, a thuamthatna tur te pawh min lo hriatsak se ka duh bawk a ni.

Tin, zoram-mipui pawhin min lo hriatsak atana ka sawi duh chu, stigmatization - mihring, veng inhnualsuatna leh han inenhniamna hi kan nei-lian em em mai a. Ka bialah hian kan ram chhunga veng lar tak pahnih - Rangvamual leh Phunchawng kan nei a. Hna hrang hrang, hna te ber atangin kan han try ve a; kan han sawipui a, theihtawp kan han chhuah ve a; training pe tur tein kan han innawr bawk a. Amaherawhchu, ka rilru hneh deuhtu an sawia chu “Ka pu, interview ah khawi veng nge kan nih min zawt a, ‘Rangvamual’ kan han tih chuan min zawt chhonzawm tawh ngai lo,” an ti a ni. Heng te avang hian ka biala veng pahnihah te hian sorkar-hnathawk kan nei ve lo a ni, MR tih loh chu. A nihna dik takah chuan, electric leh PHE-ah pawh veng dang atangin min la hmui hram a ni. MR satliah pawh ni lo, casual hna ah te pawh, thiamna bik ngai hna te anih hran lova mifel leh tha te kan neihna angah hi chuan, kan veng, a bik takin Rangvamual leh Phunchawng te hi kan official te hian min lo hriatsak se; mifel tak tak, thalai ruihhlo lama fihlim leh taima tak tak kan nei nasa a ni. Chungcho chuan beiseina sang tak nen interview te an han face ve

a, graduate te, post-graduate te an ni a, an beidawng em em thin a ni. Kum khat chhunga interview hrang hrang IV grade leh eng emaw ah te pawh kan veng hi min lo hriatsak se ka duh hle mai.

Demand No. 29 - Social Welfare Department:

Kan Minister a fakawm ka ti khawp mai a. Ruang phurh leh phurh loh chungchangah Pu Muanpuia nen hian kum thum liam ta khan debate kan lo nei tawh a, ruang phurhna sum sen chungchangah. Hei, a takin a rawn tihlawhtling a, ruang phurha harsatna nei thingtlang bialtute pawhin lawmthu an han sawi a. Khang te kha hmalakna chak tak niin ka hria a. Chutiingin, Social Welfare Deptt. hnuai hmalakna hrang hrang leh hmachhawp lian tak tak a la awm a. A bik takin Women & Child Development lamah Anganwadi-in sak thatna te pawh kan hmu theuh ni khan ka hria a, kan bial lamin kan hmu ve thei lova. Kan bial lamah hian Anganwadi 44 kan nei ve a, chung zinga 24-ah electric connection kan nei lo a ni. Kan Power Minister hmalaknain chung zawng zawngah chuan electric connection kan nei ve tawh a, kan lawm takzet a. Amaherawhchu, toys leh eng eng emaw te kha kan la nei pachhe em em mai a. Bial tin chu kan han sem chhuak vek tawh nangin, tui dahna tur leh tui connection kan la mamawh a, eng emaw repair ngai te MLA fund pawhin kan han repair nawk nawk nangin, hmun hnih-khata tih belh tur kan thlen tawh kha min lo ngaih pawimawh sak se.

Demand No. 43 - Tourism Department:

Tourism lam hi Hachhek bialtu khan a rawn sawi chhuak a, Unity Mall (Ekta Mall an tia mi kha) ka bial chhungah. Pu Chairman, Unity Mall ka bial chhunga awm tur niin ka lo hria a, ka lawm hle mai a. Hei pawh hi mumal lo deuha pek anga sawi deuh kha a awmin ka hria a; consultancy firm-ah 'consultancy charge lak a awm' tih kha kan lo la hriat ve miah loh thil a ni a. Kha kha a awm anih chuan inhrilhfiah ni se. Amaherawhchu, tun sorkarah hian he department hi han fak duhna ka neih chu, kan budget, Supplementary Demand-ah khan crore 630 teh meuh mai chu SASCI ringawt pawh kha dil belh a ni a. Khang bak project tam tak kan hmuh zingah khan (ka hriat sual loh chuan) consultancy firm inrawlh pakhatmah an awm lova, a man-tang ei tur a inkarah pakhatmah a awm lova. Khang project zawng zawng, DPR concept stage atanga DPR siam zawng zawng kha kan sorkar department-a official te hian an siamthiam vek a, an tihlawhtling vek niin ka hria; chu chu, kalphung-thar danglamna chu niin ka hria a ni.

Pu Chairman, wawiinnia Zoram hmasawna tidanglam lawih thei tur Health Care Scheme hmabak kan la nei leh zel te bakah, Social Welfare hnuai hmalakna hrang hrangte sawi leh hram a chakawm a. PWD kawng chungchanga kan mipui tam zawkte tawrhna ah kumkhat chhung leka crore 700 chuang teh meuh mai leh heng zinga crore 300 chuang kawng siamna tur kan han hmuh belh te leh a thar hmachhawp tam tak a la awm tih kan han hriat hian a thlamuanthlak ka ti a. Chuvang chuan, wawiina kan Minister Pu Vanlalhlana leh Pi Lalrinpui te Demand-te hi thinlung takin ka pawm a. Tha taka hman a nih theihna turin House-in pawmpui ngei ila ka ti a ni e. Ka lawm e.

CHAIRMAN : Dar 5 a ni a; kan chawl dawn nge, kan sawi chhunzawm ang? (House-in chawlh phawt a remti a.) Anih chuan, kan chawl ang a, dar 5:30-ah kan lut leh dawn nia.

(Recess at 5:03 PM)

5:30 PM

SPEAKER : Aw le; tunah sawi turin Pu H. Ginzalala ilo sawm ang.

PU H. GINZALALA: Pu Speaker, ka lawm e. Hon. Minister Pu Vanlalhlana leh Pi Lalrinpuii te demand a lo lut a, kan sawiho mek a ni a.

Pu Speaker, rorelna sang berah thusawi theihna hun te kan han nei a. Kan Minister zahawm tak takte bakah member-te hian minute 10 bawr vel sawina hun kan nei ve a. Amaherawhchu kan bial issue, kan bial aspiration (kan dreams te pawh a ni ang chu) sawi kan han tum a, minute 10 chhungah hi chuan khung a har khawp mai a. Theih chu ni se kan request duh chu, kan ministers te pawh aniang chu - hun dang, hun thawl zawkah bial tin MLA-te hi uluk takin (ni khat pawh ni rawh se) sawihona hun awm thin se a that ka ring a. A chhan chu, minute 10 chhunga sawi zawh chi a ni lo a ni.

Kan ram administration-ah a ni emaw, governance ah pawh lo ni se kan issue chu thildang niin ka hre lova; kan decision-quality hi a ni thin a; chu decision-quality chu tha kan siam fuh a ngai a ni. Chutianga ti tur chuan interaction a ngai a. Anihna takah chuan, Pu Speaker, tunah hian kan Council of Ministers te hi an department officials te nen thil an discuss a, decision an siam mai thin a, tam takah hian; a nih dan tur pawh a ni a. Amaherawhchu, vawiina hian (kan official te paw'n beng lo chhungawng se) ka sawi duh chu hei hi a ni a - kan official, kan directorate lam leh kan sorkar-hnathawkte a bik takin kan Secretariat lam hi idea-nghet sa ('pre-occupied' ka'n ti hial teh ang) lo nei an ni a. Chuvangin, kan governance lama kan decision-making process ah hian thil thar hi a awm hleithei lo a ni.

Thil thar 'innovation' kan tih tak tak dawn chuan, bial tin issue hi kan Council of Ministers ten an hriat a ngai lehzuat a ni. Aizawl atangin dawhkanah decision siam mai chi ni lova, uluk taka discuss zel ngai a ni. Aizawl tlangah official thenkhatte nena decision kan siam hian a-democratic lo a ni. Chu chu, kan administration ah improvement a awm theihna turin thahnem ngai takin ka sawiah ngai ta ila. Chuvangin, uluk zawka sawihona nei thei zel ila; decision tha zawk kan ramin kan neih theih chuan, kan ramin hmasawwna thar kan hmuh theih ngei ka beisei a ni.

Demand No. 29 - Social Welfare Department:

A hmasaa kan sawi duh chu, EMRS hi Champhai South (East Tuipui bial lamah teh pawh a niang chu) ah chuan kan nei tawh a, Champhai North lamah hian remchang awm theih hunah kan beisei ru deuh dawn a ni.

Demand No. 45 - Public Works Department:

PWD lamah Khawzawl - Chhinzawl road (Rabung kawng) Pu W. Chhuanawma khan a rawn sawi tawh a, hei hi kei pawhin ka sawi nasa tawh em em mai a. Mizoram kawngah chuan a chhe pawl tak a niin ka ring a, hei hi ngaih-pawimawh ni sela.

Demand No. 24 - Tourism Department:

Tourism lamah hian hmasawwna tur potential kan nei tha khawp mai a. A bik takin, tunah hian Bangladesh lam hi tourism potential a tha ka ti a; khu lam atangin tourist kan hip theih ngat anih chuan a that ka ring khawp mai a. Tripura leh Cachar area lamte pawh tunah hian kan tourist destination tam tak kan thuan-tha chho zel a. Tunah Aizawl-ah pawh hian State

dang atang te pawhin tourist an rawn pung chho ve zel niin ka hria a. Chuvangin, kan thenawm-State te atanga tourist (local-tourist mai nilo) hip luh theih dan kan ngaihtuah a ngai khawpin ka hria.

Demand No. 42 - Transport Department:

Transport Sector ah hian ka'n sawi duh chu, zurui chung a motor khalh tam lutuk hi a pawl ka ti a. Dan ang chuan an license cancel tur tih niawm takin ka hria a, a takah hian a ni thin lo lai hi chu a pawl ka ti a ni. Chuvangin, zurui chung a motor khalh avanga accident tawkte ngat phei chu an driving license cancel ngei ngei ni se a duhawm khawp mai.

A dawt lehah chuan Pu Speaker, tunah hian Manipur lama kan unaute Churachandpur district amite, an motor lei tharte Mizoram-ah registration tih phalsak a ni chiah lovin ka hria a, hei hi ennawn ni se a that ka ring a. Tin, motor-intlanchhawk hi tihtawp chhin ni se a tha awm mang e ka ti; hei hi kan economy tan pawh hian a tha lem lo a ni. Tunah hian nitin motor sing 2-3 te idle-in a ding a, kha mite thawhchhuah kan ramin a loss tur ringawt pawh tam tham tak a ni a. Chuvangin, intlanchhawk hi tihtawp ni sela; amaherawhchu, junction-improvement lian tham kan tih theih loh pawhin, chhe te-te chu tih tel a ngai.

Nichin khan an rawn sawi tawh a, city bus pawh tuna mi aia te deuh te hi depute theih ni sela; tuna kan hman lai hi traffic ti jam thei khawp a ni tawhin ka hria a. Traffic tawt avangin Bus te chi emaw, Van lian deuh chi emaw service tir chhin ta ila a tha mai awm mang e, te ka ti a ni.

Demand No. 24 - Health & Family Welfare Department:

Health sector ah hian, drug license hi thingtlang khaw te deuh tan chuan issue a ni lem lova. Kan bial chhungah pawh a ni a; thingtlang khaw te reuh te-tea drug license pek hi a awm mang lo em aw ka ti a. Engpawh nise, in lama an kawl theih dan tur tal ngaihtuahpui ila a that ka ring a.

Tin, PHC hi Hnahlan leh Rabung-ah te ka nei ve a. A bik takin Hnahlan PHC phei chu Chin State-a kan unaute hian an rawn chhawr nasa em em mai a ni. Chuvangin, doctor te pawh kan indaihlo a ni, tunah hian. Chung te pawh chu hriat ni sela. Tin, Rabung-a doctor kan neihloh chungchang kan hotute bulah hian ka sawi tawh a, min ngaihtuhsak ka beisei a ni.

Pu Chairman, health sector hi nasa taka kan thumthat chuan, medical hi tourism te nen pawn a kalkawp thei ni hian ka hria a. Tunah hian 'medical tourism' kan ti dawn nge ni, State danga damdawi inenkawl na avanga pawisa tam tak kan sen ralna hi, kan health sector infrastructure kan thawm that chuan, kan save thei dawn a ni. Chu chu a nih avangin, health sector ah hian potential tha tak, (medical tourism ka ti hial dawn nge ni) hmasawn theihna tur potential kan nei tha a ni.

Tin, Tourism baw, Keilungliah-Dam hi kan hotute nen ruahmanna kan lo siam chhin a. Kan tourism minister pawhin min lo hriatsak se ka duh chu, tunah hian sea-plane te chi tum theihna a ni nge, ni lo survey neih ni se, tih rawtna ka rawn siam a, chu chu min lo hriatsak sela.

Demand No. 45 - Public Works Department:

PWD lamah hian kawng pawimawh tak tak ngaih-pawimawh ka nei a. Aite-zawl -

Hliappui kawng te, Pamchung - Rabung kawng te, Khawzawl - Rabung kawng te bakah khaw-te, thenkhat inhnaih te-tea awmte khaw-kar kawng hi grade tha zawka kan tih theih chuan, nakin kan future ah chuan electric vehicle te pawh a la introduce theih ka ring a. Chu chuan transport sector-ah hmasawna tha leh man tlawm tea kan inkalpawh zung zung theihna tur a rawn keng tel dawnin ka hria a ni.

Tin, Highway chungchangah tunah hian Indo-Myanmar Border Road Mizoram chhim tawp lam atangin Champhai District-ah lo kalin, Saitual District-ah, tikhan Manipur-ah a lut chho dawn a. Hei hi 'Highway-a puan ni se' tiin rawtna kan rawn siam a, kan CM hnenah DO letter pawh ka ziahtir tawh a ni. Heng te pawh hi kan hotute nena hma kan lak a pawimawh viauin ka hria a, Indo-Myanmar Border Road, NHIDCL-ina project report a lo siam tawh hi kan tihpuitlina highway-a kan puan theih chuan, Manipur leh Mizoram khawchhak lam Burma ramri-ah highway tha tak mai a kaltlang thei dawn a. Hei hi a duhawm khawp mai a, kan hotute'n min hriatsak sela.

Demand No. 12 - Parliamentary Affairs Department:

Tin, ka sawi leh duh hi Parliamentary Affairs lam kahhnawih deuh a ni mai thei a. Committee on Public Undertaking (CoPU) tih a ni a, chutah member zahawm tak tak eng emaw zat kan tel a, committee kan nei a, tun sorkar-ah hian rawtna kan rawn siam dawn a ni. Heng kan company - ZIDCO, MAMCO, MIFCO ang te an kal dan tur ruahmanna kan phak tawkin kan rawn siam dawn a, chulai chu min lo ngaih pawimawh sak sela a tha awm mang e.

Tichuan, Pu Speaker, kan Minister - Pu Vanlalhlana leh Pi Lalrinpuui te demand hi ka pawmpui a, he House hian pass ngei se, tih hi ka duh dan a ni e. Pu Speaker, ka lawm e.

SPEAKER : A lawmawm e. Hei, kan House leader pawh dam takin a rawn thleng a, a lawmawm hle a ni. Chawhma lam khan Member zahawm tak Pu Muanpuia khan a shawl kha a letlingin a batin ka hria a, kha kha an mawl lai deuha an bah dan em maw ni chu aw ka lo ti deuh a; tunah hian a dik zawngin a bat tain ka hria. Tunah chuan, Member zahawm tak, Pi Baryl Vanneihsangi ilo sawm ang.

PI BARYL VANNEIHSANGI: Pu Speaker, ka lawm e.

Demand No. 42 - Transport Department:

Minister zahawm tak Pu Vanlalhlana chanpual Transport-ah hian sawi a tam a. Tin, a chanpual, a chanvo zingah chuan enforcement chungchang hi han sawi ve ka duh a.

Hei, khawvel a changkang zel a, automobile leh sound system-ah te pawh a ni a; ri-ring thei tak tak te, ri-bengchheng tak tak te an siam chhuak zel a. Chuvang chuan, tun hmaa Mizo mipuite'na kan ngaihawh lem loh, amaherawhchu, mihring nunphung tibuai ve thei noise pollution te tunah chuan kan ngaihven a, kan ngaihtuah a lo hun ta a. Heng ah hian 'ri-tehna' kan ti mai a ni ang chu, decibel machine te pawh hi kan nei em, ka Chiang Chiah Lova; kan nei lo anih chuan, neih te pawh a hun tawh hle mai a. Tangkai taka hman chhoh tur a ni a. Tin, a tha-chi te pawh a awm leh zelin ka ring a, chung te pawh chu department lamin kan ngaihtuaha, enforcement duty te hmanraw awm thei ang ang kan thuan chak a tha hlein ka hria a.

Tin, nichinah khan Member zahawm takin a rawn sawi, 'rui chung motor khalh'

chungchangah accident vang leh tihpalh thil liau-liauah pawh ruih vanga han inpuhthluk te pawh thil thleng ve thei a ni a. Breathe Analyzer hi chu pawh kan nei nain, kan duh ang leh a tangkai tur ang taka hman a ni lo deuh em aw, ka ti a; a tha tawh lo deuhin ka hria a. Hengte pawh hi ena, a theih chuan a tha zawk ngaihtuah zel pawh a thain ka hria.

Pu Speaker, duty post chungchang hi ka sawi duh a. Hmun hrang hrangah duty post an nei a. DTO leh enforcement te an chhuak thin a. Chung atan chuan a bik takin, Hualngohmun-leh Selesih-ah te hian duty post kan mamawh hle mai. Sawlai sawn in tlan pelh chuan in hmu ang a, Hualngohmun kawng chhak lamah bang si deuhin a kil takah eng emaw rangva pahni-khat vel a tlar ve a, Saw saw a-sur a-sa hnuai a an duty-na a ni a. An mawhphurhna a pawimawh si a, tiang ringawta an duty thin hi an lainatawm hlein ka hria a ni.

Chumi ka sawi rual chuan, kan bial lamah hian ar phurte leh transport lam duty te inkarah 'inhmuh-diklohna' ti ila, a ni emin ka hre si lova; amaherawhchu, inhmuh-thiamlohna a thleng tep thin a ni. Chungah te chuan DTO lamah te kan leng a, kan inkawm a. Anni pawhin min ngaihthiam nasa em em a. Chutih rual chuan, mipui hian transport dan leh heng kan ram dante hi, 'an zawm tur a ni' kan ti a. Chulaiah chuan inremna chu kan han siam nain, mipui lam bungraw phur thinte pawhin dan kan zawm a pawimawh a. Chutiang zelin, DTO lam pawhin mipuite awareness kan peka, an zawm tur dan te pawh kan hrilh tam a pawimawhin ka hria a. A department lam pawh tun aia nasa zawk hian hma la thei se a duhawm hle a ni.

Tin, Falkawn Presbyterian Kohhrana zirilaite an pung zel a. Tichuan, bus permit an han dil te pawh transport lamin rang takin an rawn tihfel sak a. Chuvang chuan, vawiinah hian kan Minister chungah an aiawhin lawmthu ka sawi bawh ni sela.

Demand No. 45 - Public Works Department:

Public Works chungchanga ka rilrua thil lo lang hmasa ber chu, 'quality' tih a ni a. Hei kan ram kawng inkal pawhna kan sawi thin a. Tun hma atangin kan aw hram te, kan duhthusam ram te kan sawi hian, ram dang, hnam dang kawngte leh an khawpuite sawi a ngai zel mai a. Hei hi ram-hmangaihna leh thahnemngaihna thinlung atang chuan a nain, a tlawmthlak deuhin ka hri a, Pu Speaker. Chuvang chuan, kawng-tha leh material-tha kan tih te, kawng-tlo kan sawi te hian, Mizoram an sawi tura kan tan hi a hun tawhin ka hria a. Midangte neih tur leh tih tura kan dah ringawt hi a fair lovin ka hria. Keimahniin kan ta tur, kan hman tangkai tur a ni a, mipui chhawr tur a ni a. Chuvang chuan, quality-control lamah te, check lamah te kan tan a ngai khawp mai a. Zuantui-Quality Control Division te pawh a tlabal tawh viauin ka hria a, a aia tha zawk din tumna te pawh a awm a ni mai thei e. Chu mai a ni lova, kan raw material leh bungraw hrang hrang kan test-na tur khawl tha te pawh kan mamawh leh zelin ka hria a, chungah te pawh chuan department leh a changtu minister zahawm tak te pawh thahnem lo ngai lehzual se kan duh hle mai a, vawiin hian demand-ah ka'n han sawi lang a.

Tin, alkatra tha-chi leh bituminous concrete te pawhin resurfacing kan han ti chho zel a; hengte pawh hi uar a tha mang e aw, ka ti a, ATL Road, nichina member zawhawm tak te'n an sawi tawh ang khan, keini pawh sawlaia Muallungthu Road te pawh zinkawng pawimawh tak a ni a, Pu Speaker. Chuvang chuan, sawlai kan thuam thatna kawngah te pawh a tha leh a tlo thei ang ber rawn hmang zel se kan duh a. Chutiingin, zinkawng bang te pawh sawilan a awm a, Hmuifang - Chhiahtlang kawng te pawh tlan a nuam lova, a tlan tawh ten kan hre berin ka ring a; tlan a nuam lo khawp mai a. Alkatra-a han luan dum zar

mai te pawh kan nghakhlel khawp mai a.

Tin, ZMC&H panna kawng hi thuam-that a ni thin a. Amaherawhchu, thuama, han thawm na na-na hi chuan a lo mam lova. Damlo na tak tak tlan chakpui ngaite leh dimdawi ngai tak takte han phurna kawng atan chuan, a kawng a nuam lo khawp mai a. Hei hi chu bial thil mai ni lo, ram pum thil a ni a; damlo apiangte'na kan hman a ni a. He kawng pawimawh tak mai hi kan Minister hian min hriat sakin, a tha thei ang ber, a tlan nuam ber, zawh nuam bera min siam sak turin vawiinah hian ka'n demand a.

Tin, Samtlang - Hualngohmun kawng ZMC pawh tura kalna a awm a. Hei pawh hi fur thlen hmaa siam a pawimawh em em a ni. Tin, Ngaizel phei hi sawi leh ka duh a Pu Speaker. Hei, term hmasa lamah khan a changtu, South-II bialtu zahawm tak Pu Chhuanthanga pawh khan a sawi tawh a. Amaherawhchu, hmalakna a awm lovin ka hria a. Ngailzel phei lung tlain lirthei a tihchhiat dan te, tin mihring nunna a khawih-pawi dan te case tam tak a awmin ka hria a. Hengah hian rock-fall mitigation technology te pawh rawiha, hmana, chutianga umzui chu a hun tawh hlein ka hria a. Hemi atan hian South-II leh South-III bialtute pawh kan inhawng em em a; keimahni lam atanga bawhzui tur a lo awm anih pawhin Pu Speaker, a department, a neitute, a changtute pawh thlawp kan inhuam a, kan inhawng reng a ni, tih lai hi ka'n sawi tel duh bawh a ni.

Tin, South-III bial chhunga khaw-inkalpawhna tha lo tak tak siam tura hma lak mek a ni a, department-in assessment te an siam a, heih he financial year tharah hian ngaih-pawimawh theih anih chuan kan lawm hle ang, tih kha ka'n sawi tel bawh a.

Tin, PMGSY-4 ah hian kan khua, kan biala khaw pakhat motor la tlanglohna (ti mai teh ang; mawilo ni lo se) Lungsei khua hi PMJSY 4 ah kan tel tih ka hria a, kan lawm em em a. A changtu minister chungah pawh lawmthu kan sawi tel ni sela. Chutih rualin, Cylone Remal tihchhiat, siam hmabak tam tak a la awm a, chungte chu khawngaih takin fur thlen hmaa min siamthat sak theih chuan kan lawm hle ang.

Demand No. 24 - Health & Family Welfare Department:

Pu Speaker, Sialsuk-ah PHC kan nei a, amaherawhchu doctor nghet kan nei lo kha kan sawi a; Session hmasa ah te kan aupui a, aniin kan ngenna te ngaipawimawhin rang takin min tihhlawhtlin sak a, doctor tha tak mai min pe a, a chungah Sialsuk khawtlang aiawh leh sawlai PHC hmang tangkai tute zawng zawng aiawhin lawmthu kan sawi a. Tin, x-ray khawl te pawh kha kan han ngen a, 'GeM portal hmanga chah mek a ni' tih kha a ni a, kan chan ngei pawh kan beisei a. Chuta ka'n belh duh chu - Sialsuk leh Aibawh PHC ah te pawh x-ray khawl chauh a tawh tawh lo a; tun ang laiah chuan darkroom te an lo hman lutuk tawh loh avangin, printer tha te a ngai tawh a, chung te pawh chu MLA Fund-a lei turin kan inkau reng a. A khawl a hi lo thleng sela, a bak convergence-a tih chhunzawm ngaiyah chuan kan inhuam reng a ni.

Tin, lawmthu sawina dang - IVF hi kan ngaipawimawh hle mai a, kan sawi lang thin a; kan Minister-in chak takin a bawhzui a. Amah leh department mai ni lo, MLA pahnih - kei leh Pi Prova-i pawh min sawm a, sensitization program te kan nei a; chutiang chuan hma kan la ho a ni a. Tunah PMJVK hnuai ah hian nuai 197-in ZMC-a IVF center clinic awmna tur atan hma lak a ni a, a chungah lawmthu kan sawi a. He IVF tih nan hian sum kan hmang tam khawp mai a, kan ram a sum hi a luang chhuak hnem hle mai a. Hei hian nasa takin

kan sum pawh a safe kan beisei a ni.

Tin, ZMC-ah damlo khaw hrang hrang atangin an rawn pan khawm thin a. Tunah hian tunhmaa kan buaina ni lem lo parking lamah kan tawt ta tlat a. A chang chuan ambulance dinna turh damlo rawn tlawh tute an lo din chang te pawh a awm a. chutiang chuan han indinthuah te, tawt tak karah a lo awm thin a. Hei hi a damdawi-in tih changtlun anih ruala a ken tel a ni miau si a. Chuvang chuan, multi-level parking hi kan mamawh em em mai a. A theih a nih phei chuan nakin zela kan harsatna tur min sutkiansak dawn a ni.

Tin, Pu Speaker, Hlimen - Health & Wellness Center leh hmun hrang hranga health-clinic kan mamawhna te pawh, a tul anih chuan ziakin kan thlen ang a, hmaichhanah te pawh kan leng ang a; kan minister-in chak taka min bawhzuipui kan beisei a.

Demand No. 29 - Social Welfare Department:

Pu Speaker, ruihlo do kawngah department hian hma an la tha khawp mai a, kan lo hmu a. Tin, ruihlo mai ni lo, ruihlo bultanna zuk leh hmuam lamah te pawh hma an la nasa khawp mai a. Chung a do remna leh harm reduction kawngah te hma an la nasa a, kan thlawp tak meuh meuh a. An hnathawh a tha kan ti a; kan ram thalai te, ram mipuiin a mamawh a ni a. Tin hemi Social Welfare-ah hian Tribal Research Institute Kelsih a mi hi tunah hian sak mek niin, an zo thuak a, a function hun tur hi kan nghakhlel em em mai a. Engtik ah nge a fuction theih ang tih te pawh ka'n zawt tel teh ang.

Demand No. 43 - Tourism Department:

Kan bial hi tourism potential nei tha tak kan ni a, hengah hian tan kan lak chuan kan ram hmel a mawi dawn hle mai. Keini pawh Best Tourism Village Award dawng thei te kan nih avangin, kan Minister hian khawngaihlin tan min lakpui zel sela.

Tin, lawmthu sawina pakhat - Swadesh Darshan 2.0 project-ah Sialsuk khua min telhsak avangin kan lawm a. Chuti ruala ka'n zawh duh chu, Sailam ah nikum October thlaa central lam atanga lokalte khan Tourism Department Director hnenah crore 18 man DPR siam min phalsakin ka hria a; khangah te khan hmalakna eng chen nge a kal tawh kan hre chak khawp mai a. Beng-sikin kan ngaihtuah a, ha-hipin kan sawi a; a hlawhtlin hun kan nghak takzet a ni.

Tichuan, Pu Speaker, heng ruahmanna demand tha tak takte hi anihna tur ang leh tangkai taka hman a niha, kan ram leh hnamin a hma a sawnpui zel theihna tur a tan ka thlawp a ni e. Ka lawm e.

SPEAKER : Tunah chuan, Member zahawm tak Dr. K. Beichhua ilo sawm ang.

DR. K. BEICHHUA: Pu Speaker, ka lawm e. Kan sawi mek Pu Vanlalhlana leh Pi Lalrinpui demand te hi ka han rawn sawi ve dawn a.

Demand No. 29 - Social Welfare Department:

Pu Speaker, i hriat angin, he department hi welfare department - department zau tak mai mihring welfare min ngaihtuhsak tute an ni a. Nausen nu puma awm atanga tar pension, double pension-te welfare a ni a. Tin, a lehlamah zu nghawl vei leh addict te atanga rawngbawltu pastor te welfare a ni tel bawk a. Tin, education ah ti ila, Aganwadi atanga

University thleng te welfare a ni leh bawk a. He welfare pawimawhna hi chutiang chuan kan hriatthiam ka ring a.

Chutiang chuan, Social Welfare leh Tribal Affairs te hi directorate hranin a awm a, Women & Child Directorate hranin kan nei bawk a ni. Chungah chuan theih tawp chhuahin ram rawngbawl hna tunah hian an thawk mek a. Chutih lai chuan, Tribal Affairs bik hi Art & Culture Department lama dah tur ni awmin kan lo hria a. Hei hi tak tak a nih chuan a pawidawn hlein ka hria a ni. He kalphung-thar sorkar hian engpawh ni se, he Mizoram hming hian ‘dah lul suh u’ tiin ka ngen che u a ni. He Tribal Affairs hi Pu Atal Bihari Vajpayee hunlaiin tribal-te hamthatna tur ‘inclusive development’ tia an lo din a ni a, a hnuaiiah hian tribal-te hamthatna tur tam tak a awm a ni. Chung ang zawng zawng chu India state hrang hrangah hian Social Welfare Department hian a enkawl vek a ni.

Mizoram-ah pawh tribal welfare hi inception anih atanga vawiin ni thlengin Social Welfare Department hian a lo enkawl a; Planning Deptt-in a enkawl state pahnih-khat sawi tur a awm mai thei a, mahse an hlawtling tak tak lem lo a ni. Entirnan: Art & Culture-ah lo dah ta ang ila, Art & Culture chuan Aizawl bak Lunglei-ah office pakhat a nei a; Social Welfare erawh chuan district tinah thawktu manpower an nei sa vek a. Chuvang chuan, Art & Culture enkawlna hnuaiia dah ai chuan, Social Welfare hi thum chak ila, tun aia chak zawk hian hma la ta ila. Chutiang ni lova keiniina, ‘he department hi hei hian chang rawh se; Planning-ah i dah ang u; Art & Culture-ah i dah ang u’ kan tih chhung hian kan thenawm state te chuan Tribal Affairs atang hian development sum nasa takin an hailut mek a ni. Chuvang chuan, ngenngawl takin hei hi chu, ‘dah lul suh u’ tiin he sorkar hi ka ngen a ni.

Demand No. 42 - Health & Family Welfare Department:

Pu Speaker, ‘Health & Family Welfare’ tih apianga kan rilrua lo lang thin chu Damdawi-in hi a a ni a. He House-ah pawh discussion kan han neiha kan rilrua lo lang ber chu, Damdawi-in tho hi a niin ka hria. Mahse, he department hian a tum chu - preventive, promotive leh curative a ni. Chungah chuan, ‘a englai hi nge kan hlamchhiah anga, a engah hian nge concentration kan pek ang’ tih hi inzawt ta ila, ‘prevention is better than cure’ a ti a ni, kan Thufing chuan. Chuvang chuan, preventive measure hi tun aia chak zawka kan lak a tulin a pawimawh hle, tih hi ka hmuh dan a ni.

Indona field ni ta sela, kan primary healthcare workers te hi kan frontline-workers, kan sipai-hmatawngte an ni; a hmatawng sipaite an tlawm chuan, a hnuanga mite chu kan ngaihtuahawm viau dawn a ni. Chutiang chuan, kan healthcare system-ah hian heng kan primary healthcare workers te hi tun aia chak zawkin, equipment a ni emaw, infrastructures a ni emaw chak zawka thumthat hi a tul a. Vawiina naupang-tete ‘niminah chutah chuan a kal a, zing lamah a kaihtawh theih loh’ tia an ruang kan hmu te; vawiinah chuan communicable disease avanga thihna aiin, non-communicable disease avanga thalai thihna hi a tam tawh zawk a ni. A hmian ‘stroke’ tih pawh kan hriat ngailoh kha tunah chuan thingtlang lama pawh mizo-tawng pangngai hmanin kan hmang tawh a.

Chuvang chuan, hengah te hian preventive measure kan lak nasat hi a va han tul tak em! Awareness - inzirtirna kan pek tam a va ngai em! Hospital tha tak tak nei ila, kha lama hma kan lak si loh chuan a fuh chuang lo ang; a khingbai tlat a ni. Chuvang chuan, Pu Speaker, tun kalphung-thar sorkar pawh hian chutiang zawng chuan hma a la nasa a, kan minister zahawm tak pawh hian; tun ai hian la nasa lehzual se, tih hi ka fuihna a ni.

Chutiang anih chuan, primary level atanga district damdawi-in rawn thleng hi an tlem raih ang. District damdawi-in tha tak kan lo neih theuh chuan State damdawi-in lama rawn in refer tur an tlem phah ang a, keini bial hrang hrang enkawltute pawh vawiina kan luhai ang hian kan luhai lutuk lo ang, tih hi vawiinah hian ka sawi duh a ni.

Chuvang chuan, preventive part leh district-level ah hian theihtawp chhuahin, ‘hawh u, i tang teh ang u’ tiin kan insawm a ni. Tin, a promotive ah pawh hian nasa taka hma kan lak a ngai a. Vawiina Mizoram-in a-ber kan nihnate hi Pu Speaker, a zahthlak asin! - cancer vei tamna ber state; HIV vei tamna ber state; hepatitis vei te pawh a tam tawh lutuk. Chuvang chuan, heng zawng zawnga program hrang hrang, tunah chuan National Non-communicable Disease Control Programme te pawh kan nei tawh a. Programme hrang hrang NHM hnuaiyah, Under the umbrella of NHM-ah hian kan nei a ni. Heng zawng zawng tihchak hi helama damdawi-in kan ngaihpawimawh ang hian i ngaipawimawh teh ang u, Pu Speaker. Chutiang chuan, a damdawi-in lam kan ngaihtuah a pawimawh a, kan ngaihtuah tel tur tho a ni a.

Chuti laia ka rawn sawi duh pakhat pawimawh deuh chu, tunlai khawvelah chuan district hospital ah hian surgeon leh anesthetist te kan nei vek tawh a, kan hunlai ang kha ni tawh lova. Inzai zawh post-operative care ah hian ICU khum 2-3 tal kan neih a ngai; hnimhlum peka harh chhuak tawh lo tih a awm loh nan. Chutiang chuan, Siaha damdawi-in te pawh saw ICU kan mamawh hle a ni, Pu Speaker. Chuvang chuan, theihtawp chhuahin helamah hian kan minister hian hma min lo lakpui se a thain ka hria.

Tin, Universal Health Care kan ti a, hei hi ‘engti chiahin nge kan kalpui ang’ tih lai hi ngaihtuahna nasa tak kan lo hmang a, Pu Speaker. Tuna central sorkar-ina ‘AB-PMJAY hi a chhung lamah kan dah ang; a pawn lamah hian rawng dang kan hnawih ang’ a tih hi Universal Health Care emaw kan tipalh ka hlau a. A thlen loh ka beisei; kan lo thlir ang.

Tin, Pu Speaker, private hospital tam tak kan nei a, accreditation te pawh kan pe zel a; a tha. Mahse, monitoring lamah engnge kan an? Private hospital rate inanglo lutuk te hi ‘engnge a chhan’ tih lai te pawh hi zawhna awm thei a ni. Thawk khat lai khan ‘Doctor tan NPA lak phal a ni tawh lovang’ tih order kha a rawn chhuak nghe nghein ka hria. Sorkar leh heng private hospital-a doctor-te thawhhona hi tha rawh se; chu chu kan healthcare thatna tur a ni. Helaiah ‘pawisa chuti zat bill theih’ tih vel hi healthcare kan tih ber a ni lo, tih hi kan hriat a thain ka hria. Chu chu a ni a, Pu Speaker; chutiang deuh zawng chuan hma la ila tih hi he House-ah hian ka rawn sawi duh a ni

Demand No. 43 - Tourism Department:

He department hi kan hria a. Mizoram hi tourist-potential area kan ti a, area tha tak kan nei. Chhim lamah kan district-ah sawn ‘Castle of Beino’ kan nei a; Palak Dil kan nei a; Phawngpui kan nei a; Mount Mawma kan nei bawk a. Tourist circuit tha tak an ni a, sawng te saw min promote sak se, tih hi tourism chungchanga ka sawi duh a ni.

Demand No. 45 - Public Works Department:

Pu Speaker, ‘pawisa a tam’ tih kha tukin lam atangin kan hre mawlh-mawlh a, kan budget ah pawh a tam tih kan sawi mawlh mawlh a. Tin, nikum lam ruah sura kawng chhiat lai pawh khan, ‘ruah sur vang a ni kan la siam theihloh; pawisa chu a awm a ni’ tih tawngkam kha kan hriat a ni a. Mahse Pu Speaker, ka sawi duh chu, sorkar chuan ‘kan thawk mawlh

mawlh alawm' kan ti mai thei. 'Eng hian nge efficiency siam' kan tih chuan, speed hi a pawimawh a ni. Vawiinah hna chu kan thawk; mahse, muang te-tea kan thawh chuan fur a tla leh mai dawn; khawchhung kawng kan siamdan pawh hi kan hmu vek alawm. Scooty leh two-wheeler chuang ho phei chu an han inchhuih deuh a, 'Ei ah! Kalphung-thar' an ti. Chuvang chuan, speed hi i tirang deuh teh ang u. In thawklo kan ti lo; May thlaah ruah a lo haw leh mai dawn; tunlaih sik leh sa te pawh a danglam vek tawh. Chuvang chuan, hun tawite kan neih hi i hmang tangkai teh ang u. 'Kan mawng hi rit suh se; kan speed hi tha teh se' tih hi PWD chungchanga tawi te ka rawn sawi duh a ni.

Demand No. 42 - Transport Department:

Pu Speaker, Karnataka ah PSU khan kan zuk kal a, an State revenue 12% kha chu an bus service atanga lak a ni. An awhawm; an thikawm. Keini hian, ka hriat sual loh chuan bus 26 kan nei a, a tlanna kawng (route) hi pakua kan neiin ka hria. Hengte hi, national highway tha tak tak kan han nei chho ang a, central sorkar hmalakna zarah. Bus service te pawh hi ti tam ila, revenue generate turin. (**Speaker:** Minute 2 in a pel ta e. I zo thei dawn tawh em?) Pu Speaker ka zo dawn e. Chutiang tur chuan hma i la teh ang u. Tin, 2-wheeler taxi hi district dangah a awm vek a; engatinge Siaha ah hian 2-wheeler taxi permit hi min pek ve miah loh? Hei hi kan Minister zahawm tak hian min react nghe nghe se, Pu Speaker.

Demand No. 12 - Parliamentary Affairs Department:

Pu Speaker, lawmthu sawi tur a awm a. The Mizoram Pension for Members of the Defunct Mizo District Council and the Defunct Pawi-Lakher Regional Council Amendment Bill chu he House-ah ngei kan pass a. Vawiiina kha a hlawkna tel turte kha an kumah pawh ni-tla-tur lam vek an ni a, kum 80 chuang vek an ni. Khang hote tana pension benefit tha tak kan siam thei hi a lawmawm ka ti a, a changtu Minister hnenah pawh lawmthu ka sawi a ni.

Sawi tam a chakawm khawp mai Pu Speaker, mahse hun a tlem si a. Khang demand tuna ka rawn sawite kha ka support e, Pu Speaker. Ka lawm e.

SPEAKER : Aw, a lawmawm e. Tunah kan Opp. Leader kan ko dawn ang a; minute 8-a kan warning bell thin kha, minute 10 ah kan hmet ang a. Minute 12 ah zawh hram kan tum turah i ngai ang aw. Tunah Opp. Leader, Member zahawm tak Pu Lalchandama Ralte ilo sawm ang.

PU LALCHHANDAMA RALTE, OPP. LEADER: Pu Speaker, ka lawm e. Hei kan House Leader nimin lamah emergency thila Delhi lamah an koh thlak avangin, a tel lova demand han sawi kha memberte kan khawhar khawp mai a. Kan mamawh leh kan ngaih pawimawh kan sawite a niin a hriat loh hi chuan a kim lo kan ti a. Vawiinah Delhi atang a rawn haw, Lengpui Airport atang a rawn direct hi a lawmawm ka ti a. Chutih rual chuan, vawiinah hian demand kan sawi tur Pu Vanlalhlana leh Pi Lalrinpuui te demand, *List of Business* indawt dan ang hian ka han sawi ang a.

Demand No. 12 - Parliamentary Affairs Department:

He department hi a chang tur awm tak, Pu Vanlalhlana, he House member 40 thu zinga a senior ber, he House-a thu hmasa berin a chang hi a lawmawm ka ti a. Chutah chuan, kan Session kal ta leh tuna kal lai mekah hian sawi duh ka nei a.

MLA te chu Pu Speaker, I dinglam an ni emaw, I veilam an ni emaw kan privilege leh kawng

hrang hrangah inthuruala indawm thin kan ni a. Nikum 17th October-a kan Minister zahawm tak Pu F. Rodingliana, P&E Minister Aizawl daiah Assam Rifles ten an lo tibuai a; a official tour khatianga an lo tibuai kha kei, ka rilru hi a la dam thei lo a ni. Parliamentary Affairs concern a ni a, member/democracy pawngsualna angah ka ngai a. Ka duh aiin Treasury Bench lam atanga thlavang-hauhna a na tawk lovin ka hria a. Tu chungah pawh, i dinglam emaw, veilama mite emaw chungah pawh a lo thleng a nih pawhin, memberte zahawmna vawn kawngah hian, a bik takin Parliamentary Affairs hian na deuh thek-thawka kan chet a tul dawn riau mai ka ti a ni.

A pahnihaah chuan, India ram rorelna hmun hrang hrangah Mizoram Assembly House hi hei, kum 50 chuang kan lokal ve ta a. India President te, Vice-President te'n House address te pawh an rawn nei thin a. An lo kal pawha an sawi leh kan history atang pawha kan inchhuanna chu, hmundang ang lo takin i dinglam leh veilama mite hi House chhungah han in tih bawrh-bawrh thin mah ila, mimal taka inkawmngaih thin; tin, kan tawngkam pawh parliamentary language uluk deuha hmang thin kan ni a. Amaherawhchu, tun tum kan Session-ah hian Pu Speaker, mawi lo tak takin a bikin, tum hnih kan House Leader ber atang hian parliamentary language ni lo deuh hman a awm a. Rorelna a thu ve thin kan senior, vawiina he House-a awm ve tawh lote rilru naa han siam te; kan member senior-ten he House-a tiha mawi lo, tawngkam inbah avanga nimin lawkah kan Assembly House thenawmah police leh civil invuaknaa thisen chhuah hial thleng kha, he House-ah tawngkam kan hman uluk loh vang anih avangin, he Parliamentary Affairs Ministry hnuaiyah awm kan nih angin khawng zawka a lu ber, kan House Leader atanga MLA-te hian he House zahawmna kan vawn chhonzawm hi a tul ka tih a ni.

A dawt lehah chuan, Pu Speaker, kan hmabakah hian ram-hmasawmna a kal chho a, kan hmu a. Kan Assembly House awmna hi a laili lutuk a, Session han neih nikhuaah Aizawl khawpui traffic te pawh kan tibuai a. Tin, tul thilah Commonwealth Parliamentary meeting (Northeast) te pawh kan han thleng ve a, a zahthlak a. Northeast-ah emaw, India ram hmun dangah Assembly House an nei tha em em a ni. Kan ram insingsak kal chho ah hian kan Chief Minister ho hian Assembly House Complex tur hmun tha zawk ngaihtuah hi kan tih makmawh a niin ka hria a. Chu chu ka ngaipawimawh a, Parliamentary Affairs chhungah khan ka han sawi duh a ni.

Demand No. 42 - Transport Department:

Tin, Road-transport leh Air-transport ah te vawiina kan dinhmun chu kan hria a. Member dante sawi inland-water transport bikah khan, Tlawng Lui hi Inland-water transport tura hmalak a ni thin a. Tin, Khawthlangtupui-ah te pawh hmalak a ni thin a. Vawiiinah hian enge a thlen chin? Hmasawn zawka hei hi kan bawh a tha lo maw, tiin ka sawi duh a.

Tin, Transport Department subject chiah chu a ni lova, a kaihhnawihah; kan khawpui traffic heti khawpa a tawt avangin cable car kha kan sawi thin a. Bazar leh Zemabawk te, Durtlang leh khawi emaw hmun hrang hrang university site te pawh a feasibility te kan sawi thin a. UD&PA purview pawh a ni mai thei a; hei hi transport system anih tho avangin, chulai chu uar zawka kan kalpui a tul a. Vawiiinah hian kan kalkawng a thang thei tawh si lova, chulai chu ka ngaipawimawh tel bawh a ni.

Tin, 'Vehicle Scrapping Policy of Mizoram, 2023' tih kha kan nei a, khami hmang khan kum 15-a upa sawrkar-motor scrap tur kan han ti deuh thin kha a ni a. Tun kum kal laiah

hian sorkar motor engzat nge scrap tura kan tih? Department thenkhat chuan kum 15 pawh ni se an lo enkawl tha viau mai thei a. Scrap khan a rate a tlawm viau mai thei a, auction khan a rate a tha zawk ang em, ka hre lova. Khalai kalphungah khan sawi tur a awm chuan kan minister-in min react se ka duh a. Tin, private-vehicle upa tak tak, safe tawh lote pawh hi kan scrap policy hian engtin nge a huam dan, tih te hre duh bawk a.

Demand No. 45 - Public Works Department:

Public Works ah hian road communication hi a pawimawh em em a. Pu Speaker, hei ka bula thu Pu Dy. Speaker hian ‘ka sawi ve a remchang si lova, kan ngaih pawimawh dun kha han sawi tel the’ a ti a; ani hi a ngawi thei a. Kan lifeline ber National Highway, 306, (a then chuan 06 te pawh an ti ang chu) Aizawl - Silchar Road hi Assam - Bilkhawthlir futsal ground thleng khu chu an han titha viau tawh a; a chhak lampang Kawnpui Bazar - New Khamrang, (State PWD kuta kan han dah deuh reuh; a enkawl dan pawh lai deuh) vawiina hian kan lifeline kalkawng hi engnge a dinhmun? Rei vak lovah fur kan hmachhawn dawn a, sorkar hi a ngaih a ngam em? Tuna a kal chhoh danah hian kan progress a tha tawh em tih hi ka ngaipawimawh avangin ka sawi tel duh a.

Tin, Pu Speaker, kan PWD Minister bial - Bawngkawn to Durtlang Road via Sihphir bakah Kawnpui thleng hi tunah hian BRTF Road a la ni a. hei hi State-PWD Road-a lak theih dan a awm em aw? Tunah pawh kawng resurfacing an ti a, Sihphir leh Lungdai bawr velah te. A tha tawh lo em em a. Tin, a kawng tihzauh tak tak nei lem lovin metal road tereuhte an maintain ringawt mai a; State PWD-in a ken chuan double line-ah te pawh a kaltir thei a. Chutiang tur chuan heng kawng pawimawh tak te hi State PWD hian an la mai thei em le tih kha ka zawt duh bawk a ni.

Tin, Mizoram-ah hian inter-state connectivity road kan mamawh em em a. Chung zingah chuan khawchhak lam, Champhai - Zero-point Seling atang hian Manipur lam inkalpawhna tur National Highway-02 hi (150 ni thin kha a hming an thlak reng mai a, theihngihl te pawh a awl a) sorkar hmasa hunlai khan cheng crore 1500 kha Union Road Transport and Highway Ministry-in sanction a rawn siam tawh a. Kha kha engtikah nge kan tan tan theih ang? Helai hi Manipur kan unaute nena kan inkalpawhna tur kawng te pawh a hnai a. Tin, thlang lamah New Vervek - Bagha Road atang a existing road 306 (A) hi tunah pawh eng emaw chen chu cheibawl a ni tawh a. Amaherawhchu, a kawng tak tak tur, sorkar hmasa atanga kan buaipui thin kha vawiinah hian engnge a thlen chin ka hre Chiang chak khawp mai.

Tin, YMA - General Conference ka bial Sakawrdai-ah kan dawng dawn a. chumi atan chuan Sakawrdai internal-road leh a panna kal kawng cheina tur crore 4 vel department-in proposal a siam a. Engzatnge PWD Department in a dawn tawh tih kha kan hre chhak a. Tin, Ramrikawn - National Highway 54 via Sakawrtuichhun kawng sawi hlawh tak mai, a tira restricted tender tura tih a hnua open tender tura tih leh, a tawpa departmental works deuh reuha kal ta si chungchang hi - restricted tender kha eng vanga cancel; engvanga open tender-a chhuah lo nge kan nih; department works ni ta se, tunge works supervisor; tuna a physical leh financial achievement engnge, tihte ka hre chak bawk a ni.

Demand No. 24 - Health & Family Welfare Department:

Health & Family Welfare chungchangah hei, health sector hi priority ah kan dah ngei ngei tul ka ti a. Tun tum budget hian ₹1346.71 lakh-in nikum BE a pha lo hi a pawh ka ti khawp

a. Amaherawhchu, kan House Leader hian hei hi a ngai pawimawhin kan ring a, RE ah emaw a theih ang angin han duhsak se. A bik takin Universal Health Care scheme cashless ni tura kha ka ngai pawimawh khawp mai a.

Hmanni Q&A ah khan ka zawt tawh a. Vawiinah hian Non-Government Hospital Association of Mizoram (NGHAM) leh Mizoram sorkar te hian inremna mumal kan la nei thei lova. State-sorkar hospital ringawta kan kalpui chuan kan mipuite hawp khawp a tling dawn lo a ni. Chuvang chuan, mipuite healthcare scheme-a inziak lut tura kan tih hian tuna kan hmanlai meka inziak luh hun kha March Ni 31 ah a tawp ang a, 1st April atangin he cashless hi kan hmang dawn a ni a. Tunah hian cashless tura in switch-over tur hian, mipui healthcare scheme zawm turte tan hun hawn a ni tawh em? Engtik nge kan hawn tan dawn? Tin, civil hospital atanga sub-centre thleng hian a ni a; tute emaw natna nei an rawn phur thleng a, tetanus injection atanga engkim mai lei nghal ngai vek hi; nachhawkna leh medical mamawh zualpui (emergency kit) tal hi chu sorkar hospital ah hi chuan dah ni hram se, chutiang tur chuan kan House Leader hian Health Deptt. hi han thuam thei se ka duh hle mai. (**Speaker:** Minute 15 ah khung ila aw.)

Demand No. 29 - Social Welfare Department:

Social Welfare hnuuia Tribal Affairs bik hi Allocation of Business, 2014 siamthatna Official Gazette, January Ni 22, 2025 a chhuakah khan, Tribal Affairs hi Art & Culture Deptt. ah a kal pheih dawn tihna a ni a. Pu Speaker, tunah pawh i bialte nena kan buaina, I bial Suangpuilawn-a tribal hostel sak lai pawh a chawl thup a. Chutihlain, ka biala "Construction of multipurpose community hall at Darlawn," kan sorkar laia kan biala project lian ve ber ₹720 lakh man kan sak tan mek a, kha 48 % physical achievement kan nei tawh a. Amaherawhchu, a pawisa chanve pawh kan la hmuh hmian tunah hian a tawp ta rup mai a. Department in UC a submit loh vang nge, engnge a chhan ka hre lova, hei hi kan Minister-in min rawn react ta se. PWD lamin kan contractor te hnenah 'pawisa a awm tawh rih loh avangin in withdraw hrih phawt mai rawh u' an ti a, kan mangang khawp mai.

Chutiang chiah chuan Pu Speaker, i bialah te pawh a ni a. Zoram hmun hrang hrang - hmun 10 vel ah heng 2023 project kal lai kha a tawp tlat mai a, hei hi min enchiansak se ka duh khawp mai. Tin, EMRS hi kan bial Sawleng-ah kan han nei ve a, kan hun lai khan a thawk tura lo kalte an awm a; tunah hian ZIDCO-in an la zawk dawn ta niin kan hria a, kan lawm khawp mai a. A hmaa sanction crore 25 vela kha crore 40 velah central sorkarin a tisang ta hi kan lawm a. He hna hi engtikah nge kan tan theih ang? Tin, sorkar account-ah hian sum a lo lut tawh em tih te ka hre duh bawka ni.

Demand No. 43 - Tourism Department:

State Institute of Hotel Management (SIHM) Berawtlang-a awm hi, PAC chairman ka nihna angin PAC team te'n kan va tlawh a. Sorkar hun kal tawhah crore 10 zet hmanga sak tihpuitlin si loh, C&AG Audit note-ah pawh 'management failed' a tih kha a ni a. Hei hi kan sorkar hian engtianga kalpui nge a tum tih ka hre duh a. Tin, Chaltlang - Tourist Lodge pawh hi privatize emaw, outsource emaw kan tum nia hriat a ni a. Hetah hian engnge kan thlen chin?

A tawpnaah chuan, Tourist tam zawk hip kan duh a, tourist kan tih te hi engnge anih min han hrihfiah sak thei se. Domestic tourist foreigners te an lo kal a, India ramah an awm a. Mizoram chhunga mite hi tourist an ni ve thei em? Eg: Aizawl-pa hi Palak dil emaw, Beino

ah emaw te va kal ta se, tourist a ni ve tho em? Visitors note ah tourist angin kan ziaak dawn em tih te ka hre tel duh a. Homestay leh hotel changlung zawk, changkang zawk, mikhual hnam dang lo kalte tan chawlhna tlak anih leh nihloh endikna hna hi tourism department mawhphurhna ni em? Chutiang tur chuan guidelines mumal kan nei em?

Tichuan, Pu Speaker, hun min duhsak a, ka lawm a. Heng kan Minister pahnih - Pu Vanlalhlana leh Pi Lalrinpuii te demand hi he House hian lungrual taka kan pass ka duhin, ka rawn thlawp e. Ka lawm e.

SPEAKER : A lawmawm e. kan Dy. Speaker nen in thu dun a, a hmingin ramhuai i hnawt chhuak fo mai a. A thutna hi sawn ta mai ila a tha mai em aw, tih te ka lo ngaihtuah rum rum a. Engpawh nise a tha vek e. Tunah kan House Leader Pu Lalduhoma ilo sawm ang u.

PU LALDUHOMA, CHIEF MINISTER: Pu Speaker, nimin *Question Hours* a zawh khan Delhi lam kan pan a, zan khat kan zuk riak a. Tichuan, kan Union Home Secretary te, Director Intelligence Bureau te leh National Security Advisor Pu Ajit Doval te nen chuan kan inkawm a; Home Secretary leh DIB pheih chuan House-ah min rawn tlawh a. Tukin khan kan Home Minister Pu Amit Shah nen kan inbia a. Chutah chuan, kan airport security tur CISF te vekin airport an enkawl a. Mi 200 lai mai (ka hresual mai thei a zat kha) rawn dah an tumah khan, “100 a tawk; mi 100 leng accommodation kan nei; mi 100 hian an enkawl tawk; a aia tam hi chu rawn ti rih lo ula; a tul ta a nih leh in te kan sak belha kan intihfel hnu ah rawn kal se” kan ti a, chung chu min remtihsak a. Chu bakah chuan kan airport kal zel dan turah “AAI te nena tihtlan dan kawng kan zawng tha leh dawn em ni ang” tih a lo rawt a, “a tha a lawm; kawng chu zawng leh ang hmiang; keini pawh chu chu kan duh dan tho a ni; kan NGO-te pawhin an duh a, party dang te pawhin an duh a; zawng leh ila” ka ti a. Chu chu amah, Civil Aviation minister leh kei, ‘kan pathumin remchangah sawi ho phawt ila, chuta tang chuan bul kan tan dawn nia’ kan ti a.

Tichuan, hmanah helaiiah kan sawi tawh ang khan, Indian Airforce ngawr ngawr hi kan tum a ni lova, option dang tam tak a la awm a. AAI te kan la inhawng reng a; tin, 16th Finance Commission ah te pawh kan thlen a, ‘chung chu engnge a an dawn kan nghak ang’, kan tih kha. Kan Home Minister in hma min lakpui tak tak a tum niin ka hmu a. Chuvang chuan, kha lampang kawng kha kan zawh thei thut mai thei a ni.

Kan hriat angin, Pu Speaker, tun Inrinni lo awm turah hian kan Home Minister-in Assam Rifles te thlahna min rawn hmanpui turin ka sawm a, a lo chho dawn a. Tun maiah khan Lt. General Vikas Lakhera, DG, Brig. leh DIG te nen ka room-ah kan sawiho leh bawk a; anni chu an rawn thleng tawh a. Helaiiah hian in lo sawi tawhin ka ring a; kan vaia sawm kan ni a. Kan Home Minister hi a riak dawn nge, dawn lo hi a la decide fel thei lova. Kum tam tak chhung inremna kan neih theih loh hnuah keiniin kan han inrempui thei ta hi lawmawm kan ti a. Pathian tanpuina liau-liau niin kan hria a. Tin, kan Union Home Minister hian min tumpui em mai a, aniin theih tawp min chhuahpuina a ni a. A chungah kan lawm a. Tin, Assam Rifles lamah Director General, Lt. General Vikas Lakhera hian harsatna min siam lo reng reng a. Chutianga inpawh taka kan tih avangin hei hi a lo thleng thei a. Hei hi historical tak a nih avangin, kan zavai hian he hunah hmang ho turin kan sawm ve che u a ni, kei pawhin.

Tin, SASCI pawh kan rawn umzui a. Tunah hian thil pathum sanction kan rawn hawn hman bawh a. 2nd Instalment (Part-I) - crore 93.50 leh Part-V reform 3 crore 100 sanction kan rawn hawn a. Tin, Part-I additional (a hma khan crore 275 min pe tawh a) chu, kan hmanna fel taka kan report avangin ‘100% dang kan pek belh ang che u’, an ti a. A hmaa kan lo hmuh tawh bakah crore 275, a lehkha nen sanction kan rawn hawn bawh a ni. India ramah Part-1 additional dawng hmasa ber kan ni mai awm e kan ti a, kan lawm viau a ni. Tin, SNS -SPARSH hi crore 250-500 a ni a, tunah hian kan upload fel der bawh a, hmuh thuai pawh kan inbeisei a. Kan thawktute an tang em em a, a lawmawm ka ti khawp mai.

Tin, Pu Rijiju nen kan inkawm hman bawh a; tribal leh minority affairs changtu kha a ni a. Tunah hian PMJVK hi state thenkhatah an hmang tha lo an awm a ni. “A hmang thalo ho hman bang min lakkhawm sak la min pe the; kan state-allocation min pek tawh sa, kan normative-allocation ei hek lovin” kan inti a. Ani pawh a inhawng khawp mai a, hmanhmawh deuhin kan han thehluh a. Kan hotupa Dr. Beichhua’n min chah ngun bawh a, anni tan pawh project 4 kan han thehluh bawh a. Hospital sakna tur te, Mara House sakna tur te, Mara Girls’ hostel sakna tur leh Mara Special Guest House ZMC bula sakna turte kha kan han thehluh nghal bawh a. Heng bakah hian project pawimawh dangte pawh kan thehluh nghal bawh a, kan hmu ngei ang chu kan ti lo a. Amaherawhchu, min pek chu a tum hmel khawpin kan hria a ni. Tin, ‘State dangte hman bang’ han tih kha, engzat chiah nge a la chiang lo deuh hlek a, financial year tawp dawn lo ni chho bawh nen. A tam deuh chuan, kan hlawhtlin chhoh te kan inbeisei a. Heng kan project thehluh zingah hian Irrigation Department concern te a awm a. Nizanah kan official te, kan Chief Engineer ten tlaivar deuhthawin an buaipui a, tukina kan tihfel hnu-in a estimates te kan thehluh hman phah a. chuvangin, kan official te, Irrigation Department staff-te an thawkrim tak meuh meuh a, an chungah lawmthu ka sawi duh a ni.

Tin, Art & Culture leh Tribal Affairs chungchang hi - Cabinet-in “Art & Culture leh Tribal Affairs hi, kan culture hi tribal-culture anih avangin, hei hi kalkawp chi a ni e; hmunkhatah awm teh se” tiin thu a lo titlu tawh a. Amaherawhchu, a hnuah cabinet bawkin thudang a nei leh a. Heng PMJVK te, Minority Affairs leh Tribal Affairs te atanga thil lo kal hi department zawng zawng khawih theih chi a ni deuh tlat mai a ni. Tun hmain kan hria a, PMJVK te pawh department pakhat, minister pakhatin a enkawl lai chuan, minister dangin a zar an zo hlei thei lo tih kha chiang takin kan hmu tawh a ni a. Chutiang deuh chuan thil hi a kal leh hi kan hlau a. Chuvang chuan, “Department tinin hemi hnuaihan hian an project priority an rawn thehluh ang a, Planning-ah lo lutin, an lo thlifim ang a; Planning-in a enpui loh chuan project pawimawh tak tak a ni si a, a fel dawn lova. Chuvangin, India hmun dangah pawh Tribal Affairs hi chu Planning-ah hian an lo dah deuh thluah mai a; chuti chuan ti ila, minister min huap kim ang a, department a huap kim ang a; kan vaiin SASCI ang deuh hian kan insem thei ang a. Department pakhat kuta a awm chuan, rin aiin intawm hi a har duh phian zel mai a. Tiang hian kan tangkaipui zawk ang e, kan ram hian,” tih thil thuah tunah hian Art & Culture chu department ngaia kal leh tura tih a ni leh tawh a. Tichuan, Tribal Affairs bik kha chu planning ah a lut dawn a ni.

Tin, non-works department si technical mi nei miah lote kan awm a, a then chuan EE thleng nei te kan awm a. EE nei department pawh khan EE pakhat khan Mizoram pumpui hi a enkawl thei lo reng reng a, Aizawl khawpui ringawt pawh a enkawl thei lova, EE pakhat leh a hnuaihan staff tlem khan. Khatianga works kan lo khawih ve vak khan supervise-tu pawh awm si lova, ‘a chhia a ni’ tih monitoring committee inspection atangin a chiang

ta em em a. Ka bialah pawh chu chu thil thleng mek a ni a. Supervise-tu awmlo chuan contractor-te an zalen em em mai a, an duh duhin a ti mai a. Rod-size dik lo an hmang a, a thil chawhpawlh a dik lova, a pawl ta thin a. Chu chu a nih thin avangin, ‘project tam tham chi hi chu department pakhat hian khawih vak vak tawh lo sela, department hrang hrangah semzai zel tawh ila’, tih avanga tih a ni. Supervision leh monitoring hi theihtawpin i ti ho ang u, kan zavaiin. MLA zawng zawng hian kan bial chhunga sorkarin project a neihte reng reng chu i ngaihven ang u; i monitor tha ang u; i supervise tha ang u. A fello a awm chuan, i report ang u, tiin ka sawm che u a.

Tin, party tina unit leh block te, sorkar hmalakna hmuna awm reng rengte pawh kha, hawh u, i endik tlang ang u. Tin, kan NGO leh mimalte pawh, mimal-thahnemngai khawi emaw laiah an kal a, hnathawk chhe deuh mai te an lo hmu a, a thla an lo la a, video-in an rawn ti viral a, a tangkai em em a, action kan lak theih phah a ni. Amaherawhchu, hnathawh lai la zawh si loh leh la char hman lo te emaw han vih-khawha, ‘kalphung-thar hnathawh chu a chhe mang e’, tia mi hnathawh la char hman lo leh zel han chhuih-chhiat kha chu ching lo ila; a intihmualpho duhthlak deuh hlek a, heng hi chu. ‘A tha lo erawh chu i report ang u; i tang ang u’ tiin mipui zawng zawng pawh ka sawm duh a.

Tin, Monitoring Committee-ah kan vaiin kan awm vek a, tumah bang kan awm lova; mipui-sorkar anih angin kan tiho a. Tun hnaiah kan Monitoring Committee zinga tel ve ngei pawl thenkhatte’n Monitoring Committee hmingin khawi emaw lai hnate an lo endik ve nual ni awm tak a ni a, chu chu Monitoring Committee hian a hriatpui lova. Hengte hi thudik anih chuan leh, pawisa te an lo dil anih leh nghal phei chuan a pawl hle dawn a ni a. Hetiang hi State-project monitoring memberte’n kan tih loh tawp tur a nih ka ring a, chung lakah chuan kan inthiar-fihlim thei dawn lo anih chuan, sorkar-project endiktute zinga tel tlak lovah te pawh kan la inchhuah maithei a ni. Chuvangin, heng hi thleng tawh lo se.

Tin, kan PWD minister hi a hriselna a chak vaklo chungin, a hmunah hian kawng hi a endik hnem em em tawh a, a hmunah a kal deuh zel mai a, a fakawm ka ti takzet zet a; lawmthu kan sawi duh a. Tin, tunah hian NHIDCL-te pawh kan ko a, hnathawh dan tur kan hrilh a. “Leivung management-ah fimkhur rawh u, tunhma ang mai mai khan kan palzut dawn lo a nia; kawng thlangah in leivung in paih tam lutuk; huante leh luikawr engkim, leilet thlengin in tichhe tawh; tiang hi kan awih dawn lo. spoil bank fel tak in nei ang a, a ti chhe lo turin in ti ang a, a remchang laiah leivung management fel takin in kalpui ang a; kawng sir zawl-zau leh park nuam tak tak, pangpar mawi tak tak chin theihna tur siam theih a ni, in leivung hmang hian; chuvang chuan, hetiang tur hian hma in la dawn nia,” kan ti a, kan ko khawm a, kan hrilh vek tawh a ni.

Tin, kawng an laih hian, khaw inkar kawng an zawh tawh hnu ah khaw chhung kawng khawih loh in an dah thin a ni. “Fur-ah a diak a, thalah a khu a. Chuvangin, tun chinah chuan mihring chenna khua hi khawih hmasa zel tawh rawh u; khaw-kar kawng hi chu a hnahnungah dah rawh u; a chhawrtu tur tamna lai khawih hnahnuna in dah hi a tha lo,” kan ti a, common-sense hmangin engtin tin emaw kan ti ve a. Tin, kawr-te a lo awma, a hnar lamah V ang duhin kawngin a lo kan ta a; chutah chuan leivung a kawr kam tawn-tawnah an dah a, kawrah tui luanna tur leivungin a chhilih tawh hnu te pawh JCB-in an hai-hawng leh a; a khuar kuk mai a, tui luan thlakna kha. “Heng te hi ti tawh suh u; hume pipe dah mai ula, hume pipe chhungah luang sela; a chung khuh vek rawh u; kawr-kam lehlam-lehlamah V ang deuh a awm tawn hi badminton/volley ball court-ah te pawh a siam

theih a; zawl-tha deuh, nuam deuhin a siam theih a ni. Heng mai mai common-sense hman lo hian in ti a, kawng kual han cut theih, nakina cut leh la ngai tur ang chi leh han hnawh tur remchang tak tak, hetia han en mai hian a awm thluah mai a. Hengte pawh hi ngai-pawimawh rawh u,” kan ti a, a theih ang angin tunah hi chuan kan han enpui a.

Tin, kan buaina ber chu Pu Speaker, forest-clearance kan hmu theilo hi a ni a. Tunah hian theihtawp kan chhuah a kan tifel ti tih tawh a. Entirnan - Khamrang vel te pawh NHIDCL contractor hnenah pek daih tawh a ni a; forest clearance a awmluh avangin an khawih duh tlat lo mai a ni. Chutih chhung chuan kan kawng a chhe tawh si a, kan state sumin kan ti leh ta ringawt mai a, sum a crore tel kan seng a ni. Chu chu forest clearance kan neih ve leh contractor-in a take-over ang a, tuna kan black-topping zawng zawng khu a hai-khawk leh vek dawn a, a uihawm khawp mai. Amaherawhchu, nawrh-ah te kan invau tawh si a, tih ngaihna a awm si lova; sum kan sen-thlawn dawn avangin kan ti lo thei lova, kan siam mawlh mawlh a ni a.

Tin, Parliamentary Affairs chungchang kan Opp. Leader zahawm takin a rawn sawi kha - A pawh khawp mai a, nimin ka awm loh hnu-ah hliam tuarte an lo awm kha a pawh ka ti takzet a. Hmanni lawkah Lammual-a Chapchar Kut lawmnaah hawihhawmna thu kan sawi zo hlawl a; kan ram politics-ah hian mizo-zia in a ken loh vai-zia (vai tihdan) hi la-lut tam lo ila a tha khawp mai a. Dik tak chuan, heng thil lo thlenna chhan chu Pu V. Zirsanga chungchang vawi eng emaw zat he House-ah hian phawrh anih vang a ni a. Keiniin kan phawrh a ni lova, i veilama mite hian a bul an rawn tan-that vang a ni. Dik tak chuan, Zirsanga hi tunge kan tih chuan, congress leh MNF pawhin duh taka CEM-a an lo neih kha a ni; a CEM tawh loh hnua pawh MNF leh Congress intawma sorkar an siam thleng khan case a neih hnu vek; chutah pawh chuan Adviser to CEM atana duh taka an dah mek a ni. ZPM-a a lo luh hma thleng hian chu hna chu a thawk a ni. A hmaa duh taka khatianga hotua an lo neih, ZPM anih tak ve leha soal ta em ema han chhuah thar thut te kha, kha kha a bul a ni a. Dik chiah chuan, kha kan buaina thu kha phawrh-phawrh lo ila chuan heng hi a thleng lo tur a ni a.

Tun hmian Lok Ayukta-ah te khang case kha a lokal tawh a, Lok Ayukta-in CBI kutah a dah a, CBI-in kan sorkar hmasaah phalna a dila an pek duh loh avangin, ACB kutah a lut leh ta a ni a. Hei hi kan hunlaia thil thleng a ni lova, sorkar hmasa hunlaia thil thleng a ni a. A lokal zel a, keini hunah an final ta a ni chauh a; ZPM-sorkar hian engmah tih kan nei lo tih kha ka sawi duh bawk a ni.

Tin, kan Assembly House hmun tur hi kan vei tlang a, tuna Assam Rifles te an lo chhuah dawn takah chuan, a committee kan din dawn a. He ram ruak hi engtin nge kan hman dawn party tinte nen kan inrawn khawm ang a, kan NGO te pawh kan telh dawn a ni. An chhuahsan tur ramah hian Assembly Building tur zahawm deuh leh mawi tak khawi emaw laiah hian kan dah ve thei ang em, tih te tun atangin rilruah lo neih ila. India ramah hian Assembly House nei chhe ber kan nih ka ring tawh a. Helai kawng sira han tlan phei pawhin helaiah hian Assembly House a awm tih pawh a hriat hlei nem! Chutiang chu a ni a. Building satliah angin a lang a, mi ram ta chu a mawi em em hlawn a, a rual-awhthlak ka ti a. Chuvang chuan, Assam Rifles ram chhuahsan turah te hian remchang kan nei thei ang em tih te tun atangin rilruah lo neih tlang ila a thain ka ring a.

Tin, cable car chungchang kha, kan han enzui a. Tuna kan rilru mai maiah chuan, kan

remtih tlan dawn chuan tuna Assam Rifles quarters-guard chung tlang khi rope way atan main station-ah hmang ta ila. Khita tang khian Pachhunga University College lama chhukthla a awm ang a, MINECO lama pheii a awm ang a, Ebenezer-a chhukthla a awm ang a; chuta tang chuan Chawnpui AIR ram sawn kan dil pawh an phal tawh a; sawlaih sawn station khat awm ta sela. Ch. Chhunga High School-ah khi tuna University dah kan tum takna te a lo ni bawk a, Aizawl West College awmna tur a lo ni bawk a; khitah khian awm leh ta sela; chuta tang chuan University-ah chhuk ta sela; chuti chin chu a bul tanna atan hmang phawt ila a tha awm mang e chu kan ti a. Kha kha tuna kan han chhunzawm dan chu a ni.

Tin, vehicles-scraping policy hi tuna kan tih theihlohna chhan chu, hmun zawl-zau tak a ngai a, chumi atan chuan S. Hlimen-a kan hmun saw cyclone remal in tihchhiette chhungkaw dah nan kan hmang tlat ta mai a. An chhuah hun chu a ni tawh a, an chhuah duh loh pheii chuan a buaithlak khawp ang a; a hunbi tuka dah an ni a. Saw saw min luah sak lo sela chuan, tuna scrap ngaite hi kan scrap vek tawh tur a ni a. Mahse, a theih tlat tak loh avangin, tunah hian a department pawh an lu a hai a, ‘a tihdan i ngaihtuah ang, out source dan te pawh ngaihtuah ila; mimal ram zau deuh, kawt zawl zau deuh neite pawh hian lo ti ve mai ta sela; a part han thiah-darha thir chhiaa han hralh mai theih ang chite pawh a lo ni a. Chutiang zawng te chuan hma la ila a tha ang a, tih te pawh an ngaihtuah deuhin ka hria a ni.

Tin, Bagha Road hi - contractor ruat a ni tawh a, mahse, hna a thawk tlat lo mai a ni. Hemi New Vervek - Bagha Road ah hian crore eng emaw zat dah a ni a, hna an thawk lo reng reng a. Chuvang chuan, ‘a engineer te kha terminate rawh u; hetiang hrim hrim hi chu a dik lo’, kan ti a. Hna hi an hmu nasa lutuk a an thawk seng lo nge; hna tha tak tak tihian thawh loh in an dah reng mai a. Tichuan, han ban dawn chiah khan an ngai ngam lova, an rawn thawk tan ve leh ta a. “Hei, a thawk tan ve leh tawh a nia; a inchhawp leh teuh tawh; kan han enchhin rih dawn em ni ang” an ti leh a. ‘Nia maw le’ te kan lo tihpui ve leh a. Chutiang chuan tunah hian an thawk tan chho dawn a.

Tin, kha kha chu a la duh rei dawn a; tunah Tuivai Lei kan hawng tawh si a. Zohmun - NEEPCO chhuk thla tur, khami inkar kawng kha a chhe em em mai a, a grade pawh a chhia a; NEEPCO hovin an chakkhai lakna kawng an siam chawp kha a ni a. Saw saw a tlang loh chuan hel-kual a ngai a; a tlang chuan, hnaitein Silchar - Bagha zawng zawng, Manipur Lamka lama kan unaute zawng zawngte kawngpui ber tur a ni tawh bawk si a; ‘engpawh nise, temporary pawhin i tih that sak ang’ kan ti a, crore 4 tunah hian kan pe a, a thawktu tur pawh an ruat fel tawhin kan hria a. Tichuan, PCC a ngai a, “PCC law law loh chuan, road-alignment a awih lutuk a, roller a kal thei lo; PCC law law lo chuan a thaidarh vek dawn’ an tih avangin, kawng rin nghal tur ni lovah crore 4 chu a thlawnin kan va seng leh ringawt dawn chu a ni; a loh-theih-loh thin a ni, heng hi. Chungte chu kan PWD Minister ka’n sawi kep ni sela.

Tiang khan department dang eng emaw zat an awm a. Sawiho lai te ka ngaithla ve lo bawk a; a minister ten an rawn sawifel mai turah ngai ila, ka’n duh tawh ang e. Ka lawm e.

SPEAKER : A lawmawm e. Home-work nei hawng tur kan awm dawnin ka hre deuh hlek a. BJP member lamte khan, ‘min be tha rawh u, central ah chuan Aw kan nei ve thei a nia; min kawmngaih rawh u’ an ti thin a. Kha, kan House Leader report atang

khan kan member zahawm tak Pu Beichhua phei kha chu project lian deuh-deuh mai pathum-pali lai mai kha a sawiin ka hria a. Normative-allocation pawn lampanga dil kha chu lo home-work chhunzawm ve ta se a pawl dawn emaw ni le, ka lo ti deuh a. Chuvangin, home-work an nei deuhah ka lo ruat ringawt a. A bak chu in thu-thu ni rawh se.

Le, tunah chuan kan minister zahawm takte demand lam kan hawi ang a. A hmasain, Pu Vanlalhlana kan sawiho tak te windup-a, sawifiah-ngai a tihte sawifiahin leh a demand-te House-a pass rawn dil nghal turin ilo sawm ang u.

PU VANLALHLANA, MINISTER: Pu Speaker ka lawm e. Kan House Leader khan react ka tum point tam tak kha a rawn tichiang a. Tin, membrete'n in rawn sawi point kha ka lo chhinchhiah vek a, a theih ang ang chu kan han react nghal ang a. A copy pawh in hmu nual in ka ring a. Tin, a vaia han chhiar chhuaha kan react dawn chuan hun a duh deuh hlek dawn a; a hrechiang lote chu kan la inhrilhfiah chho turah ngai ila. Kan department chanchin leh kan hnathawhte min hriatpui tura ka'n duh lamah kan kal hmasa ang a. Tin, zawhna thenkhat han chhan te pawh awm turah ngai ang aw.

Demand No. 9 - Parliamentary Affairs Department:

He department hian Ex-Mizo District Council leh Ex-Mizo District Regional Council te hnenah pension leh family pension a sem-chhuak thin a. Tun financial year 2025-2026 budget estimate chu lakh 170 a ni a, pensioner leh family pension te hi kum tin 5% increment pek an ni. Pensioners' charge hi Chief Controller of Account, Accounts & Treasuries Department in a enkawl a. Accounts & Treasuries Department hian quarter tin LOC a rawn issue thin a ni. Hei hi Demand No. 9 hnuaiah budget estimate chu a ni e. Demand No. 12 ah hian, Dy. Chief Whip office enkawl na tur budget hi siam a ni thin a, kum 2025-2026 budget estimate chu lakh 104 a ni. Pu Speaker, Parliamentary Affairs Department hi a lian lova; amaherawhchu, a pawimawh em em a. Vawiina rorelna Assembly House-a kan thu te pawh hi Parliamentary Affairs hmalakna a ni pakhat a.

Demand No. 45 - Public Works Department:

Mizoram PWD hi Engineer-in-Chief in a ho a, Engineer-in-Chief hnuaiah hian Chief Engineer 4 - Highway, Road, Building & Other Departments leh Chief Architect te an awm bawk a. Chief Engineer hnuaiah hian working circle 9, working division 30 leh sub-division 79 an awm leh a ni. PWD organization hnuaiah hian technical staff 578 leh non-technical staff 1326 awmin, an vaiin 1904 an ni. Technical staff ah Engineer-in-Chief 1, Chief Engineer 4, Chief Architect 1, Superintending Engineer 16, Superintending Architect 2, Executive Engineer 69, Architect 4, SDO 81, Asst. Architect 8, JE 225, SA 110, Overseer 3, Surveyor 2, Draftmen 46, Electrician 4 leh Mechanic 2 an awm mek a ni.

Secretariat lamah Joint Secretary 1 leh Under Secretary 1 an awm a. Road Fund Board lamah hian Chief Executive Officer 1 leh Dy. Chief Executive Officer an awm bawk. Non-technical staff lam hi Jt. Director leh Dy. Director (Administration) ten an ho a, an hnuaiah hian staff 1326 an awm mek a ni. Technical Department an ni a. Amaherawhchu, technical staff te hi an indaih lo nasa hle a. SDO sanction post 137 a awmah 77 an luah a, a ruak 60 a la awm a ni. JE sanction post 369 awmah 218 an luah a, a ruak 151 a la awm a; tunah hian SDO leh EE la-kawp te pawh an awm nawk a ni. Tun kum hnih 2023-2024 chhung hian chung officer kan sawi takte atangin mi 18 lai mai pension-in an chhuak a, JE pawh mi 36 lai pension-in an chhuak bawk a. Hna thar lak a ni si lova, technical staff indaihlohna a nasa chho hle a. Kum 2025 hian SDO indaihlohna hi 78 a ni tawh a, JE indaihlohna hi

187 lai a ni chho ve bawk. Kum 2025 chhung hian hna te tha taka enkawl chho tur chuan a lo berah JE 40 leh SDO 20 tal lak thar kan mamawh tak meuh a ni.

PWD hnate hi hlawm lian deuh pahnih - Maintenance leh Construction-ah then a ni a, hengah hian pahnih dang - Road and Bridges leh Building ah then a ni leh a. PWD hian kawng km 7135.70 a enkawl mek a, building pawh 2980 a enkawl bawk a ni. Kawng maintain nana kan sum hmuh tlangpui chu kum khatah 40 crore a ni a, building 2918 enkawlna tur fund kum khatah 4.4 crore kan hmu tlangpui bawk. PWD enkawl mek kawngpui motor kal theihna hi km 7135.70 a ni a, National Highway hi km 714.09; State Highway hi km 260.38 leh City-road hi km 357.77 a ni. Aizawl bika km 100 vel kawng kan neih turah hian PMGSY maintenance hi km 951.53 a ni a, Bridge (Lei) 135 a enkawl mek bawk a ni. Under-construction (Highway tel lovin) km 4958 a awm mek a, maintenance a tan sum hmuh tawh lakh 135 telin crore 40 a ni. NEC-NESID road, PM-DevINE hi Ministry of Road & Transport & Highway hnuai a awm an ni a, kawng 7 - km 143 leh building 23 thawh mek a ni. Physical Achievement hi 1.98% niin, Financial Achievement pawh 16.72 a ni bawk. Sum hi crore 48.82 hman a ni. NABARD hnuai kawng project 23 - km 222.18, Bridge 10 leh Building 13 thawh mek a ni a. Physical Achievement hetah hian 34.94% a ni a, Financial Achievement hi 19.2 a ni bawk. Heta tan hian sum crore 44.46 hman a ni.

Pradhan Mantri Gram Sadak Yojana (PMGSY) hnuai hna 42 a kal mek a, Physical Achievement chu 146.80 a ni, sum hi crore 114.99 hman a ni. Ministry of Tribal Affairs hnuai Building pahnih sak meka Physical Achievement 45% niin, Financial Achievement pawh 40% a ni a, crore 1.70 hman a ni. Ministry of Health & Community Welfare hnuai ah building pahnih sak mek a ni a, hetah hian crore 3.42 hman a ni. State Government-a 3054-Head leh 5054-Head hnuai ah sum crore 140 hmuh a ni a, repair hna - retaining wall leh side-drain siam nan te hman a ni. Tin, hna chi hrang hrang 186 thawhna tura hman a ni a, Physical Achievement hi 91.35% niin, Financial Achievement pawh 28.57% a ni. Tin, sum crore 44 hman a ni tawh bawk. Bhagiratha Engineering Limited Private Performance Guarantee sum hmuh-let atangin AA leh ES crore 99.69 hmuh a ni tawh a, heng a tante hian hman tura ruahman a ni -Aizawl-Lunglei Road atan crore 45.89 crore ruahman a ni a, tender tura hmalak mek a ni.

Aizawl khawpui chhung pawimawh zualte thumthatna tur crore 44.80 ruahman niin, paver-machine kal theihna km 84.100 chu bitumen concrete-a tih chhuah tum a ni a, tender tura hmalak mek a ni.

Contractors Registration Rules enawna siamthat a ni. CPWD manual hmanga registration tih hian buaithlakna tam tak a hring a, leilung-fate tan a buaithlak lo tur zawnga siam rem a ni. Class hniam ber Class IV ni thin kha Class V-a siamthar a ni a, hetiang hi an hnathawh theih chin leh class hrang hrang awmdan chu a ni –

<i>Contractor Class</i>	<i>Nos. Registration</i>	<i>Hnathawh theih chin</i>
Class I	138	Bithliah a awm lo
Class II	122	1000/- lakh chin
Class III	148	500/- lakh chin
Class IV	924	230/- lakh chin
Class V	11	50/- lakh chin

Ministry of Road Transport & Highway hmachhawp hrang hrangte –

- 1) NH 44-a balance work chu March, 2025 chhunga sanction hmuh beisei a ni a, crore 190 vel beisei a ni.
- 2) NH 03 - Mamit to Bairabi hi DPR siam mek a ni a, Land Acquisition buaipui mek a ni.
- 3) NH 502 - Zero Point to Saiha Road DPR hi MoRTH-ah submit tura buaipui mek niin, Land Acquisition buaipui mek a ni.
- 4) NH 02 - Seling to Tuivai Road hi DPR submit a ni a, Land Acquisition pawh buaipui mek a ni.
- 5) NH 306(A) - Vairengte to New Vervek Road alignment approve turin Ministry ah thawn mek a ni.
- 6) Bridge over Chhintuipui River on Lawngtlai - Saiha via Tuipui Ferry Road chu sanction hmuh tawh a ni a, tunah hian tender mek a ni.

Ministry of DoNER Road hnuai hmachhawp hrang hrang te chu –

- 1) Construction of Thenzawl - Sialsuk via Lau River chu sanction hmuh tawh a ni a, tender tura buaipui mek a ni.
- 2) Construction of Khankawn - Rongura-hmun Road at Serchhip District pawh technical clearance hmuh a ni tawh a, sanction hmuh thuai beisei a ni.
- 3) Construction of Tualpui - Champhai Road pawh concept paper pawm a ni tawh a, DPR siam mek a ni.
- 4) Construction of Pukzing - Silsury pawh clearance hmuh tawh a ni a, sanction thuai beisei a ni.

Hengte hi NESIDS hnuai kan kawng ruahman te an ni-

PMGSY hnuai kawng 7 chu sanction nghal a ni. PMGSY hnuai kawng 62 proposal pawh siam mek a ni a, heta tanga kawng 23 hi March 2023 chhungin PMGSY-IV Batch-ah sanction tir hman tum a ni.

SASCI 2024-25 hnuai ah project leh hmachhawp dinhmun chu hetiang hi a ni: –

Part I	-	Project 3 tan crore 93.52;
Part IV	-	Project khat tan crore 50;
Part V	-	Project 8 tan crore 218;
Part VII(A)	-	Project 3 tan crore 15.18;
Part X	-	Project 7 tan crore 127;
Part XIII	-	Project 1 tan crore 20;
Total	-	Project 23 tan crore 526.59.

Heng bakah hian sorkarin PWD hnuai thawh tur Project 31 crore 225.71 man chu min thlan-fel sak leh a, Finance Ministry duh dan angin format leh notification te siamin submit leh a ni bawk. (Hei hi nichina kan Leader in a sawi tawh kha a ni).

Mipui mamawhna hriain NH 06, Vairengte - Kolasib kawng leh Kolasib - Khamrang kawng pawh a theih ang anga thawmthat a ni a, State atangin crore 2 crore hmuh a ni tawh bawk. Helaiia 'kawng chhia' kan tih thin bawk Khamrang - Kawnpui kawng PWD enkawl lai hi han sawi ta ila -

Vairengte - Sairang kawng hi four-lane tur a ni a, contractor tur pawh hual vek tawh a ni.

Amaherawhchu, forest clearance a awm loh vangin hna an la tan thei lo a ni. Forest Clearance a awm theihna turin kan House Leader hian theihtawp a chhuah a, Committee pawh vawi duailo a ko a ni. A tawpah Pu Nitin Gatkari a hmu a, hemi tum hian kei pawhin ka va tawiawm a ni. Nitin Gatkari pawh kha a thin a rim khawp mai a, “hmasawna in duh avangin pawisa ka pe che u a, in hmang si lova; ka laklet sak leh vek mai ang che u’ te a ti a ni, a chang chuan. Zawldawh takin kan pu khan a ti-tipui zel a, a tawpah chuan a remti ta a ni. A tira thil theih miah loh a tiha kha chu, four lane laihna tur ram kha forest reserve chhung a ni an ti a, mahse forest area chhungah khan invalid-pass nei in tam tak an awm baw si a. Tichuan, compensation pek a lo hun khan LSC neite khan, ‘kan ram a ni’ an ti baw si a, mi-pahnihin compensation kha an claim ta si a. Central ministry chuan, ‘thil pakhat atan mi-pahnih hnenah compensation kan pe thei lo; impossible’ a ti a ni. Amaherawhchu, kan pu hian a nawr tang tang a (a-rukin, ti mai ang). Tichuan, dual compensation chu pek an remti ta a, mimalte pawhin compensation an la a; Forest lam pawhin assessment leh estimate te siamin leh Mizoram-a an tih turte ti zovin, Shillong-ah an thawn thla a, tichuan Delhi-ah an thawn thla ve leh a; forest clearance pawh chu an pe ve dawn a ni. Tichuan, heti laia kan nghahhlel em em four-lane chu a lo thleng thei dawn tihna a nih chu.

Demand No. 42 - Transport Department:

Transport Department hi 20.12.1998 khan Supply & Transport Department atangin a indang a, wing lian tak 2 - MST leh MV-Wing tih tea then a ni a. Tunah hian Transport Department hnuaiah hian heng office hrang hrangte – Directorate Office, Joint Director (OP) Office leh District Transport Office te a awm a. Heng bakah Transport behchhan hian State Transport Authority (STA) Office a awm baw si a. Heng office-te kaltlang hian ramin hma a sawn theihna turin theihtawpin tan kan la a.

Transport Department hi MST Bus enkawltu ang deuha hriat thin a ni a. Hun a kal a, deptt. hnathawh dan pawh her danglam chhoh a ni ta zel a. Tun dinhmunah hian Transport Department-ah hian staff-indaihlohna a nasa em em a. He deptt. hnuaia regular sanction post 683 awmah post 341 chu luah mek niin, 342 a ruak a ni. (51% tihna a nih chu). Provisional Employee 13 an awm mek baw si a, kum tinin thi leh pension an awm ve reng baw si a. Tun ang zela kal chuan 2026 ah phei chuan thawktu hi 40% chiaah an awm tawh ang a, post ruak 60% a awm thung dawn a ni. Hetiang zel anih chuan tun atanga reilote-ah hian staff indaihlohna avangin Transport Department hi hnathawk mumal thei lovin a awm tawh mai dawn a ni Chuvangin, Transport Department hi hnathawk thei tur leh awmze nei taka thuan-chak a ngai a, thawktu thar lak belh vat a ngai a ni.

Transport Department hi Mizoram sorkar hnuaia deptt. hrang hrang zingah revenue chhunglut hnem berte zinga mi a ni a, financial year kallai ah hian sorkar in target-ah lakh 6000/- min tuk a, February 2025 thlengin crore 48 (₹86,80,826/-) kan chhunglut tawh a, kan target hi khum ngei tumin hma kan la mek a ni. Sorkar-kumthar ah pawh lakh 6000 target tuk leh kan ni a, Transport Department hi sorkar tana revenue chhunglut tam deuh deuh thei tura thuanchak hi kan tum chho zel dawn a ni.

Minister ka nih hnua ka thil tawn - Transport Complex, Chaltlang-a petrol pump hi Transport Department retail outlet a ni a. He petrol pump hi a sak a thain, a mawi hle mai a. He pump hian MST bus-te mamawh a pekchhuah bakah mipuite’n petrol leh diesel tehling tha leh fir tha an hmuh theih phah a. Tin, he petrol pump hi sorkar revenue source tha

tak a ni bawk a, thla tin hian sorkarah hlep ₹1,50,000/- vel an thehltut ziah a ni.

Weighbridge chungchangah, Mizoram kawng a lo tlo lohna chhan bulpui ber pakhat chu 'motor-overload vang a ni' ti ila, kan sawisual tam awm lo e. Kan kawngte a lo tlo zawk nan Mizoram sorkar phalnain Transport Department chuan hmun hrang hrang 4 - Vairengte, Phunchawng, Kanhmun leh Champhai-ah te PPP mode weighbridge dah turin hma lak a ni a. Tunah hian Vairengte ah bun fel a ni tawhin Phunchawng-ah pawh hawn theih tep a ni tawh a; hmun dangah pawh bun tura hma lak zel a ni.

District Transport Office thar hi dinhmunah hian Saitual, Khawzawl leh Hnahthial District ah te District Transport Office hawn a la ni lova. Kan tarlan tawh angin, Transport Department hnuaiyah hian staff-indaihlohna a nasa em em a, chuvangin District Transport Office pawh kan tum leh beisei angin kan hawng thei lo a ni. Tunah hian heng -Enforcement sub-Inspector (regular) - 6, LDC - 3 te hi fill up tura hmalak mek a ni. District Transport Officer - 2, MVI - 3 leh Group D - 3 te hi kan lakfel chuan, tun atanga reilote-ah DTO Office thar pathum hi hawng vat thei turah kan inngai a ni.

Voluntary Vehicle Fleet Modernization Program-a motor lei chungchang hi India sorkarin a duan vehicle-scraping policy hnuaiyah India rama state hrang hrangte tih tur bituk hrang hrang milestone a awm a, hengte hi Transport Department chuan a bawhzui nghal a. Milestone pakhat kan achieve velah central sorkar chuan SASCI Pt. II atangin crore 3.5 a rawn release nghal a. Central sorkar duh dan angin, sorkar motor kum 15 chin scrap vek tur a tih angin, he pawisa hmang hian motor thar 27 lei tawh a niin, deptt. hrang hrang 15-ah sem chhuah a ni a, motor dawngtu deptt. te pawh an lawm hlein ka hria. Tunah hian Transport Department tan Recovery-van lei tumin hmalak leh mek a ni. Department sum pakhat mah seng lovin deptt. khan motor thar 27, deptt. hrang hrangte tan a dawng tawp mai a, an lawm khawp mai.

Heng kan tarlan bakah hian, Transport Department hnuaiyah Wing hrang-hrangte hmalakna langsar zualte chu –

Inland Water Transport Wing:

IWT hmalaknain Ni 19.6.2019 khan Inland-water Transport subject hi PWD atangin Transport Department-ah pek a ni a. IWT project te hi 100% central sector scheme funding a ni a, phur takin hmalak chhoh nghal a ni. Inland-water Transport Wing hmalakna hrang hrang te chu: -

- 1) Ministry of Port, Shipping and Waterways for Khawthlangtuipui: Khawthlangtuipui - Tuichhunchhuah lawnga kalna tur min phalsak tawh a, tunah hian 1st phase hnathawhna tur crore 9.80 tihfel a ni tawh a, thawktu tur thlan hna hi Inland-Waterways Authority of India-in a kalpui a, tun atanga reilote-ah hna tan thei tura beisei a ni.
- 2) Ministry of Port, Shipping, Waterways, Govt. of India for Chhimtuipui: Chhimtuipui Lui atana hydrological survey & feasibility study neih min phalsak a. Survey pawh zawhfel tawh niin, survey report hi MoPS&W hnenah submit a ni. He survey report behchhan hian RITES. Ltd. chuan DPR a buatsaih mek a ni.
- 3) Development of IWT Project in River Tlawng: Tlawng Lui hi Mizoram-in national-waterway kan neih chhun a ni a, 'National Waterway-102' tih a ni. MoPS&W, Govt. of India chuan he lui atan hian DPR siam min phalsak a, tunah hian RITES

Ltd. ten DPR an siam mek a ni.

MVI Wing:

MVI Wing ah hian District Transport Officer 9 an awm mek a, he wing ina a thawh ber chu, Motor Vehicle Act leh Motor Vehicle Rules enforce a ni. MVI hi Transport Department Wing-ah chuan revenue lalut hnem ber a ni a, he Wing hnuaiia hmalakna hrang hrang te chu: -

Setting up of Monitoring Centre:

Passenger-phur lirthei ah hmeichhia awmnem zawk leh naupangte chungah hlei-lenna a thlen loh nan central sorkar chuan Nirbhaya Fund hnuaiia monitoring cell din minrawn phalsak a. Project cost hi crore 10 a ni a, funding pattern pawh 90:10 a ni. He project hi hawn fel a ni tawh a, tunah hian he monitoring center atang hian passenger-phur vehicle location tracking device vuah tawhte chu vilzui reng an ni a. Transport Department chuan central sorkar duhdan angin passenger phur chi lirthei reng rengah vehicle location tracking device (emergency system) vuah vek turin hma a la chho mek a ni. Hetah hian passenger-phur chi lirthei neitute ka ngen duh chu, a awmnem zawk hmeichhia leh naupangte bakah kan passenger leh driver te pawh an lo him zawk nan VLTD & EAS hi vuah vek turin ka ngen a ni.

Setting up of Automated Inspection and Certification Centre:

Hei hi central sorkar phalnain Hlimen-ah din tum a ni a. He centre ah hian lirthei chi hrang hrang fitness, khawl hmanga enfiarna hmun tur a ni a. A project cost 1550 lakh a ni a, a funding pattern hi 90:10 a ni. He project hi MoRTH leh Transport Deptt. te tangrual anih angin, kan duh leh beisei angin hmalak a chak thei lova, a pawh hle a. Tunah he project hi 90% vel zawhfel a ni tawh a, sorkar-kumthar lamah chuan kan hawn theih ngei kan inbeisei.

State Transport Authority:

STA hi Transport Department tana revenue laluttu pawimawh tak a ni a. Public leh private Service vehicle-te permit pechhuaktu niin, Motor Vehicle Act leh Motor Vehicle Rules-in thuneihna a pek hrang hrangte lekkawh hi an hnapi ber a ni. Tun kum kal lai meka a hmalakna hrang hrangte chu –

- 1) Lirthei passenger-phur zingah sorkar rate ai tova tlan thin STA-in a hriatte chu sorkar dan dinglai angin hrem an ni thin. Passenger-phur chi lirthei hrang hrangte tan sorkarin chuan man a bituk te dik taka hman a nih theih nan, India ram khawpui dangah pawh an hman thin Online-Cab Booking System chu Mizoram-ah pawh hmang ve tura hmalak mek a ni a, tunah hian Transport Department leh NIT Mizoram tangkawp chuan software siamin hma an la a. Heng te hi tihfel a nih chuan lirthei hmangtu mipuite'n fare diktak an chawi bakah, lirthei hman tur koh dan chungchangah pawh awlsamna nasa tak an nei thei turah kan ngai a ni.
- 2) Mizoram-sorkar chuan policy mumal tak siamin Mizoram-a mitthi ruang phurh man bill theih turin a siam ta a. Hemi atan hian STA chuan Ambulance leh Hearse Van hiring charge mumal tak siamin, notification a lo chhuah ta a ni. District headquarters zawng zawng leh Thenzawl khua te two-wheeler taxi service theihna domain atan puan fel tawh an ni a, mipui mamawhna a lo pun zel avangin sub-town Thingsulthliah te, Sairang te, Tipa te, Ngopa te, Vairengte te, Kawnpui te, Chawngte te, Zokhawthar leh khaw tam tak nichina kan memberte pawhin an sawi khuate kha two-wheeler taxi service theihna hmuna siam belh leh tum a ni.

- 3) Kan sorkar thar, mipui-sorkar chuan lirthei permit pekchhuah chungchangah kalphung thar a zawm dawn a. Tunhma lama mipui mamawh dan leh kawng awmdan ngaihtuah lem lova permit inpek chhuah teuh-teuh kha chu ti ve lovin, mipui mamawh dan a zir chian hnuah chauh STA chuan permit a pechhuak tawh dawn a ni.
- 4) Tunlai hmasawna thangzel karah mipui veivak duhte awlsamna turin MST Wing hian route hrang hrang-ah MST bus a la tlan tir zel a, mimal lirthei neite an tam tawh a, chuti chung chuan MST bus hi a theih chin chinah chuan tangkai taka hman reng a la ni.

Transport Department hmalakna hrang hrangte hi hun reilote chhunga sawi zawh chi a ni loh avangin, kimlo takin ka'n han tarlang a ni a. Transport Department-in tha zawk leh felfai zawka ram tan rawng a bawl theih nan theihtawp kan chhuah dawn a. He House zahawm taka member zawng zawngte pawh a tul anga min thawhpui turin ka ngen a che u.

A tawp bera ka sawi duh chu, tunah hian lirthei chhiah ba an thahnem em em mai a, kum tina AG Office audit party te an lo kalin audit-para kan neih phah thin a. Chuvangin, lirthei neitu zawng zawng hnena ka ngen duh chu, an lirthei chhiah ba te a rang lama pe vek turin ka ngen tak meuh che u a ni.

Tichuan, Pu Speaker, heng ka Demand te hi he House zahawm taka min pass-pui turin ka ngen e –

<i>Demand No.</i>	<i>Department</i>	<i>Amount in ₹</i>
12	Parliamentary Affairs	1,04,20,000.000
42	Transport	43,45,52,000.000
45	Public Works	6,58,40,75,000.000
TOTAL		7,02,90,47,000.000

Ka lawm e.

SPEAKER : Aw le. Kan Minister zahawm tak Pu Vanlalhlana'n heng a demand: -

<i>Demand No.</i>	<i>Department</i>	<i>Amount in ₹</i>
12	Parliamentary Affairs	1,04,20,000.000
42	Transport	43,45,52,000.000
45	Public Works	6,58,40,75,000.000
TOTAL		7,02,90,47,000.000

te hi House-ah pass a rawn dil a, remti apiangin, 'remti' ti ula. Remti lo kan awm chuan, 'remti lo' ti ula.. (**Memberte:** Remti).

A lawmawm e. Minister zahawm tak Pu Vanlalhlana Demand chu House-in lungrual takin a passed ta a ni. (**Pu Vanlalhlana, Minister:** Ka lawm e).

Aw le, tunah chuan Minister zahawm tak Pi Lalrinpui'n kan sawihona te kha rawn windup-a, sawifiah ngaite rawn sawifiah turin leh a demand-te House-ah pass rawn dil

nghal baw k turin ilo sawm ang.

PI LALRINPUII, MINISTER: Pu Speaker, ka lawm e. Kan member zahawm tak takte zawhna hrang hrangte leh ka department chanchin an han sawichhuah te kha ka lo chhinchhiah ve zel a, a theih chin chin chu rawn react ka tum ang a. Member tin ten ka department chan a hmalak dan turte in ngaihvenin pawisa kan hmanna turte in lo zir Chiang kha ka lawm tak meuh meuh a ni.

A hmasa berah chuan kan Leader of Opposition Pu Chhantea min zawhna kha Mizoram kan zavaia hriattur pawimawh tak a nih avangin han sawi hmasa ila. Mizoram Universal Health Care Scheme thar atan tunah hian offline registration training kan nei mek a, hei hi an zawh velah Mizoram pumpuiah awarness nasa taka neih nghal tur a ni a. Tin, 'MUHCS' kan tih mai ah hian gategory thum kan awm a. Pakhatna: Central scheme zawmtute 'BPL family' kan tih mai, AB-PMJAY kha a ni a. Heta Golden Card hmangtu te hi mi nuai 2,17,247 leh Individual-ah hi mi nuai 5,57,188 an ni.

Pahnihna: Sorkar-hnathawk leh pensioners-te, PE-te leh Muster Roll-te an ni dawn a. Pathumna: 'Card var' kan tih hmangtute kha an ni a. Card var hmangte kha in register ngaite chu anni deuh ber dawn a ni. Chu chu Health & Family Welfare lamah khan ni ta mai se. Tichuan Pu Chhantea hriat duh baw k Sawleng EMRS school kha, Mobilization Advanced-ah crore ₹16.32 min pe tawh a, DPR hi April Ni 18-ah hian ZIDCO lam chuan an peih dawnin an sawi a ni.

Tin, State Institute of Hotel Management hi run turin sorkar-laipui pawhin min duh em em a. Tichuan, a run theihna turin post thar 32 create a ni tawh a. Amaherawhchu, kan sum dinhmun te a tha lova. State-sorkar run tur anih avangin uluk takin kan han ngaihtuah a; hei hi PPP Mode-a investor kan hmuh theih nan Ministry of Tourism-ah hian kan dil mek a, phalna kan hmuh velah RFP kan float ang a, tha taka manage theih kan inbeisei a ni. Chaltlang Tourist Lodge hi kan hriat angin khualliante kan thleng thin a, a buaithlak em em a. MICE level meeting-a hman tur kan mamawh thin em avangin star hotel-ah siam kan tum baw k a ni. Tichuan, 'tourist' kan tih awmzia hi nimin lamah sawi a awm tawh a. 'Tourist' tih hi keini Tourism Department chuan chi 3-ah kan then a – 1) Local Tourist: State chhung, Mizoram chhunga khualzin mite; 2) Domestic Tourist: India ram chhung State dang dang atanga lo zinte 3) Foreign Tourist: India ram pawn atanga lo kal te an ni.

Pu Ramthanmawia bakah midangte pawhin an rawn sawi a, kumin chhung (kum lo thar tur) a kan budget tlemna chhan han sawifiah ka duh a. MHSSP hi a kum tawpna (final year) a nih tawh avangin, kuminah hian crore ₹30.89 chauh dah a ni a. Chubakah, kan department-ah hian kuminah mi 189 lai an pension a; pension thenkhatte phei chu cheng nuai 3 chuang hlawh te kha an ni a. Tin, Finance Department-in budget siamna tur formula an neih kha existing staff chauha chhut a nih avangin, budget kha a lo lang hniam ta a ni.

Tin, Swadesh Darshan 2.0 kha Ministry duh danin Pu Papuaia bial hi tourist potential, kan pipute sulhnu a tam em em avangin han include hram kan duh nain, Ministry-in Champhai chauh a rawn thlan avangin Champhai chauh kan ti lo thei lova. Amaherawhchu, pipute sulhnu tamna a nih avang hian kan hre reng a, khatianga telh theihna scheme a lo kal leh chuan kan rawn che vat dawn a. Tunah pawh Dunglelang-ah hian Pathian zara kan dam a nih chuan Ni 26 ah kan Art & Culture minister nen zin kan tum a, khang te pawh kha kan

en duh dawn a ni.

Tin, Pu Rinsanga rawn sawi Saipum PHC kha a hma session-a a sawi tawh avangin keimah ngei pawhin ka zuk tlawh tawh a. Amaherawhchu, PHC building kha a lo tling chiah lo deuh a, kan Principal Director Dr. Vanlalsawma leh khulaia kan CMO te nen kan zuk kal a, a hmunte kha tha kan ti em em a. Heng te run tur hian AYUSH doctor tal dah theih a tha kan ti khawp mai a. An lo sa tha bawk si a, mahse PHC tak tak han run tur chuan a rem chiah lo a ni.

Tin, Adopted village nei theuh tura MLA-te kan ngenna che u kha mi 34-in in rawn tihlawhtling tawh a, kan lawm em em a. Khatah khan, 'kan MLA fund atang tein a theih danin lo promote ve ila' kan tih kha. A bak hmalakna chu, Sustainable Livelihood Generation ah DoNER through-in tunah hian crore ₹24.60 project kan kan siam a, Tourism Ministry-ah min thawn sak tawh a. Chu chu tuna la adopt ve lote pawh hian rawn adopt ve ula kan duh em em a ni.

Tin, Pu Jeje-a khan rualbanlo ten certificate an neih theih nan ...*(interruptions)*

PU LALRINSANGA RALTE: Pu Speaker, ka'n lo tibuai lawk ang a. Kan Minister zahawm tak hian session hmasaah pawh khan 'priority kha kan pe ang che u' min ti tawh a; Vairengte X-ray kha. A dil miah lo Hnahthial lam khan an chang daih mai a.

PI LALRINPUII, MINISTER: I proviso ah ka chhang dawn, kha kha. Pu Jeje-an 'rualbanlo te certificate an neih theihna tur hun remchang min siam sak rawh u' a tih kha, department lamin siamsak kan tum dawn e. Tin, Pi Prova-i khan 'tar pension diltute hi an tam si a, engtin nge' a tih kha, quota nei kan nih avangin vawi leh khatah kan thun burh thei lova, a tahtawl te-tein mitthi an awm khan kan thun thin a ni.

Tin, ruang phurh chungchangah water-transport ngaihtuah ve ni se tih kha, a dik hlein kan hria a, ngaihtuahna thar rawn chhuak a ni a; khang te pawh kha a tih theih dan kan lo ngaihtuah ang a. Tin, Pi Prova-i biala Anganwadi sakna tur list kha nakinah amah ka pe ang a. Tin, Pu Lalramliana'n, phungzawlte hi disabled ah a huam thei em a tih kha, a Dan kan han enchiang a, a lo theih loh hlauh mai a. Dr. Lorrain-an DSWO office Lawngtlai-a neih ve tum a ni em a tih kha, office hi sak tum a ni a, tunah hian a hmun te pawh kan tifel deuh tawh a. Kan neih theih ve leh DSWO hi dah ve kan tum a ni.

Tin, water-sports chungchang Pi Prova-i sawi ah khan, PMJVK hnuaiah Water Sports Training Center, Tlabung tan lakh 970.10 kan dah e. Pu Speaker, Pu Rohminga min zawhna a then kha chu ka chhan tel tawh avangin ka sawinawn lo ang a. Mitthi te reng reng hi an thihna hmun atanga chhiar mai tur a ni a. An ruang phurhna tur atanga km 20 a nih chuan khawi hmun atang pawhin, PHC pawh ni se a bill theih vek a ni. Tin, Pu Ngunlianchunga'n thil hriat duh ruang phurh tawh zawng zawng zat kha, September Ni 1 atanga wawiin thleng hian ruang 443 kan phur tawh a, lakh ₹44,16,616 kan pe tawh a ni. Tunah hian district-ah engemaw zat a lut a awm leh tawh bawk a ni.

Pu W. Chhuanawma'n ZPM sorkar hnua healthcare bill ba zawng zawng a hriat duha kha, crore ₹101,75,18,190 a ni. Tichuan, Pu K. Laldawngliana hian Jordan Centre hi a ngai pawimawh em em a, min hrih zing keuh keuh bawk a. Cabinet Meeting chuan, 'kan enkawl

zo lo deuh a ni hi' tiin Kohhran leh mi-tlawmngai te leh khatiang lama tui-mite khan enkawl duh an awm takin tiin EOI kan float a, mahse chhangtu kan nei lova. Chuvang chuan, sorkarin ngun takin a ngaituah a, tunah hian budget ah pawh lakh ₹105.21 kan dah a, enkawl leh kan tum a. Amaherawhchu, kan enkawl dan tur erawh chu after-care, khawilai home-ah emaw awm dam leh tawhte kha skill development-te lo neihpuia, anmahni nunkawng an lo inhaiven theihna tura enchhuah kan tum a ni.

Women Helpline lampanga Pu Lalmuanpuia zawhna chi hrang hrang kha chu ziakin ka rawn pe ang a. Tichuan, Pu Rohmingliana zawhna bawk, ZMC chungchanga penalty kan dawn thinna kha NMC hian a kalphung a thlak reng mai a, a buaithlak ve khawp mai a. Faculty hi an duh tam em em a, faculty lak tur hi kan inhmuzo seng lo a ni. Chuvang chuan, tunah hian kan CM zahawm tak hnenah pawh, ZMC-a thawkte hian min tlan bosan lohna turin an hlawhte pawh hi state dangte milin i siam sang ve ang u kan ti a. Tunhma kha chuan ZMC hi kan sang ber a, hnam dang pawh an rawn kal sup sup a ni. Tunah erawh chuan North East ah te college thar te lo awmah te an insawn ta zeuh zeuh a. Tichuan, kan CM-in hlawh sanga pe ve turin buaipui vat rawh u a ti a; tunah hian buaipuiin, a file kan deal mek bawk a ni.

Tichuan, Pu Rasik Chakma rawn sawi tourist lodge chungchang kha, hei hi CADC kutah kan hlan tawh a. Amaherawhchu, SASCI atangin sum tlema zawng kan hmu a kan rawn renovate dawn a ni. Dr. K. Beichhua khan primary healthcare kha a ngaipawimawh em em a, kei pawhin a mimal takin hei hi ka ngaihpawimawh a ni a. Primary healthcare tihchangtlunna tur tunah hian DP&AR ah health-worker (regular) mi 100 lakna tur min pe tawh a. Finance lam pawhin min pe thuai dawn a. Tin, kan CM hnenah pawh a awmzia te kan sawi a, he pawisa kan neih theih dan tur chi hrang hrangte kan sawi bawk a. Tin, heng Sub-Centre ah ringawt pawh hianin laboratory test chi 14 NHM program pakhat atangin kan tithei tawh a. Kan healthcare ah chuan Primary Healthcare hi kan ngaipawimawh em em a, kan la ngaipawimawh zel dawn a ni. Tin, Mt. Mawma hi keimah ngeiin ka va hawng a, tunah hianin khawtlangin an enkawl mek a. Pala Lake leh Castle of Beino te hi tunah hian funding source kan zawng mek a, project peihsa pawh kan nei vek tawh a. A kawng siamna tur te pawh hi kan han dah ve chhin a, kan hmu dawn em kan hre lova.

Pi Baryl Vannehsangi'n State Tribal Resource Training Centre chungchang a rawn sawi kha, hma kan la mek zel a, fund tunah hian kan hmu leh hlek a. Kan han ti thuai thuai ang a, kan hawn theih thuai kan inbeisei a. Tichuan, Swadesh Darshan 2.0 ah tho khan Sialsuk mai ni lo, Sailam-Bird Sanctuary te, Bengkhuai Hriatrengna lungphun te a bial chhungah hian kan tihsak dawn bawk a ni. Hmeichhia anih avanga induhsak bik pawh a ni chuang lo ania. Tichuan, crore 11.90 man kha DPR pawh kan submit tawh bawk a ni.

Pu Robert Romawia zawhna Ekta Mall chungchang kha, hun kal tawhah khan project monitor thatloh avangin kan ramin a tuar em em a, kan project zawh theihloh te kan CM pawhin vawi tam a sawi tawh a. Chumi avang chuan kan han meeting a, 'Central PSU hi i hmang ang u, a monitoring te a awl ang a' kan ti a. Chuvang chuan, Central PSU ah kan pe a ni. Tin, Anthurium Festival chungchang kha departmental meeting chuan ngun takin kan ngaihtuah a, Anthurium chingtute hi an vannei a, an lo export deuh vek mai a. Anthurium Festival hi han neih zel tur pawhin a cheina tur te, a zawrh turte pawh a awm mumal tawh lova. Chuvangin, mi tam tak 'hei hi tul lo lo' tite an lo awm ve bawk avangin titawp tawh mai ila. Tunlaiin music-ah kan sang a, hnamdang phei chuan zaithiam vek

emaw min ti bawk a. chuang chuan, music behchhan tourism kalpui nan i hmang teh ang u kan ti a. Tichuan, music lama sul lo su tawh kan hranghlu - Lalzoa te, Liandala te, Rokima te, Ellis Saidenga leh midang tam takte tuallenna thin Leitlangpui Music Festival kha concept felfai tak neiin kan han hmang ta a, mipuiin an hlut em em a. Hei hi DoNER Minister Pu Scindia pawhin a lo hria a, nasa takin minrawn zawt a. A next time ah phei chuan lo kal ve a tum a ni.

PU LALMUANPUIA PUNTE: Pu Speaker, ka bial chungchang kha? Midang kha i chhang vek si a. 'A ziakin' tih khan in lo pha thei a ni. Chuvangin, nikum May thlaa ka pek tawh; midangin an bial tan x-ray khawl an demand tuar tuar a, keiin ka fund atangin ka pe a. Department inthlahdah vangin engatinge vawiiin thlengin in la vuah loh? Kha kha min commit thei em?

PI LALRINPUII, MINISTER: Ngawi lawk rawh aw. X-ray pekna tur kha ka la chhiar lo tak e. Nge, a ngailo mai em? A rei lutuk dawn a. Pu Muanpuia kha, hmanni khan kan han sawi hova, eng emaw ni problem deuh kha a awm a. Khalai... (**Pu Lalmuanpuia Punte:** 3-phase a ngai tih vel mai mai te a ni.) 3-Phase kha i MLA fund atangin lo ti ve thung la. (**Pu Lalmuanpuia Punte:** MLA Fund in a khawl ka pe tawh a. 3-phase connection kha chu damdawi-in lamin an ti ve tur a ni.) Kan lo ngaihtuah thuai ang e.

PU LALRINSANGA RALTE: Pu Speaker, khawngaihin. Nichina ka ngaihpawimawh, ka dinnawna kha a ni a. Vairengte kha X-ray khawl pek tur zingah a tel em?

PI LALRINPUII, MINISTER: A tel vek a, kha kha. (**Pu Lalrinsanga Ralte:** E, kan lawm e.) Pu Mathlantea hian min lo zawnchhuahsak se, a list ka ziah kha. Chumi chhungin Pu Speaker, Demand lamah ka lo lut ve tawh ang a.

PU H. LALZIRLIANA: Pu Speaker, kan Minister zahawmtak khan Tuipuibari PHC chiah kha min react ve thei em le?

PI LALRINPUII, MINISTER: Tuipuibari PHC hi hmannah Chief Minister pawh khan, 'a sakthat dan te hi a awm lo em le?' a ti tawh a, eng emaw siam ngai kha a lo tam tawh lutuk a. Chuvang chuan, CM berin a ngaihpawimawh chuan, tih hun chu kan la neih ka ring a ni.

SPEAKER : Awle, a statement i chhiar tir tawh ang aw. A bial centric deuh hlek tawh a, keini te pawhin kan sawi duh ve tho mai thei a; kan Deputy Speaker te pawhin. Statement ti tan tawh se.

DR. K. BEICHHUA: Pu Speaker, vawikhat chauh. Ka bial ni lovin Zoram pumpui. District tin hospital ah ICU pakhat tal dah loh chuan tunlai khawvelah mi zai ngam a ni tawh mang lova. Hei chi nichin a ka rawn sawi khan, hmalak theih a ni ang em?

PI LALRINPUII, MINISTER: Aw, Pu Speaker, kha kha ka demand ah hian rawn sawi tel deuh tho ka tum avangin ka rawn react lova. District tin hi kan ti thei nghal lo a nih pawhin, district lian zual leh district mipuiin an pan tamna zual chu kan ti vek dawn e.

Demand No. 43 - Tourism Department:

Kum 2025-25 chhunga sum hman tura ruahman zawng zawng hi ₹10,166.44 lakh a ni. Tunah hian regular-a thawk mi 93 leh provisional employee mi 99 kan nei a. Heng thawktu mi 192 te kum khat hlawnh atan ₹925.16 lakh ruahman a ni a. Tunah hian directorate office pakhat leh tourist facilities hmun 72 ah kan nei a, heng zinga 42 te hi mimal kuta dah (out source) a ni. Mara Autonomous District leh Lai Autonomous District huam chhunga kan tourist facilities te pawh LADC leh MADC kuta hlan tumin hma kan la mek a. Hengte tel hian department-in hmun 30 a enkawl mek a, Directorate pakhat leh facilities 30, a zavaiin establishment 31 enkawl nan office expenses-ah ₹25.30 lakh ruahman a ni.

Tourist facilities kan neih hrang hrangte hi siamthat leh maintain ngai reng a ni hlawm a. Heng atan hian ₹50 lakh ruahman a ni a, other Revenue Expenditure atan ₹108.53 lakh ruahman a ni bawk. A hnuaiah hian Fairs leh Festivals huaihawtna atan ₹85 lakh ruahman a ni a. Tourist facilities hrang hrangte, monitoring leh inspection atan ₹8.50 lakh ruahman a ni bawk. Tin, kan tourist facilities hrang hrangte phuhruk nan a la bang hi hman tura ruahman a ni.

Tourist Department pum pui kum khat chung enkawl na tur ₹1066.4 lakh ruahman a nih laiin, ₹370 lakh chu sorkar tan hmu let leh tura beisei kan ni ve thung a. Kan facility neihte changtlung lo hle mahsela, revenue target sorkarin min tuk ang chu kum tin kan la khum a. Kumin pawh hian kan revenue target hi khum leh ngei kan inbeisei a ni. Covid hnu hian mikhuwal tlawhtu kan nei tam chho hle a, 2024-25 December thleng khan domestic tourist mi 5,17,060 leh foreign tourist mi 5,469 kan record tawh a ni. Domestic tourist pakhat hian ₹29,000/- leh foreign tourist pakhatin ₹75,000/- zel hmang anga chhut a ni. Kumina kan khualzin neih zat atanga chhut hian kan state-a sum an hmanral hi crore ₹900 vel a ni pha a ni.

National Level Competition, Ministry of Tourism-in a buatsaih hrang hrangah Mizoram pholang ve turin theih tawp kan chhuah thin a. Chu chuan rah tha tak neiin kum 2024 khan Sialsuk khua chu community base, category-ah Best Tourism Village in India-ah thlan a ni a. 16th Finance Commission delegates lo kalte pawh Sialsuk tlang hi kan tlawhpui nghe nghe a, nuam an tiin an hlut hle a, tun thlengin an la sawi ve a ni.

Community-base tourism lamah hma kan la a, MLA tinte an bialchhunga khaw pakhat theuh tourism village atana thlanga adopt tura kan ngen angin MLA tam takin Tourism Village min adopt sak avangin lawmthu kan sawi a. Heng tourism village te promote tur hian concept note nichina ka sawi ang khan, Community empowerment for sustainable livelihood generation through Tourism atangin ₹2460 lakh senna tur kan siam a, Planning & Programme Implementation Department-ah kan thehlut tawh a ni.

Kan sorkar flagship programme Bana-kaih ah hian Tourism Department chu implementing department zingah kan tel ve a, hotel, homestay, catering, event-management, souvenir making, restaurant & café, tourist vehicle, tourist resort leh travel agent te hi kan trade chanpualte an ni a. Dilna 288 kan dawng tawh a, mi 65 te tan DPR kan siam a, Nodal department Planning & Implementation Department-ah kan thehlut tawh bawk a ni.

Kum 2024 chhung khan festival chihrang hrang hlawhtling takin kan huaihawt a, Hnabsin Kut Champhai te, Tour Deep Hmuifang te, Leitlangpui Music Festival te, Winter Festival te bakah International Para-gliding accuracing championship te kan huai hawt thei a, local

leh state pawn atangin chhimtu kan nei tha hle.

Tin, Tourism Awareness Week hman a ni a, village thlan bik 8-te inelna leh district 11 te inelna kan buatsaih a, mipuite leh kan department ngei tan pawh hlawkna nasa tak niin kan hria. The Mizoram Registration of Tourist Trade Act, 2020 hnuaiiah Tourist Department-in tourism service provider registration kan pechhuak thin a. Tunah hian register kan neih dan chu hetiang hi a ni - Hotel 75, Homestay 80, Guest House 29, Restaurant leh Tea Stall 906, Catering 34, Picnic spot leh Resort 2, Tour Operator leh Travel Agent 50, Tour Guide 130 te an ni. Register unit kan neih mekte hi 1306 niin, a tlem thei ang bera chhutin heng unit eizawnaa hmangtute hi mi 3,632 vel an ni.

Hand holding Scheme leh Unnati bakah mimal hmalakna avangin tourism sector eizawna atana hmang hi nasa takin an pun chhoh zel beisei a ni. Picnic Spot leh Resort hi allocation of business thar ber hmanni lawka chhuakah khan Tourism Department-ah dah a ni ta a. Registration lam pawh nasa zawka kal pui kan tum.

PM-Ekta Mall project hnuaiiah state dangte ang thovin Unity Mall sakna tur Department for Promotion of Industries, internal trade hnuaiiah crore 127 man project kan hmu a. Project cost atanga 50% hi kan dawng tawh a. Tourism hmasawna turin Ministry of DoNER leh MOT bakah PMJVK leh NABARD hnuaiiah project hrang hrang 31 lai kan submit bawka a, hlawhtlin kan inbeisei hle a ni.

Demand No. 42 - Social Welfare, Tribal Affairs, Women & Child Department:

Tichuan, Demand No. 29-na Social Welfare, Tribal Affairs, Women & Child Department lam han sawi zau leh ta ila, Social Welfare, Tribal Affairs, Women & Child Department directorate pahnih Social Welfare, Tribal Affairs leh Women & Child Department ah te then darh a ni a. Department pumpui tana kum 2025-26 chhunga sum mamawh ruahman chu ₹3,134.61/- lakh a ni a, heih state sum atanga kan hlan tur ₹70,749.68/- lakh leh sorkar laipui atanga kan hmuh tura ruahman ₹7,23,599.93/- lakh hmanga hmalakna tur a ni.

A hmasa in Social Welfare & Tribal Affairs lam tana sum ruahman hi han sawi zau ta ila. Kum 2025-26 chhunga state sum bawm atanga hman tura ruahman zat hi cheng nuai sangnga zali sawmruk pahnih point pahnih pakua a ni a. Sorkar laipui atanga dawn tura beisei zat chu ₹2,038.86/- lakh a ni a. A zavaia sum ruahman chu ₹7901.1/- lakh a ni.

Sum hmanna tur ruahmanna langsar zualte -

1. A thawktu hlawh atan - ₹1038.11/- lakh;
2. Medical treatment - ₹18.60/- lakh;
3. Office inrelbawlina - ₹43.68/- lakh;
4. Object head Rent of/for others hnuaiiah district-a vehicle outsource-na tur - ₹21.60/- lakh;
5. State Fund for PwD - ₹38/- lakh;
6. International Day of Older-person (Kum-upa te Ni) hmanna tur - ₹5/- lakh;
7. Mittel-hawrawp chhutna Press kan neih mek enkawlina tur - ₹16.0/- lakh;
8. RITC training centre enkawlina tur ₹72.1/- lakh;
9. SIT Women/Girls' Act hnuaiiah - ₹20.51/- lakh;
10. State Social Welfare & Rehabilitation Centre enkawlina tur - ₹114.440/- lakh;
11. Ruihhlo dona kawnga kan hnathawktu ber Mizoram Social Defence &

- Rehabilitation Board inenkawlna tur - ₹530.60/- lakh;
12. Jordan Centre enkawlna tur- ₹105.21/- lakh;
 13. Article 2751 hnuaiia hnathawh tur - ₹991.73/- lakh;
 14. Kan budget aia tam sorkar laipui atanga kan dawng anih chuan, finance lama kan hotute hnenah allocation kan dil belh leh mai ang a. Mahse, nichin khan Planning-ah a awm tawh dawn tih te kan hria a, helai hi chu keimahni headache a ni tawh dawn lo a ni.
 15. Tribal Research Institute hnuaiia Ropuiliani Music sak chhonzawmna tur - ₹298.28/- lakh;
 16. Ruang phurhna - ₹500/- lakh;
 17. Senior Citizens Home enkawlna - ₹60.85/- lakh;
 18. Kum-upa rual-banlo chhawmdawlna 'pension' kan tih mai sorkar laipui atanga hmuh beisei - ₹10,149.21/- lakh leh state-sorkar sum atangin ₹3,391.8/- lakh; ruahman a ni a.
 19. Commission for Persons with Disability inenkawlna tur - ₹508.41/- lakh.

Women & Child Development:

Kum 2025-26 chhunga state sum bawm atanga hman tura ruahman - ₹2,287.39/- lakh; Sorkar laipui atanga dawn tura beisei ₹21,052.07/-; Avaiin - ₹2,03,439.46/- lakh hmanga hnathawh tum a ni a.

Nikum BE aia kumin sum ruahman punna hi 36% a ni a, min lawmpui luai luai kha.

Anganwadi:

1. Financial year 2025-26 fund provision ₹504/- lakh leh ₹10,439/- lakh;
2. State Fund hi 94.42% laiin ala pung a, heta a punna tam ber hi chu CSS salary provision-in thawktu hlawh atana kumkhat daih ₹821.82/- lakh dah vang a ni.
3. Salary provision state employee atan - ₹695.00/- lakh.
4. Kan CM zahawmtak hianin kan CSS ten salary an la tha lo hi a vei em em avangin, tun budget-ah te pawh min lo dah tam sak mai bakah advance-a min pek te pawh a awm a ni.
5. Anganwadi workers mi 2,244 leh helpers mi 2244 te hlawh atan Other Revenue Expenditure hnuaiia - ₹2073.46/- lakh;
6. scheme component hrang hrang Anganwadi worker leh helper uniform, medicine kit, pre-school education kit te leina tur bakah vehicle hiring charge atan - ₹2,895/-
7. Anganwadi centre-a supplementary nutrition semna tur - ₹2,369/- lakh;

Mission Vatsalya:

Financial Year 2025-26 atan hian CSS fund provision ₹1165/- lakh;

1. Child-helpline a thawkte salary provision - ₹3068/- lakh;
2. Non-institutional-care te, Swachata Action Plan leh Home hrang hrang enkawlna bakah office expenses atan - ₹3097/- lakh.
3. Palna Creche worker mi 200 leh helper mi 200 te hlawh tur - ₹250/- lakh;
4. Palna Creche hnuaiia nutrition leina tur - ₹ 206/- lakh.
5. Palna creche cost-sharing ratio hi 90:10 niin, Central atanga fund rawn kal ang mil zelin SMS dah thin a ni.

PMMVY (Maternity Benefit Programme):

Sum dah hi nu nau pai pawmte hamthatna pek chhuahna tura hman thin a ni a, heng atan hian ₹150/- lakh ruahman a ni. Hei hian mi 2,700 vel cover zo tura ruahman phawt a ni a, cost sharing ratio hi 90:10 niin, central atanga fund rawn kal ang zelin SMS a dah thin a ni.

Shakti Sadan:

A thawktu hlawh atan ₹374.22/- lakh; Office expenses leh clients enkawlina tur - 234.96/- lakh dah a ni a. Fund provision hi 100% in a pung a, a punna chhan chu back-log fund central atanga rawn release puhru tura dah lawk anih vang a ni. Shakti Sadan cost sharing ratio hi 90:10 niin, central atanga fund rawn kal ang zelin SMS dah a ni bawk.

Hope for Empowerment of Women:

1. A thawktute hlawh atan ₹225.38/- lakh;
2. Training, vehicle hiring leh office expenses atan ₹64.72/- lakh. Hope for Empowerment of Women cost-sharing ratio hi 90:10 niin, central atanga fund lo kal zel angin SMS dah a ni bawk.

Beti Bachao Beti Padhao:

Hmeichhe naupang chawikanna scheme kalpuina tur - ₹280/- ruahman a ni a. Hei hi thawktu hlawh bakah hmeichhe naupang chawikanna tura hmalakna hrang hrang IEC convergence with line department leh flexi-funds atan ruahman a ni.

One-stop centre (100% CSS):

1. A thawktu hlawh atan - ₹611/- lakh;
2. Vehicle hiring services to beneficiaries leh office expenses - ₹153.24/- lakh.
3. Women helpline hi 100% CCS niin hemi hnuaiia thawkte hlawh atan cheng nuai 92.70 bakah management leh telephone rent atan ₹ 17.70/- lakh hman a ni

Nutrition:

State Nutrition Programme hnuaiia ₹ 85.48/- lakh ruahman niin, kum hmasa aiin 3.75% in a pung a. He fund atang hian thawk tu hlawh Special Officer Nutrition Dealing Assistant te bakah Store-keeper te hlawh atan ₹72.80/- lakh dah niin, a bak ₹13/- lakh chu office inrelbawlina tur leh personal claims atan ruahman a ni. State-sorkar nutrition programme hnuaiia thawkte hian anganwadi service hnuaiia supplementary nutrition programme an buaipui ber a ni.

Scheme for Adolescent Girls:

He programme kalpuina tur ₹189/- lakh ruahman niin, hei hi nutrition leina tur a ni. He scheme cost-sharing ratio chu 90:10 niin, Central fund atanga rawn kal ang zelin SMS hi dah thin a ni.

Poshan Abhiyan National Nutrition Mission:

1. A hnuaiia hian kum 2025-2026 chhung atan ₹1327.93/- lakh ruahman a ni;
2. A thawktu hlawh ₹253.92/= lakh;
3. Other Revenue Expenditure hnuaiia poshan-trucker te smartphone leh growth monitoring device leina tur - ₹923.35/- lakh ruahman a ni a. Poshan Abhiyaan cost sharing ratio hi 90:10 niin, central fund atanga a lokal ang zelin SMS dah a ni.

Shaksam Anganwadi:

Anganwadi centre sakna tur ₹1969.21/- lakh dah a ni a, he fund provision hi Anganwadi Central upgrade-na tur bakah convergence hnuaiia Centre repair leh renovation te a ruahman a ni..... (*interruptions*)

PU LALCHHANDAMA RALTE, OPP. LEADER: Pu Speaker, ka lo tibuai lawk ang a, i phalnain min han react lawk theih chuan.

Speaker bial leh ka biala Art. 275 hnuaiia multi-purpose hall te tribal hostel te sak kha tuna kan han kal dan turah hian tribal clubbing-a hmalakna kal lai nen khan buaina a awm a, nakinah on-going awm dan tur te leh tuna buai tawh sate nen khan kan va hlauthawng em.

PI LALRINPUII, MINISTER: Pu Speaker, Article hnuaiia project ho hi a len hian a buaithlak ve em em a. UC kan submit mai bakah committed liability hi kan thawn thla ziah a. Kuminah pawh kan thawn thlak bakah video conference ah pawh khan sawichhuah a ni a, mahse kha kha rawn release lovin, a thar kha an rawn release ta a. Tunah hian Pu Beia bial lamah pawh project zoh loh a awm a, hmun hrang hrangah Aizawl velah te pawh hian a awm zeuh zeuh a. Chu chu tunah hian kan buaipui mek a, kan hmu thei dawn hian kan inhre deuh a. Planning te chu keini aiin an fel zawk ang a, in bawhzui ve zel tawh mai ang chu.

Demand No. 24 - Health & Family Welfare Department:

Pu Speaker, kum 2025-2026 chhunga State budget chu crore ₹15,198.76 a ni a, chutih laiin Health & Family Welfare budget bik hi ₹82,606.89 lakh a ni thung a. State sum bawm atanga pek chhuah tura ruahman chu ₹49,252.61 lakh a nih laiin, sorkar-laipui atanga hmuh tura kan beisei zat chu ₹33,354.28 lakh a ni. Tichuan, Mizoram budget pumpui atanga Health Department atana sum ruahman hi 5.43% a ni.

Department pum huapa sum hmanna tur ruahmanna:

Salary:

₹39,982.09 lakh dah a ni a, hei hi kum 2024-2025 aiin cheng nuaih 2,058.17 -in a tlem a, thawktu regular staff mi 2919 te hlawh atana dah a ni. Department pumpui budget atanga chhutin 48.40% a ni, wages atang hian Sorkar hnathawk hnuaiia contract PE mi 120 hlawh pek thin a ni a, kuminah hian ₹116.54 lakh dah a ni.

Office expenses:

Department office leh establishment hrang hrang 800 chuang te'n office mamawh leh tulte leina tur ₹208.30 lakh dah a ni a. Kum hmasa aiin ₹48.25 lakh-in a tam a. Kan indaih lo thin hle a, leiba te hi kan ngah thin a ni. Stationary ba te kan ngah em em a, hei hi establishment 800-ah ka han insem tir chhin a, establishment pakhat hian thla tin 2169.79 theuh chauh an chang thei a ni.

Materials and Supplies:

Hei hi damdawi leh Sub-Centre tin mamawh damdawi-tlanglawn detol, bandage, syringe etc. leina atana hman thin a ni a. Kumin hian ₹992 lakh dah a ni a, kum hmasa ai khan (kan sawi tam bawk a) ₹19.90 lakh-in a lo pung a, kan lawm em em a ni.

Minor civil leh electrical works:

Hei hi department hnuaiia hospital leh staff-quarters repair bakah petty works hrang hranga

hman a ni ber a. Kuminah hian ₹141.02 lakh dah a ni.

Scholarship:

Scholarship head atangin housemanship doctor leh DNB doctor-te lawmman pek thin an ni a, DNB hi kum 3 specialist an zir a, housemanship doctor hi MBBS zir zo ho hian an rawn ti thin bawk a. Chung DNB zirlai ho hi kan chief minister hnenah kan sawi a, a lo ngaipawimawh em em a; tunah hian an hlawh te pungin ₹60,000/- thla khatah an la ve a, housemanship ho hian ₹50,000/- an la ve tawh bawk a ni.

Grand-In-Aid:

GIA Head hnuaiia sum dah hi State leh Central hnuaiia Scheme hrang hrangte hnathawhna leh inrelbawlina atana hman a ni a. National Health Mission hnuaiia State share ₹1,342 lakh te, Central share ₹7,900 lakh te, Central Healthcare (APBMJAY) State matching share ₹100 lakh leh Central share ₹1,043.14/- te bakah Health & Family Welfare Department hnuaiia Council hrang hrang hman tur sum ruahman a ni bawk.

Grand In Aid (GIA) Salary Head hnuaiia sum ruahman zawng zawng hi ₹12.688.77 lakh a ni a, heng zinga ₹31.17 lakh chauh hi state sum bawm atanga pek tura ruahman a ni. A bak zawng hi chu Central sum bawm atangin. Salary Head hnuai atang hian scheme hrang hrang hnuaiia thawktute hlawh pek thin a ni a, hetah hian department-in CSS Contract Employee mi 66; drug regulatory system hnuaiia Drug Inspector leh thawktu dangte mi 27; DHS hnuaiia Health Workers co-terminous mi 37; Eye Bank Councillor leh Eye Bank Technician pakhat ve ve; Nation Ayush Mission hnuaiia thawktu mi 166; National Health Mission hnuaiia mi 2315 an awm bawk a ni.

Other Revenue Expenditure, Other Revenue Expenditure:

Heta sum ruahman hi hospital diet bill, washing allowances, khawl hrang hrang annual maintenance contract leh repairs, tui bill, electricity bill te bakah establishment hrang hrangte nitin mamawh leh tul dang leina atan hman a ni deuh ber a. Kum hluaiia khan BE atan ₹1172.95 lakh dah a ni a, a indaih lohna a nasat avangin ₹924.87 lakh pekbelh kan ni a, kan lawm em em a, kuminah hian ₹1982.45 lakh lo dah a lo ni ta a ni. Kum hmasa aia a tamna hi ₹809.5 lakh lai a ni a, kan lawm takzet a ni.

Health Directorate leh establishment lian deuh deuh kan la nei a, chungsa sum hman dan tur ruahmanna tlangpui chu –

Zoram Medical College:

Hetah hian thawktu mi 587 an awm mek a, heng thawktu hrang hrangte hlawh atan hian ₹5,918.38/- lakh dah a ni a. Office inenkawlina senso - material and supplies te, scholarship atan te, repair and maintenance atan leh tul dang atan ₹620.10 lakh dah a ni a. A vaiin college bik enkawlina kum 2025-26 chhung atan ₹6538.48 lakh ruahman a ni. ‘State Referral Hospital, Falkawn’ tih thin kha tunah chuan Zoram Medical College hnuaiia dah a nih tak avangin, Zoram Medical College & Hospital tih a lo ni ta a. Kum 2025-26 chhung hian hospital thawktu hrang hrangte hlawh leh inenkawlina atan ₹588.72 lakh ruahman a ni. Zoram Medical College & Hospital inenkawlina tur a vaia sum ruahman chu ₹7127.28 lakh a ni.

Mizoram State Cancer Institute:

Heta sum mamawh hi sub-Head 51 - Couple therapy Unit hnuaiia ₹120.58 lakh leh sub-

Head 52 - Cancer Research & Treatment Program hnuai ah ₹733.39 lakh ruahman a ni a, a zavaia sum ruahman ₹853.97 lakh hi State sum bawm atanga pek tur a ni.

Directorate of Ayush:

A hnuai ah hian regular staff 23 leh contractual staff 166 an awm a. Thawktu hlawh atan kum 2025-2026 chhungin ₹900.17 lakh dah a ni a. Hmasawna kawng hrang hrang heng Ayush health program hrang hrang kalpuina tur te, District Hospital, CHC, PHC Ayush Health & Wellness Center tea thlawna semtur dawmdawi leina te, Aizawl - 50 bedded Ayush hospital sak mek senso tur te, Saitual - 10 bedded hospital senso tur te, Hortoki - 10 bedded hospital sakna tur te, Ministry of Ayush (a thuphunga min approve tawh la sanction loh) kan dilna tur te, Thenzawl - 50 bedded Ayush hospital enkawlina senso te leh District Hospital thenkhata Stand-alone Ayush Wing senso leh a tula hman tur ₹1,354.08 lakh ruahman a ni. A zavaiin Directorate of Ayush hman tura dah chu ₹2344.25 lakh a ni. State sum bawm atanga hman tura dah ₹344.65 lakh anih laiin, sorkar laipui atanga hmuh kan inbeisei chu ₹1999 lakh a ni.

National Mental Health Programme:

He program kalpuinaa thawktu hlawh leh tul dangah ₹120.18 lakh dah a ni bawk a. Chubakah chuan, blood transfusion; thisen pek (blood donation) kalpui a nih apianga hman tur blood bag, reagent leh a kaihnawh leina tur budget ah ₹170 lakh lai dah a ni bawk. Hei kan sorkarah chuan a thlawnin kan kaltir zel a ni. National Health Mission hnuai ah thawktu mi 2315 te hlawh sorkar-laipui atanga hmuh tura beisei ₹12,000 lakh dah a ni bawk. Heng bakah hian ₹7900 lakh chu hriselna lama hmasawna hnathawhna hrang hrang atan a ruahman a ni a, State share ah ₹1300 lakh dah a ni bawk.

Hmun hrang hranga hriselna lama thawktu doctor, nurse, technician, Group D leh a dangte ah indaihlohna kan neihte chu NHM hian min phuhruk sak nasa em em a. Health clinic leh Health & Wellness Center hrang hranga thawktu min dah sak thei bakah, program hrang hrang - National Vector Borne Diseases Control Program te, National Rabbits Control Program te, National TB Elimination Program te leh a dangte kalpui anih mai bakah CHC, PHC leh sub-Centre-ah te diagnosis services tihchangtlungna tur an thawk mek a, ZMC&H leh District Hospital Champhai tan Critical-care Block te an sa mek bawk a ni. Hospital computerize-na tur software - Hospital Management Information System chu hospital hrang hrang hman tura buaipui chhoh mek a ni a, hospital thenkhatah chuan hman tawh a ni.

Prevention & Control of Disease:

Minor-head 101 hnuai ah hian program hrang hrang -National Leptosy Control Program, National Program for Control of Blindness, National TB Control Program, Sexually Transmitted Disease, Control Program, Control of Epidemic, Immunization, National Malaria Eradication Program, AIDS Control, Tobacco Control te enkawlina tur ₹2624.01 lakh ruahman a ni a, hei hi thawktu hlawh leh office tul danga hman tur a ni. Tin, Food & Drugs Administration lam office leh laboratory te kalpuina tur ₹291.85 lakh dah a ni a, thawktu hlawh leh office tul danga hman tur a ni.

Capital Head lam han sawi ve ta ila. Department budget pumpui chhunga capital head hnuaih hian JAICA funded project - Mizoram State Super-Speciality Cancer Hospital sakna tur ₹2,000 lakh dah a ni a. Tunah hian JAICA lam duhdan angin hna pumpui enkawltu turah Joint Venture Consultant Mukhesh & Associate leh Oriental Consultants

Global Compant Ltd. te thlan an ni a. Soft-Component lam Consultant atan Niponkawi India Private Ltd. thlan an ni bawk. Kum 2025-2026 chhunga pawisa hman tur ruahmanna kan consultant ten an rawn duan chu ₹3,914.53 lakh a ni. Project Management Consultant te hnena pek tur ₹613.27 lakh, Soft Component Consultant te pek tur ₹258.45 lakh leh Civil Works chhawrna tur ₹3,042.53 lakh te a nih laiin, budget ah hian ₹2000 lakh dah a ni phawt a. Sorkar laipuiin fund min pekhhuah dan azirin a tul anga allocation dil belh zel a ni ang.

Tin, World Bank funded Mizoram Heath System Strengthening Project atan ₹6,000 lakh dah a ni bawk a. He project hnuaiia sum kan hmanna tur tlangpui chu –

1. Kan Hospital leh Health facilities tam thei ang berin National Quality Assurance Standard Enqo Certification an neih theihna tura an mamawh hrang hranga hman atan Directorate, CMO office District hospital CHC, PHC, SC te hnenah ₹900 lakh pek tura ruahman a ni.
2. Mizoram College of Nursing & M.COM tihchangtlungna tur - ₹500 lakh;
3. Champhai District, Siaha District, Lawngtlai District, Lunglei District Hospital chei that leh repair-na bakah Civil Hospital, Aizawl bio-medical waste storage facilities siamna tur dah a ni bawk.
4. Mizoram College of Nursing hnuaiia post - basic B. Sc. Nursing leh M. Sc. nursing course hawn nana thil tul leina tur - ₹300 lakh;
5. District Hospital thenkhata CT scan bunna tur ₹2,000 lakh;
6. Health facilities atanga financial management leh quality assurances lam hawi capacity building atan ₹200 lakh;
7. onsultant kaltlanga project management leh technical support atan ₹1500 lakh;
8. Mizoram Universal Health Care Scheme kan hman theihna tura capacity building leh IEC atana - ₹400 lakh; (Hei hi Pu Chhantea zawhna ka chhanna ni nghal se; hetah hian awareness te kan ti nasa dawn a ni).
9. National level NQUAS hman tur, office expense leh tul dangah sum ruahman a ni bawk. Heng project – MHSP, MHSSP leh JAICA-ah te hian state sorkar sum lo hman lawk phawta, re-imburement angin funding agency te hnena hmuh let leh thin a ni.
10. 15th Finance Commission hnuaiia health grant atang ₹3,451 lakh hmuh beisei a ni bawk.

Heng baka ka sawi belh duh chu, Pu Speaker, kan Chief Minister in he House zahawm taka a lo sawi tawh ang khan mipui huapzo tur healthcare scheme changtlung zawk - Mizoram Universal Health Care Scheme chu 1st April, 2025 atangin hman tan tum a ni a. Tun hmaa healthcare scheme lo kalpui thin kha changtlung leh huamzau zawka kalpui tum a ni. Heta kan hriat atan pawimawh chu - tun hmaa chhungkaw khatin ₹2 lakh thleng kum khata hman theih thin kha, ₹5 lakh thleng hman theih tura tihpun a ni dawn a ni.

Tin, paper-a a bill submit ngai tawh lovin, changkannain a ken tel online kalpui tum a ni a. Cashless, pawisa pek ngai lova damlote enkawl theihna bill pawh damdawi-inte hnena sorkarin a pek mai tura duan a ni a. Inenkawlna senso pawh package rate awmsa hman tur a ni dawn bawk. Mipuite tan chuan Mizoram pawn leh chhung damdawi-in, MAXX hnuaiia empaneled hospital te hnenah awlsam taka inenkawl tawh mai tur a ni. Tun kar chho atang hian district hmun hrang hrangah offline registration kalpui chungchang training kan pe mek a, training hi zawhfel anih ve leh sub-center zawng zawngah registration kalpui lehngal a ni ang a. Tin, online registration hi April Ni 1 atangin puanzar a ni bawk ang a,

chu chu mipuite'n an lo hman tangkai pawh ka beisei em em bawk a ni. He healthcare scheme atan hian Finance Department chuan crore ₹218 a ruahman a. Heng bakah hian CORPUS fund crore ₹215 kan neisa bawk a.

Healthcare scheme hlawhtling tak kan neih nan Finance Department leh Health & Family Welfare Department te chuan chak takin hma an la mek a. He healthcare scheme thar hi April Ni 1 atanga hman tan tawh tur anih avangin, sorkar damdawi-in te chu tihchangtlun a ni dawn a, staff indaihlohna pawh a theih chin chinah hnawhkhah tum a ni. Kan Chief Minister pawhin a sawi tawh ang khan, ICU te kan function tir ang a, a tul dan azirin doctor te, nurse leh technician te pawh kan lak belh bawk dawn a ni.

Pu Speaker ka tihual palh hlauh mai a; lawmthu ka sawi hmam. Nichinah khan MHSSP atanga X-ray lei tur kan lei harna chhan chu, a bidder ho ah problem eng emaw a awm a, tunah hian kan ti tha leh mek a ni. Chuvang chuan, tunah hian kan lei tur chu 110MA portable a ni a. Civil Hospital Aizawl te, ZMC te, Champhai District Hospital te, Lawngtlai, Lunglei, Kolasib, Serchhip, Siaha, Saitual te bakah CHC 8-ah khan kan lei dawn bawk a ni. Tin, Kulikawn te, Tlabung te, Hnahthial te, Khawzawl te tan kan lei dawn bawk a ni. (CHC kha Pu Rintea khan lo hria se, Vairengte kha a tel a ni, tih kha.)

Tunah chuan, Lawmthu sawina lamah kal tawh mai ila - Mipuite hman tur MRI khawl tha tak mai crore ₹14.45 man Aizawl Smart City Project in Civil Hospital Aizawl min pe hi lawmthu kan sawi tak meuh meuh a ni. Mizoram sorkar hospital-a MRI khawl bun hmasak ber tur a ni nghe nghe a. He khawl min ngaihtuah sak tu Pu Sapa leh a pawlte hi chawimawiin awm rawh se.

Ni 24.2.2025 khan HIV-AIDS chungchanga legislative forum chuan HIV-AIDS vei ART la mek te sum leh harsatna avanga la chhonzawm thei silote manganthlak zia leh khang ho hriselna derthawn zia kha kan ngaithla a. Chuta kan kalkhawmna ah chuan MLA-ten an fund atangin cheng ₹50,000/- theuh thawh ni se tiin an rel a; hei hi planning lam te pawhin notification min chhuah sak tawh a. Ka MLA-puite hian hnial lova min pawmpui vek hi ka lawm em em a, lawmthu ka sawi duh bawk a ni.

Tin, HIV positive ten treatment an lak dawna test hrang hrang a thlawna an lak theih nan kan Chief Minister hmalaknain sorkarin ₹10 MSACS-ah min pe bawk a, kan lawm em em a ni.

Mipuite hmaah a awm loh takin, kan sorkarin infrastructure and services a la thar a. Heta sum hmuh hi health sector lam pawhin kan lo chang ve dawn a. Tin, Social Welfare hnuai Women Department lam pawhin kan lo chang dawnin kan hria a, kan lawmin kan nghakhlel takzet a, lawmthu kan sawi bawk a ni.

Pu Speaker, heng hi a tlangpuia ka department te hmalakna House hmaa ka rawn sawi theihthe chu a ni a. Ka demand te uluk taka min enpui a, thahnemngai taka min sawipui avangin, member-te chungah lawmthu ka sawi a ni.

Pu Speaker, kum 2025-26 chhunga hman turin heng ka department hrang hrangte demand hi he House zahawm taka min pass-pui turin ka rawn dil e –

<i>Demand No.</i>	<i>Department</i>	<i>Amount in ₹</i>
24	Health & Family Welfare	8,26,06,89,000.000
29	Social Welfare	3,13,40,61,000.000
43	Tourism	11,66,44,000.000
TOTAL		11,51,13,94,000.00

Ka lawm e.

SPEAKER : Awle, tunah chuan Minister zahawm tak Pi Lalrinpuiin a demand te –

<i>Demand No.</i>	<i>Department</i>	<i>Amount in ₹</i>
24	Health & Family Welfare	8,26,06,89,000.000
29	Social Welfare	3,13,40,61,000.000
43	Tourism	11,66,44,000.000
TOTAL		11,51,13,94,000.00

House-ah pass a rawn dil ta a. Remti apiangin, ‘remti’ ti ula. Remtilo kan awm chuan, ‘remtilo’ ti ula. (House-in a remti a). A lawmawm e.

Awle, kan Minister zahawm tak Pi Lalrinpuii demand chu House-in lungrual takin a pass ta a ni. (**Pi Lalrinpuii, Minister:** Pu Speaker, ka lawm e.)

Kan Minister kha a hriselnain a tlin hrim a. Khati zat han chhiar chhuak tur chuan tamtak chuan kan tlin lo mai thei a. Kan Minister-te hian winding up note hi member te min sem ta mai sela, an duh zawnng eng emaw lai, Out of the box deuh, ti mai ang, chhuanawm deuh bik han sawi mai te hi remti ta ila. Engnge kan ngaihdan le? An lainatawm em mai, kan Health Minister ang te kha.

DR. K. BEICHHUA: Pu Speaker, nimin lamah pawh khan rawtna kan siam tawh a. Khatia tih mai kha a tha ang. Chuti lo chuan department lian deuh hlek te hi chu a buaithlak ve tlat.

SPEAKER : A chhiar theih miah loh tihna ni lovin, kan minister-te khan remchang an tih danin kalpui mai zawk sela ti rawh u.

Zinglamah khan kan House Leader pawhin a sawi nawn leh a, 23rd Assam Rifles Khatla hmunpuia kal hun kan first information ah khan dar 3 kan ti a. Amaherawhchu, dar 2:30 zawk tur a ni a. Dar 2 ah MLA te chu kan thuthmunah awm tura beisei kan ni tih kha, House kan inhriattir ni sela.

Report hi kan hre leh duh em? Aw le, Vawiina champion chu Pu VL Zaithanzama a ni a. A thiam dan chu a tling lo pawh a ni lova, a pel pawh a ni lova, min. 10 chiah chiah a hmang a ni. A dawtah chuan Pu Jeje Lalpekhlu a ni a, ani hian min. 10 leh sec. 5 a hmang. Tin, pathumna chu Pu T. Lalhlimpuia, ani hian min. 10 leh sec. 23 a hmang a ni. A sang lam a ngai em; a ngai maw? Vawiina champion chu Pu RM Chakma a ni a, ani khan min. 14 leh sec. 46 a hmang a. A pahnihna chu, Pu V. Malsawmtluanga a ni a, min. 14 leh sec. 11 a hmang a ni. A pathumna chu, Pu R. Rohmingliana a ni a, min. 13 leh sec. 44 a hmang a ni.

Vawiin chu hei, kan thil puan zeuh zeuh hi a effective dawn riauin ka hre mai a; kan Dampa bialtu zahawm tak a lang tlat lo mai. Naktuk lamah te hian engnge ni, tan a rawn lak dan tur ka hre lova. Tin, report dang deuh hriat duh kan nei em? Din huna kha, ding tam leh ding tlem kan hre leh zuai duh em? Vawiin ni thlenga ding tam ber chu, kan House Leader Pu Lalduhoma a ni a, tum 30 a ding a. Pahnihna ah chu, Pu C. Ngunlianchunga, tum 24 a ding a. Pathumna chu, kan Opp. Leader niin, tum 21 a ding a ni. A tlem lamah chuan kan Dy. Speaker a champion a, tum khat a ding a ni. Tichuan, Pu Lalthansanga tum khat a ding bawk a. Pathumna ah chu, Pu C. Lalsawivunga, tum thum a ding a ni.

Aw le, ti khan vawiin a kan business chu kan zo ta a, kar leh 17th March, 2025 (Thawhtanni) chawhma dar 10:30 AM-ah kan thukhawm leh dawn nia.

Sitting is adjourned (8:24 PM)